

DES
SATYRES
BRUTES,
MONSTRES ET DEMONS.

DE LEVR NATURE ET ADORATION

*Contre l'opinion de ceux qui ont estimé les Satyres
estre une espece d'hommes distincts &
separez des Adamicques.*

Dedié à Monseigneur le Marechal de S. GERAN.

Par F. HEDELIN, Aduocat en Parlement.


Toutes les choses veritables ne sont pas encore dictes, il en
reste bonne part à ceux qui viennent apres nous. *Senec.*



31189

A PARIS;
Chez NICOLAS BVON, rue Saint Jacques,
à l'enseigne S. Claude, & de l'Homme Sauvage.

M. DC XXVII.
Avec Privilège du Roy & Approbation.



08118





A MONSEIGNEVR,
MONSEIGNEVR
LE MARESCHAL
DE SAINT GERAN.



ONSEIGNEVR,

*Les Spartiates ont
practiqué long temps
une coustume à l'endroit des petits
enfans, digne seulement de l'auste-
rité d'un tel peuple. Car si tost
qu'ils estoient nez, on les mettoit
entre les mains d'un certain Offi-
cier député pour les visiter, lequel*

EPISTRE.

après les auoir exactement considerez, s'il les trouuoit difformes en leurs membres, ou debiles en leur complexion, les precipitoit dans les Apothetes ou Depositoire, lieu destiné pour ceste inhumanité, parce qu'ils estimoient estre indigne de leur grandeur, de nourrir des monstres qui feroient honte à leurs parents, ou des delicats qui seroient inutiles à leur Republique.

Or puisque les liures sont les enfans de l'esprit, quel iugement dois-je attendre en vous presentant aujour d'huy ce traicté, dont le nom & le subiect est si monstrueux, & le discours si foible? Direz vous pas qu'il le faut precipiter dedans quelque Depositoire, & me fermer la bouche d'un eternal silence?

EPISTRE.

Mais quand il me souvient que vous mesme, quelque estrange difformité qui soit aux Satyres, auez bien daigné vous en entretenir, & tesmoigner par vos paroles quelle estoit vostre curiosité : cela mesme qui m'a donné le courage d'entreprendre ce petit ouurage, me confirme en la croyance qu'il ne vous sera point desagreable. Ce n'est pas que ie m'ose promettre de resoudre tous les doutes qui se peuuent rencontrer en ceste matiere, & en donner vne entiere intelligence. La cognoissance de mon incapacité m'en oste la presumption, & la difficulté du subiet l'esperance de le pouuoir faire. Mais seulement afin que prenant ceste occasion pour vous offrir avec les premices de

EPISTRE.

mes estudes, les vœux de vous servir, qui sont naturels en la famille dont ie suis sorty, ie puisse recevoir l'honneur d'estre reconnu autant d'affection que de naissance,

MONSEIGNEUR,

Vostre tres-humble, tres-obeissant,
& tres-affectionné seruiteur,
F. HEDLIN.



ADVERTISSEMENT.

L'INSCRIPTION de ce Liure ne semblera peut estre pas moins estrange, que la methode que i'ay obseruee en ceste matiere est extraordinaire. Cette question est si nouuelle, qu'à l'abord oyant parler de Satyres bestes brutes, plusieurs se trouuerront par aduanture surpris, comme la plupart de ceux ausquels i'ay communiqué mon dessein auant que de le mettre au iour. Mais apres les tesmoignages de tant d'Autheurs si celebres dont nous auons composé la seconde partie de ce Liure, il n'y a plus à douter si les vrais Satyres sont bestes brutes. Nous

ADVERTISSEMENT.

les auons ordonnez & ioincts ensemble en la forme que nous auons iugée la plus commode pour faire couler insensiblement tant de citations, & les rendre moins ennuyeuses. Quand à l'ordre, le methodique & plus commun estoit, ce semble, de discourir du nom de Satyre & de sa definition. Mais ce mot estant æquiuoque & conuenable à plusieurs choses de nature toute diuerse, ie me fusse en vain trauaillé à cet esclarcissement : & puis disputer des noms est vn discours si leger & de si peu d'edification, que i'ay mieux aimé donner des choses solides & plus importantes. I'ay pris ceste question par la teste, & dès l'entree combattu l'opinion de ceux qui se sont imaginez contre raison que les Satyres estoient homes, afin de disposer par ce moyen le Lecteur à receuoir plus facilement la diuision que i'en fais en trois especes. Ceux qui me feront l'honneur

ADVERTISSEMENT.

decourir le Liure tout entier, cognoistront que l'inscription est coëgale, & toute proportionnée aux choses que ie traicte, & l'ordre que i'ay tenu nécessaire : Et i'ose me promettre que si leur curiosité n'est pleinement satisfaitte, au moins leur bien-veillance ne pourra refuser vn fauorable accueil à mes efforts, principalement en vne matiere si nouuelle, si penible, & si negligee. L'on pourroit demander peut-estre, pourquoy ie ne suis pas entré plus auant dans le discours de tous les hommes monstrueux, auquel la porte n'est que trop largement ouuerte par ceste dispute des Satyres. Mais estant particulierement obligé de traicter ce subiect, i'ay creu que ie ne m'en deuois aucunement elgarer. Il se trouuera mesme que i'ay laissé beaucoup de fables des Satyres dont ie pouuois grossir ce volume, parce qu'elles ne concernent en rien leur nature, & la co-

ADVERTISSEMENT.

gnoissance que nous en recherchons. Ce petit ouvrage pourtant sera les ar-
res d'un plus grand auquel ie suis main-
tenant comme engagé: car si mon es-
perance se trouue tant soit peu satis-
faicte du iugement & de la curiosité
du public, j'acheueray comme j'ay
commencé: & cheminant sur les voyes
que ie me suis moy-mesme tracees, ie
donneray ce que j'ay peu recueillir des
Hippocentaures, Tritons, Nereïdes,
Geans, Pigmees, Acephales, Arima-
sps, Hommes colorez, & de tant d'au-
tres monstres, dont les Histoires font
mention. Sur tout ie prie le Lecteur
d'excuser les fautes enormes qui sont
suruenues en l'Impression. l'en ay cot-
té quelques vnes des plus apparentes,
pour les autres il m'obligera de les su-
pleer, & les pardonner à la precipita-
tion, ou negligence de l'Imprimeur.



IN LIBRVM

DE SATYRIS

D. HEDELINI.



SE quidem Satyros He-
delini pagina monstrat
Non homines, verum cer-
tius esse feras.

Hinc quoque Sirenes numeratas or-
dine Diuûm

Pisces, aut potius Dæmones esse, do-
cet.

Sed si ausus fuerit contendere Marsia
Phæbo,

Et calamos dulci præposuisse lyræ,
Sensit & excussam pœnæ sibi nomine
pellem,

Crede mihi, Satyrus bestia magna fuit.

G. CHESNEAV, Aduocatus.



A MONSIEVR

HEDELIN, SVR SON LIVRE DES SATYRES.



Q ne fcauroit par trop recom-
penser

*Les beaux esprits de ce siecle où
nous sommes,*

Dont le travail s'efforce d'amasser

Dans les escrits d'infins fcauans hommes,

*Ces belles fleurs qui monstrent aux Chre-
stiens*

En quelle erreur ont esté les Payens.

*Combien qu'apres tant de maux endurez,
Et tant de sang espandu sur l'arene,*

Nous deussions estre à present assurez

*En nostre Foy, sans plus nous mettre en pei-
ne*

De rechercher dedans l'obscurité

Du Paganisme, vne autre verité.

Tant de meschans s'efforcent d'obscurcir

Les clairs rayons que le Ciel nous esclance,
Et d'une fausse apparence noircir
Ce beau Soleil qui guide la croyance,
Qu'on voit en fin plusieurs foibles esprits
Dedans ces rets enlacez & surpris.

Pour faire veoir combien sont ignorans
Tous ces broüillons qui dedans la nature,
Ont recherché d'autres hommes vians
Que ceux qui d'Eue ont pris leur nourri-
ture,

Et pour monstrier les Syluains & Tritons,
N'auoir este que Brutes & Demons.

Ce Liure cy, le premier enfançon
De son Autheur, va se mettre en lumiere,
Nous enseignant par certaine raison,
De ces subtils la malice grossiere,
Qui vont disant que nous ne sçauons pas
Tous les mortels qui viennent icy bas.

G. CHESNEAU, Aduocat.



A MONSIEVR
HEDELIN, SVR SON
LIVRE DES SATYRES.



*Eux-là nous apprestent à rire,
Et furent trop iniurieux,
Qui firent les Satyres, Dieux:
Mais, qui admet l'homme Satyre,
Est plus insupportable qu'eux.*

*Car ce fut des Demons la ruse
Qui promeut l'adoration
De ces Syluains, & l'action
Est d'autant plus digne d'excuse,
Qu'elle estoit de religion.*

*Mais celuy destruit la nature,
Qui concluant par vn faux son,
Par quelque ombrage de raison,
Par le port, & par la figure,
Bastit vn homme à sa façon.*

*Hedelin, ton Liure est le Sphinge,
Qui lene toute obscurité,*

*Et descouurant la verité,
Monstre que le Satyre est Singe,
Et n'est homme ny Deité.*

AV LIVRE.

Allez doctes escriis, ores doux entre-
tien,
Des plus sçauantes mains, Allez; si le Sa-
tyre,
Est vne beste brute, & de l'homme n'a rien:
D'un Satyrique esprit ne redoutes point
l'ire.

Oson, Preuost de Nemours.

Extraict du Priuilege du Roy.

PAR Grace & Priuilege du Roy,
donné à Paris le 10. iour d'Auril
1627. il est permis à NICOLAS BVON,
ayant transport de M^e FRANÇOIS HE-
DELIN Aduocat en Parlement, d'im-
primer vn Liure intitulé, *Des Satyres,*
Brutes, Monstres, & Demons, &c. com-
posé par ledit HEDELIN, Auec deffen-
ces à toutes personnes de l'imprimer,
sans le consentement dudit BVON,
pendant le temps & espace de six ans,
à peine aux contreuenans de confisca-
tion & amende. Donné le iour & an
que dessus, & signé,

VE R S O R I S.

Approbatior



T A B L E
DES MATIERES
CONTENUES EN
cet Oeuure.

L I V R E I.



*VE plusieurs ont estimé les Saty-
res estre hommes differens d'espe-
ce des Adamicques. pag. 3*

*Que les Satyres ne pourroient estre plus
ny moins que les hommes Adamicques, &
estre hommes. 7*

*Qu'il n'y a point eu d'hommes Satyres
creez. 12*

*Qu'il n'y en auoit point dedans l'Arche
de Noe. 17*

*Qu'ils ne pourroient estre immortels en
leur tout. 20*

*Qu'ils ne le pourroient estre en vne par-
tie. 27*

Table des Matieres.

*Que s'ils sont mortels en leur tout, ils ne
sont point hommes.* 33

LIVRE II.

QUE les vrais Satyres sont bestes brutes de la nature des Synges. 53

De deux Satyrespris en Escla uonie. 55

Du Silene pris en Phrygie par Midas.

57

Des Pans de l'Inde, selon Megasthenes.

58

Des hommes cheure-pieds d'Herodote.

59

Du Satyre porté mort à Constantin. 61

Du Pan de Nicephore enuoyé à Constantin. 62

Du Satyre tué par Argus. 64

Du Satyre mené à Sylla. 65

*Des Satyres menez à la suite d'Osiris,
ou Bacchus.* 66

Description particuliere des Synges Satyres. 67

Que tels Satyres ne sont point hommes. 70

LIVRE III.

DES dereiglemens de la nature. 73

Table des Matieres.

Que les Satyres Monstres prouiennent de tels dereiglemens. 79

Qu'il y a peu de tels Satyres. 81

Qu'ils ne peuuent engendrer. 82

Qu'ils ne sont point hommes, c'est à dire qu'ils n'ont point l'ame spirituelle & immortelle. 85

Que l'ame spirituelle ne pourroit informer les parties brutales. 87

Qu'il ne se pourroit faire qu'elle informast les parties humaines, & la sensitive les brutales. 101

LIVRE IIII.

DE la pluralité des Dieux parmy les Anciens. 106

Que la Poésie a faict naistre cette erreur. 107

Que le diable la confirmée. 112

Des Faunes, Pans & Satyres, Dieux Forestiers. 110

Que les oracles de ces faux demy Dieux, & les terreurs Paniques, estoient artifices des Demons, pour se faire adorer. 113

Que Pan & le Demon de Midy, est mes-

Table des Matieres.

me chose.	118
De l'apparition des Demons en la forme qu'ils estoient adorez.	121
De leur apparition en Satyres.	123
Du Pan qui parut à Philippides.	125
Du Satyre qui se fit voir à Magister Vi- dens, sous Charles le Quint.	125
Des Satyres qui paroissoient aux Bac- chanales.	125
Que les Bacchanales n'estoient en ri n differentes des Sabats des Sorciers.	128
Du Satyre qui parut à S. Antoine en la Thebaide.	137
Qu'il n'estoit point hommie.	142
Qu'il n'estoit point vn Satyre mōstre.	148
Qu'il n'estoit point vne beste brute, contre l'opinion de Baronius.	150
Qu'il estoit vn Demon.	158
De quelques circonstances considerables en l'apparition de ce Satyre.	158
Que l'Hyppocentaure qui parut au mesme Hermite estoit vn Demon.	159
Que les Demons habitent tousiours aux deserts.	126

Table des Matieres.

Que les Demons Satyres les ont aimez
sur tous les autres lieux. 164

Des impostures & veritez meslangees
däs le discours de ce Satyre à S. Antoine. 168

Du passage de David qu'il allegua. 171

Que les paroles dont il vsa estoient plus
malicieuses que religieuses. 174

Que Pic & Faune arrestez par Numa
estoint Magiciens. 183

Que les Satyres dont escrit Philostrate
sont fabuleux. 184

LIVRE V.

QUE les Idoles des demy-Dieux Syl-
uains ont esté faictes sur l'image des
Synges Satyres. 190

Superstition des Aegyptiens. ibid.

Que les Satyres Synges qu' Osiris faisoit
mener à sa suite, donnerent subiet à l'adora-
tion des demy-Dieux bouquins. 192

Que Bacchus est tousiours suiuy des Sa-
tyres. 195

Que les Satyres adorez par les Payens
estoint semblables en toute chose selon les
fables, aux Satyres Synges. 196

Table des Matieres.

Qu'ils estoient estimez demy-boucs, &
cornus comme ces Synges. ibid.

Qu'ils estoient nommez les velus. 197

Que les Faunes demy-Dieux estoient re-
putez auoir la face rouge. 201

Vne queue de cheual. 202

Estre de petite stature. 203

Souples & d'un mouuement grotesque à
la dance. 204

Laschifs extremement. 206

Si les Inc^{tes} bes peuuent engendrer. 208

Des explications des Fables. 211

Que Pan a esté estimé l'image de la pa-
role. 213

Qu'il a esté pris pour la figure de l'hom-
me. 214


Que plusieurs l'ont interpreté pour le
principe de generation. 216

De l'amour de Pan enuers les Nymphes.
220

Que l'Idole de Pan, selon quelques vns,
representoit le monde. 224

Fautes suruennues en l'Impression.

P Ag. 2 lig. 3 l'ic de leur Createur. p. 4. l. 1. l. dans. p. 5. l. 8. l. laissez.
p. 15 l. 9. l. Rabinisme. p. 18 l. 17. l. de mesme. p. 19. l. 16 l. luy p. 24.
10 l. but p. 28 l. 19 l. ou aux. p. 38. l. 5. l. rendu à son. l'ibid. l. 16 l. dont
elle est. p. 58 l. 11. l. forests. D'ou p. 64. l. 17 l'ideus. p. 70. l. 1. l. & Si-
lene. p. 72. l. 1. l. les. p. 74. l. 24. l. en sanglantees, p. 76 l. 10. l. tracees,
p. 92 l. 1. l. contact. p. 98. l. 1. l. sacree p. 101 l. 13. l. qu'elle. p. 121. l.
8 l. affligeast p. 129. l. 22. l. Cin: des. p. 133 l. 1. & 1. l. que, l'ibid. l. 3. offez
vn autre boucq. p. 138. l. 7. l. discourut. p. 144. l. 16. p. 150 l. 16. p. 154
l. 2. l. auoient: p. 192 l. 1. l. Egypte sous, p. 193 d. 5 l. 2. l. a. p. 217. l. 2.
l. Bazarce, p. 222. l. 23. l. font.





DES SATYRES,
BRUTES, MONSTRES,
ET DEMONS, DE LEVR
nature & adoration.

*Contre l'opinion de ceux qui ont
estimé les Satyres hommes.*

LIVRE I.

*Que les Satyres ne peuvent estre
hommes.*



E souverain gouverneur
du monde mettant à exe-
cution le decret eternal de
l'establissement de l'Uni-
uers, voulut donner à chacune des
creatures vn degré de prerogative par-

ticulier, afin que toutes ensemble peussent dans l'admiration de leur nature porter des marques de la Majesté de leur Createur. A la terre il donna la fermeté sur le neant, aux Cieux vn mouvement sans repos, aux Astres vne splendeur d'elle mesme inexinguible, & aux animaux la vie. Mais voyant que la perfection de ce grand Tout, sembloit luy demander vne autre creature plus parfaicte, qui peust iouyr des thresors inestimables qu'il auoit departis au nombre infiny de ces nouueaux estres, & dominer sur tout le reste; il separa ce qu'il y auoit de plus admirable & de saint dans tous les membres de ce monde, pour les assembler en la nature del'homme qu'il crea. Et son desir ne se trouuant pas satisfait d'auoir reclos tant de riches merueilles dans ce petit ouurage, il voulust encore pour combler l'immensité de sa gloire, y adiouster sa propre Diuinité, & imprimant en sa plus noble partie l'image

faincte & venerable de son eſtre & de
 ſa grandeur, il en fit le petit Dieu de
 l'Vniuers. Il ſ'en trouue neantmoins
 de ſi meſcognoiſſans de ceſte grace in-
 finie, & ſi ennemis de leur excellence,
 qu'ils ſe ſont efforcez de communi-
 quer ceſte diuine humanité aux beſtes
 brutes, & les eſleuer iuſqu'au degré de
 leur perfection, ou bien, iniurieux à
 ſoy-meſme, rabaiſſer l'eminence de
 leur nature, & la rendre eſgale à la bru-
 talité. Paracelſe, entre ſes autres imagi-
 nations non moins impies qu'auda-
 cieuſes, impoſant aux œuures & à la
 main de Dieu, a bien oſé conſtituer
 cinq eſpeces d'hommes differens, dont
 la premiere eſt de ceux qu'il appelle
 Adamiques, c'eſt à dire enfans d'Adam,
 & les quatre autres qu'il faiet ſpirituels
 & mortels en leur tout, à la creation
 deſquels Dieu n'a iamais penſé, il les
 diſtribué dedans les Elemens, ſ'imagi-
 nant que dans chacun habitent certai-
 nes creatures raiſonnables, qu'il ap-

pelle dans le feu Salamandres & Vulcans, dans la terre Pygmees, dans les eaux Nymphes & Tritons, & dedans l'air Satyres. Encore certes m'estonné-je comme il n'a point passé plus avant, & à l'exemple de Xenophanes, basti des citez & porté sur les aisles de ses refueries des peuples entiers dans le ventre du Soleil & de la Lune, les remplissant selon la Philosophie des Pythagoriciens, d'hommes & d'animaux quinze fois plus grands que ceux de ce monde.

Depuis quelques années François Pic Comte de la Mirande, cheminant sur les voyes d'une pareille doctrine, a laissé dans ses escrits une opinion indigne à mon avis de son nom: car il soustiét que la definition de l'homme, animal raisonnable, ne luy est pas naturelle, ny particuliere, & que les Satyres estant aussi animaux raisonnables, il est nécessaire de mettre deux especes d'hommes, dont l'un sera homme Satyre, & l'autre homme non Satyre.

vrayes especes de bestes brutes, auxquelles donner le nom d'homme seulement est sacrilege; ce que l'on peut aisement prouuer par des raisons si naturelles & si saintes, qu'il n'y a point d'autre responce que l'impieté.

Premierement si l'espece du Satyre estoit constituee par vne difference, c'est à dire par vne nature particuliere distincte de l'homme Adamique en son essence, ou bien ceste nature seroit plus noble & excelléte, ou bien abaissée au dessus, & beaucoup moindre en la composition de son estre. Or il ne se peut faire que ny l'un, ny l'autre soit au Satyre, ny en aucune creature, & qu'elle soit homme: car s'il estoit en la nature plus parfait, & qu'il fust esleué au dessus du vray homme, il auroit sans doute atteint le point de la nature Angelique, & seroit reuestu de toutes les qualitez spirituelles qui suivent l'estre de l'Ange, pource que le vray homme est de si peu inferieur à l'Ange, & na-

stre nature est si voisine de celle des intelligences celestes, qu'il ne peut y auoir aucun estre qui tiennne le milieu de ces deux autres. Ce qui a faict dire à Dauid que Dieu a couronné l'homme d'honneur & de gloire, l'ayant faict seulement vn peu moindre que l'Ange, & à saint Thomas que la Hierarchie humaine est contenuë sous la dernière Hierarchie des intelligences surnaturelles. De sorte que le Satyre ne pourroit estre plus que l'homme, s'il n'estoit Ange, chose indigne de nostre pensee, & qui ne peut tomber en l'imagination des ames plus grossieres : & ceux là mesme qui feroient le Satyre homme, ne voudroient pas auoir dict qu'une creature de substance corporelle, & terrestre, respirant vne vie animale, lascif au de là de ce que l'on peut imaginer, & subiet à la mort, fut pareil en son estre à ces substances toutes spirituelles, qui n'ont autre vie que celle qu'elles tirent immediatemēt de Dieu,

routes sainctes en leurs operations, & doüees dès leur origine de l'æuiternité. De mesme aussi ne se pourroit il faire que le Satyre fust moins parfaict que les enfans d'Adam, & que les qualitez de sa nature rauallées au dessoubs de nostre estre, le rendissent nostre inférieur, & qu'il demeurast homme: Pour ce que alors il ne feroit plus qu'une espece de brute, qui n'auroit rien de commun avec l'humanité, que la vie, le corps, & le sentiment, à la façon des autres animaux. Car autant que l'homme approche de l'estre des Anges par la noblesse de son ame, autant par son autre partie, auoisinet-il la brutalité: & comme il ne peut y auoir de creature qui tienne le milieu entre l'homme & l'Ange, aussi ny en peut il auoir entre l'homme & la brute, estant nostre nature, comme dit saint Augustin, le milieu & le point qui separe la nature Angelique de la brutale, n'ayât rien moins que l'Ange, outre les sens corporels,

ny rien plus que les brutes outre l'intelligence spirituelle. Ce que les Platoniciens veulent signifier, disant que l'homme est le milieu des bestes & des Dieux, & Seneque escriuant, que le meilleur de l'homme est la raison par laquelle il marche deuant les autres animaux, & suit de près les Dieux : car par ces Dieux faut entendre ceux qu'ils nommoient *Æuiternes*, ou *Æuintegres*, qui ne sont autres que les Anges & substances spirituelles, dont l'*æuiternité*, dit saint Thomas, est la mesure. De sorte que si le Satyre est priué de ceste intelligence, il ne luy reste plus que la nature animale, c'est à dire vne vraye brutalité. Dauantage, toutes les parties de ce grand Vniuers sont d'une telle composition subordonnées l'une l'autre, que les plus nobles sont seruies par les inferieures qui s'y rendent subiectes, sans aucune repugnance de leur nature. Les Cieux, les Astres, & les Elements, sont assubiectis à la generation

leur premiere naissance, & de toutes les autres parties de l'Vniuers, est reconnu parmy nous pour extauagance & imposture. Or qu'il n'y ait point eu d'hommes Satyres creez de Dieu, les escritures qui portent avec soy leur raison, & la conđamnation de ceux qui les reiettent, nous l'enseignent trop manifestement pour le reuoquer en doute.

Après ce grand trauail sans peine, qui fit sortir de la main de Dieu ce bel ouurage de cinq iours, Dieu voulust creer l'homme, & à sa creation il employa la sixiesme iournee toute entiere. Et affin que la nature se peut prouigner & perpetuer en son espece, il les fist masse & femelle Adam & Eue. Or en toute ceste sixiesme iournee, il n'est point parlé de Satyres. Et quand elle auroit esté (comme disoit Empedocles) aussi lógue que sont aujourd'huy dix mois, il n'est point escrit qu'il en fut créé. De sorte qu'il faut dire qu'il

n'y en a point, où s'il y en a qu'ils auoient esté creez le quatriesme & cinquiesme iour, quand Dieu mit sur la terre toutes les especes de serpens, & de bestes brutes, entre lesquelles les Satyres doiuent estre necessairement compris, s'ils ont esté creez : car il ne fut point créé d'homme que le sixiesme iour, & à ce iour point d'autre qu'Adam & Eue : car apres que Dieu les eust faicts, dit Moyse, il les benist, & puis se reposa. Si ce n'est peut estre que l'on voulut auoir recours à la fabuleuse antiquité des Arcades, qui se disoient nez auparauant la Lune, & s'imaginer que les Satyres auroient esté creez auant ces grands luminaires du Firmament : ou bien receuoir pour verité l'extravagance du Rabin Abraham, lequel comme s'il eut preueu ceste raison, escrit que les Satyres furent creez, comme aucuns ont voulu dire, de la femme, le septiesme iour; & que Dieu preuenant de la nuit suivante, ne leur peut don-

ner leur entiere perfection ; d'où vient qu'ils se tiennent cachez tout le long du iour & de la nuit du Sabbath. Mais à cela nous n'auons rien à respondre, sinon que ceste fiction des Arcades est vne inuention de Grecs, c'est à dire, de personnes ieunes, comme escrit Platon, & ignorans de l'antiquité. Et l'autre, du Rabinisme, c'est à dire vne fable Milesiacque, & vn conte à perte de veuë : L'un & l'autre esloigné de raison, hors le sens commun, & contraire à la verité, qui nous apprend, qu'aucune creature viuante ne fut faite auant les Astres, & que le septiesme iour la main de Dieu se reposa de toute œuvre. C'est à dire qu'il accomplit dans le sixiesme (comme expliquent les sçauans Grecs & Hebrieux) tous les desseins qu'il en auoit proiettez dans l'eternité, & que dès le commencement du Sabat, il cessa la creation de toutes nouuelles especes.

Suiuant les erres de la pureté de ceste

mesme doctrine, nous dirós que Dieu tirant la nature humaine du neant pour la mettre au monde, la voulust creer à sa semblance, & la marquer en son ame de l'image de sa Diuinité. Ainsi fut-il resolu dans l'vniforme communion des trois personnes diuines, comme il est aisé d'apprendre par le texte de Moyse, où Dieu dit, Creons l'homme à nostre semblance. Or il n'y a point eu d'autre creature en l'origine du monde, que nostre premier pere auquel Dieu ait fait ceste grace de luy mettre sur le front le pourtraict de son estre & de sa lumiere, luy seul a esté formé à la semblance de son Createur, à luy seul fut donné cet esprit de vie, lequel, comme escrit Philon, rendit celui qui le receuoit, semblable à celui qui l'inspiroit : Car aussi tost qu'Adam & Eue eurent esté creés, Dieu mit fin à l'ouurage du monde. Verité qui nous oblige à croire que les Satyres ne peuvent auoir empreinte en leur nature
ceste

ceste image de la Diuinité, puis-
 que cette grace a esté octroyee à Adam
 seulement? & comment sans cette mar-
 que pourroient ils estre hommes, puis-
 que Dieu en creant l'homme luy a
 voulu donner cette marque glorieuse
 & diuine?

Mais quand il seroit aussi vray, com-
 me il est tres-faux, que les Satyres au-
 roient esté creez masse & femelle au
 premier aage du monde, l'espece n'au-
 roit peu par la propagation descendre
 iusques à nous, & le Deluge vniuersel
 auroit arresté le cours de leur genera-
 tion, & estouffé toutes les semences
 en ceux qu'il auroit submergez. Car
 nous apprenons d'une doctrine sans
 contredict, que dans l'Arche de Noé,
 qui fut bastie pour la conseruation de
 toutes les creatures que Dieu reseruoit
 au renouvellement de l'Vniuers, il n'y
 auoit point d'autres hommes que Noé
 & ses enfans, & tout le reste estoient
 bestes brutes. De sorte que les Satyres

n'estoient point dans cette Arche s'ils estoient hommes, ou bien si leur couple y fut receuë pour éviter ce naufrage commun, il falloit qu'ils fussent bestes brutes. Et dauantage le genre humain, dit l'Escripture, fut semé & renouuellé par les enfans de Noé: & de leur lignée sont tous les peuples de la terre. Ce qui ne seroit pas veritable si les Satyres estoient vne autre espeece d'hommes: car n'estant point de la race d'Adam, ils ne peuuent estre de celle de Noé. S. Augustin semble fauoriser cette raison par le discours qu'il faict des hommes monstrueux, qui estoient despeints dans la place de Carthage regardant sur la mer, faicte du mesme artifice que ces Grottes qui sont ordinaires auourd'huy dedans les grandes maisons. L'on y voyoit des Centaures, des Cynocephales, des Scyopodes, & mille autres fantosmes des Poëtes & des Historiës, tels qu'un Herodote. Ce Docteur met en

question, si tels monstres sont nez de la semence de Noé & d'Adam, & la decide en telle sorte : ou bien tels monstres ne sont point, ou bien ils sont bestes brutes, ou s'ils sont hommes, ils sont necessairement venus de Noé & d'Adam. Et sur cette dernière conclusion, par raison contraire, ie diray que si les Satyres, & ces prodiges des Fables, dont on voudroit faire des hommes imaginaires, ne sont point descendus de Noé, il est necessaire de conclurre qu'ils ne sont point hommes, puisque tout le genre humain, comme dit l'Escripture, a esté renouvelé par ~~eux~~ ^{lui} : ou ce mot de genre est à remarquer : Car Moÿse pour nous faire cognoistre qu'il n'y a point d'autres hommes que les Adamieques, en a compris l'espece sous vn mot generique.

Mais pour ioindre de plus près cette opinion que nous combattons, & toucher le particulier de la nature de

ces pretendus hommes Satyres, il nous faut venir à l'immortalité, ou mortalité de leur estre: Car ce discours nous fera cognoistre à veüe d'œil que tels hommes sont pures chimeres & qui n'ont point d'autre existence que dans l'imagination de ceux qui ont trouué cette impieté.

Toutes les choses que l'on peut dire immortelles, le doiuent estre, ou selon toute leur nature entierement comme les Anges, ou bien selon quelque partie comme l'homme, lequel suruiuant à la moitié de soy-mesme iouït d'une immortalité partielle, iusques à ce que Dieu par vn miracle efficace de la resurrection du Verbe eternal, rendant à son corps mort vne vie posthume, le donne tout entier à l'eternité. Mais les Satyres, ny en l'une, ny en l'autre façon ne peuuent estre immortels. De dire que dès leur creation ils ayent esté doüez de l'immortalité selon la totalité de leur estre, & qu'ils soient au mes-

me estat de vie que les enfans d'Adam pouuoient esperer sans le peché de leur pere, cela ne se peut imaginer. Car croissant & multipliant en leur espece, ainsi que Dieu commanda à toutes les creatures qu'il mit au monde, & ne touchant iamais le dernier point de leurs iours, les astres du firmament, & les fables de la mer seroient facilement nombrables aupres de leur infinité. L'on ne douteroit plus à present si les Satyres seroient hommes, car les rencontres trop frequentes & ordinaires que l'on en feroit, nous auroient donné vne eptiere cognoissance & certaine de ce qu'ils sont. Il ne seroit plus besoing de les aller chercher dans les antres des bois & des deserts, car tous ceux qui seroient nez suruiuans à tous les siecles du passé, pourroient à peine trouuer l'estendue de la terre assez spacieuse pour les contenir. Si bien que pour deffendre vne faulxeté, il faudroit faire vne impieté, & dire qu'ils sont

veritablement ces Pans, *Ægyrans*, & demy Dieux du Paganisme, qui ne pouuoient estre veus (seló *Seruius*) que quand bon leur sembloit, & qui ne rendoient point leurs oracles, s'ils n'estoient surpris yures, endormis, & attachez de forts liens: Car alors seulement ils estoient contraincts comme vn *Protee*, de se laisser voir librement & de parler. Ainsi le *Silene* de *Virgile* est arresté par *Chromis* & *Mnasylus*, pendant qu'il respire les fumees du vin qui l'auoient assoupy, & de la mesme sorte, *Picus* & *Faunus* furent violencez par *Numa*, lors qu'il voulut sçauoir d'eux l'expiation du foudre. Mais sans nous arrester à telles Fables trop foibles pour introduire vne opinion à laquelle le sens commun resiste de luy mesme, nous passerons aux autres raisons qui montrent tres-euidemment que ces *Satyres* ne peuuent estre immortels en leur tout.

Toutes les choses du monde ont

leur fin terminee, & rien ne peut subsister deffoubs les Cieux eternellemér. Tout generable, dit le Philosophe, est corruptible, c'est à dire que la fin de chasque chose depend de son origine, & que tout ce qui prend sa naissance par la generation, trouuera sa fin par la corruption. Les plus sçauans Romains, dit Plutarque, estimoient que la Déesse Libitina, Déesse de la mort, estoit Venus, attribuant, non sans cause, la superiorité de ce qui concerne le commencement & la fin de la vie des hommes, à vne mesme puissance de la Diuinité. Car les Cieux qui sont les peres de toutes choses engendrees, ne laissent pas long temps durer leurs ouurages, & tout ce qu'ils ont produict au iour par le meslange des quatre Elemens, ils le reduisent incontinent à ses premiers principes: ressemblant en cela ces petits enfans qui se ioüant sur le bord de la mer, dressent plusieurs petits chasteaux de sable, puis les

renuerſent auſſi-toſt à coups de pierres, pour les redreſſer & les renuerſer encore apres: ils deffont eux meſmes tout ce qu'ils font, & avec la faux de Saturne, deſtruifent tout ce qu'ils baſtiſſent. Et bien qu'il y ait quelqu'un de leurs ouurages, auquel, comme par vn priuilege particulier, ils octroyent vne plus longue duree qu'à tout le reſte, encore à la fin ſa courſe trouue vn bout où elle ſe doit terminer. Neſtor a conté trois ſiecles entiers de ſa vie par les doigts de ſa main droicte, & puis il eſt mort: le Phœnix peut bien viure mille ans, mais au bout de ce temps il trouue la fin de ſes iours: & les ſepulchres, monuments que l'on dreſſe pour l'eternité, n'ont ils pas leur terme borné par les deſtins? bref tout ce que la nature faiſt naiſtre, la meſme nature le faiſt mourir. La plus part meſme des Demons, du nombre deſquels eſtoient les Faunes & les Pans de l'antiquité, ont eſté creus mortels, par ce qu'ils

estoyent creus elementaires, & apres vne longue reuolution des siecles obeir à la reigle vniuerselle de tout le monde. Et de leur mort les crys, & les hauts gemissements, comme de personnes qui lamentent leurs parents trespassez, ouys par plusieurs fois à trauers l'air ont esté receus pour tesmoins: ainsi qu'aux nouuelles de la mort de ce grand Pan que les Payens interpretoient pour le fils de Mercure & de Penelope, & les Chrestiens pour le crucifiement du Verbe Diuin. Les Satyres donc ne peuuent estre sous les Cieux & n'estre point suiects à leur puissance, ils ne peuuent estre nez selon les communes loix de la nature, & s'exempter de la mort qu'elle ordonne à tout ce qu'elle faict naistre. Il est impossible que le corps des Satyres faict de nerfs & d'os, ainsi qu'ils ont esté veus maintefois, basti de terre & de fange, grossier & materiel, ne soit subiect à la corruption, & qu'e-

stant composé des quatre Elements,
il ne se resoluë aux mesmes Elements.
Les Payens ont bien creu l'immortalité de l'ame, mais pour le corps, bien
que leur doctrine fut en beaucoup
d'autres choses erronée, ils ne purent
se l'imaginer; Et ce que l'on conte de
la fin de Romulus & des autres, que les
peuples abusez disoient auoir esté
transportez en corps & en ame dans
les Cieux, estoit reputé pour fable par-
my les doctes de ce vieux temps. C'e-
stoit bien vn crime parmy eux de re-
prouuer la Diuinité des ames vertueu-
ses: mais d'enuoyer avec elles, des corps
pesants & terrestres pour s'immortali-
ser, ils le tenoient pour sottise, d'où
vient que Pindare dit :

*Tous corps doiuent mourir l'ame seule à
tousiours*

Vie, malgré la mort, eternise ses iours.

Quelle impertinence donc seroit-ce
à nous, qui sommes plus clairs voyans
en cette verité, de soutenir l'immor.

talité du corps des Satyres, veu mesme la monstrueuse difformité de toutes leurs parties ? Car cette ressemblance extérieure qu'ils ont avec le bouc, animal infect & tout corrompu, me semble vne preuue assez naturelle de la corruption de leurs corps. Mais sans chercher d'autres preuues de leur mort, que l'expérience, si les Satyres dont l'histoire faiét mention, sont de ceux que l'on veut dire estre hommes, il ne faut point douter qu'ils ne soient mortels, puisque l'on les a veu mourir, & les corps morts embaumez, portez de pays en autre pour les faire voir aux Princes & aux Roys, & qu'il s'est trouué, selon Pausanias, des sepulchres de Silenes & Satyres, chez les Hebrieux & Pergames.

Quant à l'immortalité partielle dont nous auons parlé, c'est à dire, par laquelle vne creature se rend immortelle selon quelqu'une de ses parties seulement, elle ne peut estre non plus

que l'autre, donnée à l'homme Satyre, pour des inconueniens d'une trop energique & sainte consideration. Car cette partie immortelle du Satyre (que nous nommerons, Ame, n'ayant point d'autre nom pour l'expliquer) par laquelle il surviuroit à la mort, ne pourroit trouver aucune retraicte en l'autre vie, & l'on ne pourroit par aucun discours vray-semblable rendre raison de son estat apres la separation du corps. Les Pythagoriciens estoient bien de cette opinion, que les ames, apres la mort, trouuoient dans la Metempsychose la peine ou la felicité de l'eternelle vie, en se reuestant de nouveaux corps parfaicts, ou imparfaicts, avec quelque conformité aux vertus ~~ou~~ aux vices qu'ils auoient exercez au monde. Orphee, Hesiode, & quelques autres, disoient que les ames des gens de bien estoient transformees en bons Anges, & celles des meschans en demons malicieux. Plutarque avec l'o-

pinion commune estimoit que les ames des vertueux, d'hommes deuenoient Saints, de Saints, demy-Dieux, & de demy-Dieux, apres qu'ils estoient parfaictement, comme és Sacrifices de purgation, nettoyez & deliurez de toute passibilité, Dieux entiers & parfaicts, receuant vne fin tres heureuse & tres-glorieuse: & que celles des meschans, apres la sentence des Iuges infernaux, estoient traistees par les furies, dans vn lieu de supplices pour estre eternellement tourmentees. Bref il n'y a iamais eu Philosophe, ny nation, qui n'ait laissé croire à son sentiment naturel, que quelque beatitude, ou quelque peine attend les hommes dans l'eternité de la seconde vie.

Mais que pourroit-on dire des ames des homes Satyres, lors qu'elles abandonneroient leurs membres monstrueux? que pourroient-elles deuenir? quels supplices pourroient-elles crain-

dre, & quelle gloire esperer? Car selon
la doctrine veritable de nos saincts
Liures, l'Enfer nyle Paradis ne feroiét
point pour elles. Quant aux tourmens
del'Enfer, ceux-là tant seulement ont
subiect de les redouter qui peuuent
pecher, & ceux-là tant seulement peu-
uent pecher qui sont de la race d'A-
dam: car en luy seul le peché eust nais-
sance, & par luy seulement il s'est glif-
fé parmy le genre humain. Dans les
reins d'Adam, dit vn glosaire de la Ge-
nese, tous les hommes ont peché, &
par vn seul homme, dit saint Paul,
voulant parler d'Adam, le vice & le
peché est entré dans le monde. Com-
ment donc les Satyres, qui ne feroient
point de la lignee d'Adam, pour-
roient-ils comme hommes, tomber
dans le peché? & participants à la faute
d'vn pere dont ils ne sont point fils,
meriter la mort comme coupables
d'vn crime qui ne feroit point venu
iufqu'à eux?

Et pour le regard de la gloire eternelle, elle est promise seulement à ceux que le Verbe diuin par son Incarnation en a rendu capables : & la posterité d'Adam seulement y est appelée. Le Messie est venu seulement pour rendre aux enfans d'Adam la gloire qu'ils auoient perduë par la faute de leur pere, & les Satyres, ny quelque autre creature que ce soit, ne se peuvent arroger aucune participation au merite de son humanité. Ce mystere requeroit qu'il se fist entierement semblable à l'homme qu'il vouloit rendre digne d'une eternité glorieuse : Le Verbe, dit saint Augustin, s'est reuestu de l'homme tout entier, & n'a rien pris, ne plus, ne moins que luy. Quoy que l'on vueille donc supposer de la nature humaine des Satyres, Iesus-Christ ne s'estant point couuert de leur humanité, ils ne pouroient pretendre leur part aux biens immortels qu'il est venu departir aux hommes :

il leur faudroit vn autre Iesus-Christ & vn autre Paradis.

Que si quelqu'un s'auisoit de dire que ces hommes estans impeccables de leur nature, ou demeurez en l'estat de leur innocence originelle, n'auroient pas eu besoing d'un Saluateur, ains seulement les enfans d'Adam. Nous respondrons que puisque les **Anges** qui ont esté creéz d'une substâce purement spirituelle, & dont la subtilité n'a iamais rien eu de commun avec la matiere de la terre, ont peché peu apres leur creation : eux dis-je, qui auoient esté creéz en grace, auparavant que d'y estre confermez, ont forfait contre leur Createur. Quelle impertinence seroit-ce de soustenir vne impeccabilité dans les Satyres? Et que leur ame ait peu se conferuer nette de vice, estant ioincte à vn corps, non seulement grossier & materiel, mais demy brutal, puisque toutes les passions, c'est à dire les vices, naissent de
la ter-

la terrestrité du corps, l'on sçait trop bien que les Satyres sont tousiours mis pour exemple & symbole parfaict d'yurognerie & de lasciueté. Et de fait, Polixene pour rendre visible en sa peinture l'un & l'autre de ces vices, les representa sous trois Satyres la taise à la main.

Reste à considerer la mortalité des Satyres. Quelques vns pour establir l'opinion que les Satyres sont hommes, pourroient dire, peut estre, (comme le Prince de la Mirande semble auoir entendu) qu'ils seroient mortels en tout leur estre, à l'exemple des autres animaux, mais qu'ayant la figure humaine, la parole distincte & articulée, & le discours interieur de la raison, ils constitueroient vne autre espee d'hommes, dont les Adamicques differeroient par la noblesse & immortalité de leur ame.

Ciceron disoit du Philosophe Epicure, qui rendoit les Dieux sans action

& nullement soigneux de l'Vniuers, que c'estoit admettre des Dieux en parolle, mais en effect, dire qu'il n'y en auoit point: Ainsi l'on pourroit dire de ceux qui confesseroient la totale mortalité de l'homme Satyre, que c'est en parolle luy donner la nature humaine, mais en effect luy oster entierement: Car quelque degré de perfection dont vne creature se puisse glorifier, quelque excellence qui la puissent rendre remarquable & admirable, quelque conformité qu'elle puisse auoir en apparence avec la noblesse de l'homme, si l'ame immortelle luy est desniee, il n'y faut plus chercher d'humanité, & le nom d'homme luy est moins conuenable qu'à vne statue.

L'homme est composé de deux parties toutes differentes de nature, d'origine, & de fin, le corps animal & d'une substance de corruption, né de la terre, s'en retourne à la terre, & l'Ame

toute celeste creée de Dieu retourne à Dieu. Or par ce corps l'homme ressemble aux bestes brutes, & toutes les actions & sentimens corporels, il les a communs avec elles, & pour cela porte-t'il le nom d'animal, d'autant que l'animalité, ou nature animale, qui consiste aux facultez de la vie sensitiue, est esgalement distribuee à l'homme & aux bestes brutes, iuques là mesme que toutes les parties de la vie sensitiue sont en vn degré bien plus eiminét aux bestes brutes qu'en l'homme, le Cerf peut viure huiët fois autât que l'homme, l'Aigle est si clair-voyant, dit Homere, que du Ciel il descouure vn lièvre caché dans l'espais d'un buisson, le Sanglier a l'ouye tres-subtile: & chacun des autres animaux a ie ne sçay quelle excellence dans les sentimens au dessus de l'homme. Les Anciens pour nous apprendre que l'homme est par le corps vne veritable beste brute, le representoient sous la fi-

gure d'un monstre, ou demy-homme & demy-cheval, ou demy-homme & demy chevre, voulant que l'ame y fut figuree par les parties humaines, & le corps par celles de la brute. Platon faict cette distinction par vn pourtraict d'autre sorte, il met nostre ame avec des aisles dans vn chariot traîné par deux cheuaux, representant les deux appetits qui nous sont cōmuns avec les brutes, l'ire & la concupiscence, & Ronfard faisant allusion à l'un & l'autre de ces symboles.

*L'homme est Centaure, en bas il est cheual,
Et homme en haut, d'en bas viét tout le mal,
Si la raison, qui est l'homme, ne guide
Cet animal, & ne luy tient la bride.*

Et peut estre que cette Sylla feinte au milieu des chiens aboyants, voudroit signifier encor cette mesme ame, situee dās les parties animales du corps, dont les dispositions naturelles à la brutalité, sont comme des chiens toufours aboyants à l'entour d'elle: mais

l'ame immortelle est tellement particuliere & incommunicable à toute autre creature, que par elle seule l'homme est faict homme. Platon dans les erreurs de son Paganisme, a bien recogneu & enseigné cette verité, quand il escript que l'ame differe tellement du corps, que nous ne sommes point ce que nous sommes, sinon par la vertu efficace de nostre ame, le corps n'estant qu'un ie ne sçay quoy imaginaire qui nous suit: D'où vient que Socrate, chez ce mesme Autheur, dit à Axiochus, qu'un corps mort n'est plus homme, d'autant que chacun de nous est seulement son ame immortelle renfermee dás le corps cõme dans vne laide & ennuyeuse prison. Et Plotin dauantage, que le corps n'est point partie de l'homme, ains seulement un outil & instrument, duquel l'ame, qui est le vray homme, se sert par un certain temps. Scipion l'Afriquain, disoit-il pas en songe à

son nepueu, qu'il ne falloit pas croire que l'homme fut ce que l'on en void à l'exterieur, mais que l'ame cachee au dedans: & qui apres de grands serui-ces rendus ~~en~~ son pays en ce monde, entroit au rang des demy-Dieux dans le Ciel, estoit l'homme seulement? Ainsi donc en l'ame seule consiste l'homme tout entier, hors laquelle tout ce qu'il possede est commun aux bestes brutes, n'ayant rien dans la sensibilité du corps qui ne soit brutal. De sorte que les Satyres estant priuez de cette partie celeste & diuine, en laquelle consiste toute l'essence de l'homme, & dont ^{en} est la forme, seroiét priuez aussi de tout ce qui faict l'homme, & toutes les actions de leur vie estants attachees à la matiere, & procedant d'un principe corporel & mortel, ils n'auroient rien de l'homme d'auantage que tous les autres animaux.

Mais pour venir à ces trois degrez d'excellence, la figure, la parolle, & la

ratiocination , par lesquelles nous
 auons dit que l'on pourroit soustenir
 que les Satyres sont hommes : outre
 que ce ne sont pas qualitez qui facent
 partie de l'essence de l'homme , elles
 ne sont pas si particulieres à la nature
 humaine que toutes les creatures qui
 en sont pourueuës doiuent constituer
 vne espece d'homme, qui merite seule-
 ment d'en porter le nom. Premiere-
 ment la figure humaine n'est qu'une
 apparence exterieure , Mitropauſtes
 respondit vn iour fort à propos à De-
 maratus, qui demandoit à Xerxes per-
 mission de porter en la ville de Sardis
 le chapeau Royal sur sa teste. Ce chap-
 peau que tu demâdes, ô Demaratus, ne
 couuriroit gueres de ceruelle, car enco-
 res que Iupiter te donnast sa foudre à
 porter en la main, tu ne serois pas Iupi-
 ter pour cela. De mesme les Satyres,
 pour porter cette ressemblance de
 l'homme au dehors, ne sont pas homes,
 & ce portraiçt humain ne couure rien

d'humain en leur nature. Voudroit-on dire que les statuës de bronze fussent hommes? Que les Synges, les Magots, les Cynocephales, & tant d'autres animaux qui ont vn si grád rapport à nostre corps, eussent quelque chose de l'homme. Les fantosmes qui prennent la figure humaine, ces vaines ressemblances d'homme qui paroissent soudainemēt dans les deserts de l'Afrique, & s'esuanouissent de mesme, & ces prodiges, qui sous l'apparēce d'hommes de feu estōnent à leur aspect toute la terre, font ils autant d'especes d'hommes pour ce qu'ils luy ressemblent.

La voix articulée est encor moins suffisante que la figure pour prouuer cette humanité: Car cette espee de Synges, animaux mortels, qui sont les vrais Satyres viuant, comme nous esperons monstrier cy-apres, ne parlent point: & maintenons que tous ceux que l'on remarque auoir parlé estoient demons. Mais quand ils auroient la

parolle distinctement formee, elle n'est pas de l'interieure nature de l'homme, non pas seulement vne propriété qui fluë de l'essence, ains seulement vn simple accident, qui suit les organes du corps, qui s'altere & se change, qui peut estre, & n'estre pas, sans aucun dommage, ny diminution de l'estre humain: autrement il faudroit que ceux qui ont perdu la parole, par vne ingratitude de nature, ou par vne rencontre infortunee, eussent perdu quelque chose de l'humanité, & qu'ils fussent moins hommes que les autres. Ces oyseaux qu'on void si naïfs imitateurs de la voix humaine, sont-ils pourtant hommes? Et l'Anesse de Balaam pour auoir discoursu si raisonnablement, estoit-elle autre que beste? Et que sçay- ie encore si les fables passant pour veritez, on ne s'imaginerait point le cheual d'Achille, qui luy annonça sa mort future, auoir esté homme?

Quant à la ratiocination des Satyres: ce n'est pas d'aujourd'huy que l'on a recogneu que les bestes brutes raisonnent en quelque façon: l'histoire des Elephans pleine d'actions raisonnables est digne d'admiration, les finesses du Renard semblent les effets d'un esprit prudent, & qui se demesle de diuerses consequences: Et quand apres auoir conté plusieurs tours de Synges, l'on vient à dire que l'on en a veu iouer aux eschez, il n'y a plus à douter qu'ils n'vsent de quelque discours interieur. Mais pourtant l'homme seul porte le nom d'animal raisonnable, pource qu'il est seul parfaitement raisonnable: & les autres animaux sont dits irraisonnables, pource que l'imperfection de leur nature leur desnie cette perfection. Le discours parfait de la raison est seul la forme & la difference qui fait l'homme, & toute autre ratiocination hors ce point

n'a plus rien d'humain : Celuy qui n'est que d'une lieuë esloigné de quelque ville, n'est pas dauantage dans la ville que celuy qui en est esloigné de vingt : & le milieu d'un cercle n'est que dans un poinct, tous les autres poincts, quoy qu'ils soient proches de celuy-cy, ne sont plus le milieu : Tout de mesme la seule raison parfaite fait l'homme, & en quelque degré qu'elle puisse approcher de la perfection dans une creature mortelle, elle est brutale, & n'est rien autre chose que l'apprehension d'un animal pourueu de facultez sensitiues : Autrement, si le Satyre ayant une ame mortelle, ne laissoit pas de cōstituer une espee d'animal raisonnable pource qu'il vse de la raison, quoy qu'imparfaite, il s'ensuiuroit necessairement que toutes les autres bestes brutes, pource qu'elles raisonnent, feroient autant d'espees d'animaux raisonnables, differentes seu-

lement, selon que leurs sens, plus ou moins subtils, leur permettroient de raisonner, plus ou moins parfaicte-ment : comme si le plus ou le moins suffisoit pour difference en la constitution des especes. Mais afin que l'on ne puisse admettre la perfection du discours interieur dans vne creature mortelle : cette raison seulement est parfaite, laquelle est spirituelle & independante de la matiere, tout ainsi que le principe & la cause dont elle procede. Or l'homme seul ioüit d'une telle perfection de discours, car à luy seul a esté donnee vne ame de substance incorporelle, dont les actions toutes libres ne tiennent rien de la restriction du corps, principalement le discours raisonnable, qui est vne action pure de l'intelligence, la plus noble faculté de cette forme. Mais en toutes les autres creatures dont la forme est mortelle, le discours de raison

procedant d'une ame toute de corruption, dependante entierement de la matiere en son estre, & dont les facultez ne se portent point au delà du corps, ne peut estre qu'une simple apprehension materielle, brutale & tres-imparfaite, qui naist & s'esteint dans leurs sentimens. Or tout ainsi que s'il n'y auoit point de Soleil, disoit Heraclitus, nous serions en une nuit perpetuelle nonobstant tous les autres Astres du Firmament: de mesme si l'on demeure d'accord que le Satyre soit priué de l'ame immortelle, & suruiuant au corps, il est impossible qu'il soit homme, c'est à dire animal parfaitement raisonnable, & toute autre excelléce ne sera point suffisante pour luy en faire meriter le nom: si ce n'est comme aux peintures, auxquelles on donne le nom des choses qu'elles representent. Encores ne scauroit-on, sans une irreuerence impie, donner à

vne creature toute mortelle & monstrueuse, le nom d'homme, nom si sainct & si venerable: Moysé deffend de donner aux Dieux estrangers les noms du Dieu viuant, & les Iuifs n'osoient escrire quinze par *Iod he*, dix & cinq, pource que le grand nom de Dieu, *Iehoua*, commence par ces deux lettres, ains mettoient *Theth van*, neuf & six. Pourrions nous souffrir ce nom d'homme, si sacré, diuin, & mystereux, estre commun à vne beste brute avec Dieu: Le Verbe Eternel n'a point eu d'autre nom plus agreable que le fils de l'homme, c'est le nom, que Dauid rauy d'esprit prophetique luy a donné: luy mesme dans l'Euan-gile se glorifie de ce nom, & quand nous voulons tesmoigner pleinement son amour & sa charitable humilité, nous chantons, Il s'est fait homme.

Parmy toutes ces raisons, encore ne puis-je oublier, si les Satyres estoient

hommes, vſans du diſcours de raiſon
ainſi que l'homme Adamicque, qu'ils
viuroient à ſon exemple vray-ſembla-
blement dans la ſocieté, & auroient
quelques citez pour demeures com-
munes: car c'eſt le principal effect de
la raiſon humaine, voire meſme la ſeu-
le fin pour laquelle Dieu a rendu les
hommes raiſonnables, auſſi Iuuenal:
*Le Createur commun de toute choſe nee,
A ſeulement la vie aux beſtes ordonnee
Dedans les ſens du corps: Mais les hom-
mes plus ſaincts,
Vne raiſon celeſte ont receu de ſes mains,
Raiſon qui dedaignant les foreſts plus
aagees,
A dans vn mur public leurs demeures ran-
gees,
Eſleuant des maiſons, dont les toietz habi-
tez,
Approchez & accreus, ont fondé des ci-
tez,
Où chacun des voiſins peut iuſtement at-
tendre*

Vn secours opportun, & de mesme le rendre,

D'une equitable main leuer les oppressez,

Par les armes venger ceux qui sont offen-

sez,

Assseuer le repos de celuy qui sommeille,

Et dormir en son liēt d'une seurté pareille.

Ceux qui se sont imaginez qu'ils estoient hommes, deuoient au moins nous auoir appris quelque chose de leurs beaux faiēts, leurs façons de viure, leurs loix, leur police, & quelle contree arreste ce peuple si particulier: Car il n'y a partie du monde que nous n'ayons visitée, il n'y a region, province, ny ville dont nous n'ayons vne exacte cognoissance, il n'y a fleuues, bois, deserts, ny rochers, dont les plus singulieres merueilles ne soient descouuertes, & pourtant rien de ces hommes pretendus. On ne liēt point que l'on ayt iamais veu de troupes de Satyres dont les actions ressentif-

sent

sent leur humanité, l'on n'a iamais peu
 recognoistre que ces peuples fussent
 sur la terre: Vray-semblances, qui peu-
 uent passer pour iustes raisons en cet-
 te matiere, & legitimes preuues pour
 asseurer, qu'il n'y a point d'homme
 Satyre, & qu'il ne peut y auoir au
 monde autre espece d'homme, que
 ceux qui descendent de ces premiers
 qu'il pleust à Dieu, dés l'origine du
 monde, creer à sa semblance, immor-
 tels & parfaitement raisonnables,

D



Liure II.

Des Satyres bestes brutes.



PRES auoir traité ce qui concernoit l'humanité supposée des Satyres, l'ordre du discours semble nous demander ce que nous estimons donc qu'ils peuvent estre, puis qu'ils ne sont point hommes: Car nous aurions en vain passé ce destroit, si estans près d'entrer dedans vne mer plus libre, nous retournions au port. Il y a bien maintes choses lesquelles il est beaucoup plus aysé de faire entendre en discourant ce qu'elles ne sont pas, qu'en voulant expliquer ce qu'elles sont, comme la matiere premiere, les formes substantielles des estres, & la nature de Dieu,

felon Denys l'Areopagite. Mais pour les Satyres nous esperons faire veoir ce qu'ils sont, avec autant de facilité, comme nous croyons auoir prouué ce qu'ils ne sont point.

Peu apres la mort de Iules Cesar, le peuple de Rome cherchât de tous costez ceux qui l'auoient assassiné, vn nommé Casca, craignant, non sans raison, d'estre pris pour vn autre Casca qui trempoit en cette malencontreuse conspiration, tout ainsi que Heluius Cinna auoit esté pris & tué pour Cinna l'vn des coniurez, fist proclamer à haute voix & afficher publiquement, de quelle famille il estoit, & qu'il se nommoit Caius Casca, & non pas Seruilius Casca : De mesme afin que l'on puisse reduire facilement tous les Satyres chacun en son espece, sans que la semblance du nom apporte obscurité ny confusion en la cognoissance que nous en recherchons, & les face prendre les vns pour les autres, il sem-

ble estre necessaire de traicter separément de leur nature, & monstrier clairement en quoy ils different.

Tous Satyres, pour en parler en general, doiuent estre reduits sous trois principaux chefs, & diuisez en trois especes. La premiere, est de ceux que l'on sçait estre animaux irraisonnables, de la nature des Synges. L'autre, de ces monstres d'abomination engendrez d'homme & de chevre. Et sous la derniere, doiuent estre compris tous les fantosmes reuestus de cette apparence, sous laquelle les Demons ont estonné tant de peuples, & esté adorez cōme Dieux par les Payens. Et de ces trois sortes de Satyres, Synges, Monstres, & Demons, nous auons à traicter en ce discours. Que s'il se rencontroit d'auanture, comme il se peut faire, quelques prodiges nez d'hommes & de femme, dont la figure reti-
raist en quelque chose sur le corps hideux de ces demy-boucquins, il n'y a

personne, ie croy, qui les voulust mettre au rang des Satyres, mais seulement de ces hommes monstrueux, lesquels bien qu'engendrez selon la reigle commune de leur espeece, sont pourtant desreiglez en la conformation de leurs membres. C'est pourquoy estant hors de mon subiet, nous en laisserós la recherche & le discours, à ceux qui doiuent cognoistre la nature de tels monstres, & decider ce que l'on en doit croire.

Entre toutes les bestes brutes, il n'y en a point qui portent en leurs corps vne plus viue image de la figure humaine, ny en leurs actions vne plus naïfue imitation des animaux raisonnables, que les Synges: Et entre toutes les diuerfes espees de Synges, il n'y en a point qui approche la nature humaine de plus prés, ny qui soyent plus hommes, que ceux que l'on nomme Satyres. Aussi Galien, auquel il semble que la nature se soit descou-

uerste, commande à ceux qui veulent s'instruire en la cognoissance des parties de l'homme sur vn autre subiet que le corps humain, de faire la dissection d'un Synge, d'un Cynocephale, ou d'un Satyre. Or ceux là qui n'ont veu ces Satyres que de loin, & qui ont negligé de les regarder plus curieusement des yeux, ou contempler plus attentiuement de l'esprit, s'arrestant à la forme exterieure, ont bien osé dire qu'ils estoient hommes. Mais pour lever tout scrupule & donner vne entiere & facile cognoissance de ces bestes, il les faut despeindre selon toutes les particularitez que la curiosité nous a peu faire veoir chez les Naturalistes. Albert le Grand sera le flambeau qui nous esclairera le premier à l'entree de ce chemin. Le Velu, dit-il, (car ainsi nommet-il ces Satyres en plusieurs endroits) est vn animal du genre des Synges, mais fort monstrueux. Il est demy homme & demy chevre, a le front ar-

mé de cornes, se tient & va quelques-
 fois debout, & quitte facilement sa
 fierté brutale, & dit-on que ces Synges
 habitent dans les deserts d'Æthyopie.
 Ce n'est pas qu'il ne s'é trouue ailleurs:
 car ce mesme Autheur recite que l'on
 en prit autrefois deux, vn masle & vne
 femelle, dans les forests de Saxe (ou se-
 lon quelques vns d'Esclauonie) dõt la
 femelle fut tuee par les armes des
 chasseurs & les dents des chiens, & le
 masle pris vif: depuis ce Satyre estât ap-
 priuoisé, on fit en forte qu'il s'accoutu-
 ma à marcher sur les deux pieds de der-
 riere seulement, & à proferer quelques
 paroles, encore fort imparfaictement
 & tres-mal distingues: & remarque
 cet Autheur que lors qu'il entroit en
 chaleur, il estoit eschauffé d'une rage
 d'amour si excessiue enuers les fêmes,
 qu'il s'efforça mesme publiquement
 d'en violer quelques vnes. Ælian ne
 donne aucun nom à ces Satyres, mais
 seulement escrit, que dans les monta-

gnes des Indes vers Corude, il y a de certaines bestes toutes velues fort semblables aux Faunes & Satyres, & qui portent de grosses queuës, à peu près comme celle d'un cheual : elles font ordinairement leur repaire dans les antres & aux endroits plus touffus des forests, dont elles ne sortent point sinon lors qu'elles se sentent poursuivies des chasseurs. Car aussi tost elles courent habilement au haut des montagnes, d'où elles poussent tant de pierres & si grosses cõtre les chasseurs, qu'il en demeure quelquesfois aucuns morts ou blessez sur la place, & tres-malaisément peuvent estre prises, sinon lors que les maladies les fõt trouver seules en quelque coing du bois, ou qu'estant pleines, la pesanteur de leur ventre retarde la viresse de leur course. Outre ces deux incommoditez qui font tomber ces animaux entre les mains des chasseurs, Pline adjouste encore la vieillesse, quãd il escrit,

Qu'au pais des Cartadules dans les môtagnes des Indes, il y a des Satyres qui sont des bestes de figure humaine, courant ores debout, & ores à quatre pieds, que l'on ne peut attraper sinon vieilles ou malades, tant elles fuyent legerement : où ce Naturaliste est plus Philosophe, & à mieux rencontré, que lors qu'il s'est amusé à dire, que les Ægyptans sont des peuples habitans sur la riuë du Nil. Ce qui nous doit faire croire que le Silene qui fut pris en Phrygie par le Roy Midas allant à la chasse, estoit vn de ces Synges Satyres, que la vieillesse debile & tardiuë fit tomber entre les mains des chasseurs: Car Silene, comme nous apprenons de Pausanias, ne signifie rien qu'vn vieil Satyre. Mais tout ainsi que Melanthius interrogé de ce qui luy sembloit de la Comedie de Dionysius, respondit, qu'il ne l'auoit peu voir, tant elle estoit offusquee de langage: De mesme pouuons nous dire

que les Fables ont si bien couuert ce Silene, tellement desguisé sa nature, & conté tant de merueilles, qu'il s'est rendu mescognoissable à la posterité. Et quant aux Synges de Paulus Venetus, ressemblant entierement à l'homme, qui se trouuent en la Prouince de Comare, il n'y a point de doute qu'ils sont du nombre de ces animaux d'Ælian, & de ces Satyres de Pline, quel vn & l'autre met dans les montagnes des Indes: Car Comare est vne region des Indes toute pleine de forests, d'où l'on peut cognoistre, comme Strabon s'est mespris, d'auoir accusé de mensonge & d'ineptie Dimachus & Megastenes, pour auoir dit, qu'aux Indes, il y a des Pans qui ont la teste pointuë & faicte en façon de coing: estant facile de iuger, que ces Historiens vouloient entendre les Synges Satyres, qui se trouuent ordinairement en ce pays, & par la forme de leur teste signifier qu'ils sont cornus: Car les mots de corne,

pointe, & coing, sont æquiuoques. Et
 de faict par ce qu'aucuns des anciens
 ont estimé que Pan auoit iadis esté vn
 Capitaine qui le premier trouua la dis-
 position des armées en pointe gauche,
 & pointe droicte, quel'on nôme cor-
 nes & coins, on dit qu'ils dōnerent au
 Dieu Pá en ses Statuës deux cornes sur
 le front. Les pays froids aussi bien que
 l'Inde, & l'Æthiopie, nourrisét de ces
 animaux, comme le tesmoigne claire-
 ment Herodote, lors qu'il conte que
 dans les montagnes de Scythie vers les
 Ægryppæes, habitent des hommes de-
 my-boucs, ou chevre-pieds: faisant à
 sa mode vn peuple de ces Synges de-
 my hommes & demy-chevres, ainsi
 qu'il a faict des Cynocephales, qui
 sont d'autres Synges ayant vne teste
 de chien. Du nom de ces Synges fu-
 rent autresfois nommees les Isles Sa-
 tyrides, si nous voulons croire ce que
 Pausanias nous en a laissé, au rapport
 d'vn Euphemus Carien. Cet Euphe-

mus luy conta, que nauigeant avec bonne trouppes en Italie, la tempeste les porta en certaines Isles nommees Satyrides, où si tost qu'ils furent abordez accoururent sur le riuage des monstres qui y habitent, tous couverts d'un poil roux, & traïsnans des queuës non moindres que celles d'un cheual, lesquels sans proferer aucune parolle, se iettoïent à corps perdu sur les femmes d'une fureur d'amour si enragée, que pour se deliurer d'une telle violence, ils furent contraints de mettre à l'abandon au milieu de ces monstres, une femme estrangere qu'ils auoient dans le vaisseau, & se retirer en haute mer. A quoy nous adiousterons seulement que les Synges Satyres, ainsi mesme que Nicephore nous l'enseigne, ont la face d'une couleur fort rouge, & les membres souples & subtils à se mouuoir diuersement.

Or de cette sorte de Satyres, à mon aduis, estoient ceux que Philippes Ar-

chiduc emmena à Gennes en l'an
M. D. XLVIII. dont l'un estoit desia
vieil, & l'autre encore tout ieune : les-
quels il voulust faire voir parmy les au-
tres magnificences qui accompagne-
rent son entree en cette ville, estimant
que la figure monstrueuse, & la rareté
de ces animaux n'apporteroit pas
moins d'ornement à cette pompe, que
d'estonnement à tout le peuple. Entre
ces mesmes animaux l'on doit com-
prendre ce Satyre que S. Hierosme es-
crit auoit esté porté vif iusques dedans
Alexandrie, où il seruit par vn long
temps de spectacle à tout le peuple, &
depuis estant mort & embaumé,
porté à Antioche vers l'Empereur
Constantin : Albert aussi le met au
nombre de ces Synges qu'il appelle
les velus. Et n'en desplaist à quelques
modernes, qui nous ont voulu faire ac-
croire que ce Satyre fut celuy mesme
qui se fit voir & parla à saint Antoine
dans les deserts de la Thebaïde, le-

texte de S. Hierosime nous apprend tout le contraire, & l'ordre seul des temps rend cet abus trop manifeste. Car Constantin le grand, sous lequel le corps de ce Satyre fut porté mort & embaumé en la ville d'Antioche, estoit decedé dès l'an trois cens trente sept. Et cet autre Satyre, que nous monstres cy-apres auoir esté vn Demon, ne parut à saint Antoine qu'en l'an trois cens quarante-trois, sous les Emperours Constans & Constantius.

Ce que nous lisons dans Nicephore de cet animal furieux demy-chevre & demy-Synge, qu'il nomme Pan, enuoyé par le Roy des Indes à Constantius, a bien de la conformité avec l'histoire de ce Synge Satyre de saint Hierosime, si dauanture ce n'est la mesme chose. Car l'un & l'autre fut long temps gardé vif, & puis estant mort, embaumé, afin qu'il fut veu de l'Empereur. Mais Nicephore se trouuant non seulement contraire au nom de

l'Empereur, ains faisant ce Pan different d'espece, de forme, & de nature, des Synges Satyres, il est à croire, ou qu'il s'est abusé, ou que ce Pan estoit autre que le Satyre de saint Hierosme, & que ces deux recits sont deux histoires differentes. Ce quel'on confirmeroit par deux fortes raisons, l'une tiree de la description de ce Pan: car il luy faict les parties superieures semblables à la chevre, & non pas à l'homme comme le Satyre, & l'autre de la ferocité qui obligeoit à le tenir enfermé. Car les Satyres ne sont pas si furieux, ains au contraire nous assurons avec Pline, qu'autant comme les Cynocephales sont farouches & sauvages, autant les Satyres sont de nature douce & traitable. Mais quoy qu'on vueille dire en cette occasion, on iugera tousiours que Nicephore n'a pas bien rencontré d'auoir adiousté en ce mesme lieu, que de ce Pan les anciens Grecs en firent le Dieu tutelaire des Pastres

& troupeaux, comme des Synges, Satyres, les Faunes, & Syluains: Car le Dieu Pan & les Faunes, n'estoient en rien differents, n'ayant point esté formez sur diuers exemples, & est tres-faux que ce Dieu fut depeinct demy-chevre & demy Synge, tel que ce Pan de Nicephore, ains demy-homme & demy-cheure, tout ainsi que les autres Satyres: Et au cõtraire est tres-vray que la couleur rouge dont cet Historien enlumine la face du Satyre seulement, estoit aussi commune au Dieu Pan: Ainsi Virgile,

*Le Dieu Pan s'y trouua, dont nous vismes
le teint*

*Sanglant d'un jus d'hyeble, & de cinabre
peinct.*

On vit jadis vn de ces Satyres dãs l'Arcadie, qui tourmentoit fort les pastres de la Prouince, & prenoit plaisir, par vne malice de Synge, de destourner le bestail, & le faire esgarer dans les bois d'alentour: Des violences & importunitez

runitez duquel, Argus Polyoptes de-
 liura le pays, l'ayant mis à mort. De-
 puis l'on en prit encore vn autre dans
 vn parc sacré aux Nymphes près la vil-
 le d'Apollonie, qui fut trouué dormât
 & mené deuant Sylla : aucuns pour-
 tant, contre toute raison, ont estimé
 qu'il estoit vn de ces hommes suppo-
 sez & imaginaires, & d'autres, sans au-
 cune apparence, l'ont mis au nombre
 des Satyres Demons. Mais en l'hi-
 stoire on ne voit point qu'il ait dit, ou
 faiët chose aucune approchant des ap-
 paritions des fantosmes : au contraire
 Sylla l'ayant fait interroger par ses tru-
 chemens en toutes langues, il ne respô-
 dit iamais rien que l'on peust entendre,
 ains ietta seulemēt vne voix aspre, mes-
 lee du hannissement du cheual, & du
 beuglement du bouc : dont l'on peut
 aisement cognoistre qu'il estoit vne
 de ces bestes brutes de l'espece des Syn-
 ges Satyres, qui tiennent de l'vn & de
 l'autre de ces animaux.

Ces Satyres qu'Oſiris, qui eſt le meſme que Bacchus, menoit avec luy dans ſes armées, eſtoient-ils autre choſe que de ces Synges? Diodore eſcrit qu'ils eſtoient velus, & furent aimez de ce Prince, parce qu'ils eſtoient plaiſants en leurs ricanneries & agilitéz bouffonneſques, dont meſme les Indiens, comme dit Lucian, prirent ſubieſt de le meſpriſer: & de leur nature les Satyres, à la façon des autres Synges, ſont ainſi bouffons. Auſſi liſons nous dans Solinus qu'ils ſont fort plaiſants à veoir, ne pouuant s'arreſter en place ſans ſe mouuoir, & faire touſiours quelques ſoubrefaults & gaillardes geſticulations. C'eſt pourquoy nous voyons aujourd'huy que les grands Seigneurs ont de couſtume de faire traîner à leur ſuite de pareils animaux. Ce qui n'eſtoit pas moins ordinaire parmy les Princes de l'antiquité, ainſi qu'il eſt notoire par l'exemple de Salomon, qui ſ'en faiſoit apporter de Thar-

sis, de trois ans, en trois ans. Et les Cercopes que Plutarque escrit auoir esté les flatteurs d'Hercule, comme les Satyres de Bacchus, si l'on regarde seulement le nom, estoient des Synges communs, dont il prenoit son passe-temps comme Bacchus des Synges Satyres, & que les Fables par allegorie ont dit auoir esté hommes comme les Satyres demy-Dieux.

Les Satyres donc pour en tirer le pourtrait racourcy, sont animaux irraisonnables du genre des Synges, tous velus & couverts d'un grand poil de couleur rouxastre, dont mesme ils ont esté nommez les velus. Ils ont les parties superieures, la teste, les mains, & le corps, semblables à celles de l'homme, avec quelque legere difference seulement: Car ils ont la face rouge, & des cornes aux deux costez du front: & les parties inferieures depuis l'estomach, ils les tiennent de la chevre, excepté seulement la queue, qui de forme &

de grosseur ressemble à celle d'un che-
ual. Ils marchent quelquefois debout
comme l'homme, & le plus souuent à
quatre pieds comme les autres brutes.
Ils sont fort vistes & legers à la course,
& leurs membres souples & disposés
pour faire gaillardement plusieurs
soubresauts & gesticulations: Et bien
qu'ils soient lascifs enragement, au
temps que le naturel desir d'engen-
drer les espoince, ils sont pour-
tant de nature douce & facile à appri-
uifier. Leur retraite est tousiours dans
les deserts aux creux obscurs des antres,
ou dans les plus profonds recoins des
espaisses forests. Et quant à la voix arti-
culee que quelques vns ont voulu dire
estre aussi familiere aux Satyres qu'aux
hommes, cela ne se trouue point en
ces animaux; car de leur nature ils ne
parlent point, iettant seulement vne
voix aspre, entre-meslee du hannisse-
ment d'un cheual & du beuglement
d'un bouc. Il est bien vray qu'ils ont

cela par dessus les autres Synges, qu'avec vne grâde peine & vn long temps, on peut leur apprendre deux ou trois parolles, encore ne les peuuent ils proposer si intelligiblement que les oyseaux qui sçauent parler; ains les confondent sans se pouuoir faire entendre, à la façon des petits enfans qui commencent à jargonner.

Voilà quelle est la forme & la nature de ces Synges, dont le nom de Satyre estonne plus que tout le reste, à cause de ces Dieux champestres que les Payens ont ainsi nommez. Mais par l'etymologie du mot de Satyre, il est aisé de recognoistre que ce nom a esté donné premierement à ces animaux avec iuste raison selon leur nature, & depuis par comparaison à toutes les autres choses qui leur ressembloient: Car ce mot de Satyre est deriué, selon quelques vns, du nom Grec, qui signifie la partie qui faict l'homme, estant donné à ces Synges pour denoter leur

lasciueté prodigieuse, ou Sylenez du verbe Grec, qui signifie, grincer les dents: Car soit qu'ils facent mine, ou derire, ou de gronder, ils retirent les levres en haut & en bas, laissant leurs dents & leurs genciues toutes descouvertes.

Or pour remanier en passant la principale question de tout ce discours, il n'y a personne si peu versé en la cognoissance de soy-mesme, qui voulust dire que ces Satyres fussent des hommes, ny si peu raisonnable que d'en faire des animaux raisonnables. Car il est trop clairement hors de doute que ce sont veritables bestes brutes, qui vivent dans les lieux desertez à l'esgal des autres, selon les simples mouuements que la nature leur donne, sans autre raison que les sensibilitéz, & cet instinct naturel commun à tous les animaux irraisonnables. Et sans perdre le temps à la preue d'une chose trop manifeste, nous determineròs de tous

ces Satyres , ce qu'Albert le Grand
 escrit de celuy-là qui fut pris dans les
 forests d'Esclauonie , qu'ils n'vsent
 d'aucun discours de raison , n'ayant
 rien d'humain , comme dit Mela , que
 ie ne sçay quelle apparence exteriere,
 encore toute diuersifiee de monstro-
 sitez.





Liure III.

*Des Satyres monstres, & qu'ils
ne sont point hommes.*



IL est vray que cest Ora-
teur Romain Antonius
Iulianus, fut loué de ce
que ayant à discourir sur
le subiect de quelques
secrets mysteres d'amour, il se couurit
la face d'un voile. Que dois-ie atten-
dre en cette rencontre, en laquelle ie
n'ay pas à traicter d'une passion que la
nature ait renduë licite, mais des ef-
fects monstrueux des sacrileges com-
mis contre les sainctes Loix? Deurois-
ie pas non seulement me couvrir le vi-
sage, mais chercher des tenebres plus
que Cimmeriennes pour me cacher
tout entier, ou bien sacrifier moy-

mesme en cet endroit ma main & ma plume au sage Harpocrates? Mais puis que le subiect entrepris ne me permet pas d'enfermer dedans le silence vne partie si importante, ie m'efforceray de couvrir si discrettement sous l'ombrage d'un style resserré, les difformitez de ce passage, & le rendre si innocent, que les ames mesme plus religieuses y trouueront autât de satisfaction, que le discours en est nouueau, & l'intelligence necessaire.

Encor que la nature, c'est à dire, Dieu, à la creation de toutes les causes, leur ait donné des inclinations certaines & reglees, au mouuement desquelles elles produisent des effects cōformes à leur estre, & que toutes les parties de l'Vniuers agissent les vnes parmy les autres, sans troubler leurs operations, ny entreprendre de faire ce à quoy elles ne sont pas ordonnées. Il est arriué pourtât maintefois, que les agens naturels, transgressant cette loy

generalle, se sont desreglez du cours ordinaire de leurs actions; & sortant hors l'estat de leur nature, engendré des choses malgré leurs propres dispositions, & contraires à l'estat de leur nature: ce que nous appellons prodiges. Ainsi les Cieux ne pouuant recevoir aucune generation en eux mesmes, selon la Philosophie commune, à cause de leur perfection, ont faict naistre au milieu d'eux des comettes, comme les Mathematiciés nous font croire, mesme de ceux qui dans ces derniers lustres ont esté l'effroy de toute l'Europe. Le Soleil qui pour estre vni-que est l'image de la Diuinité, s'est monstré double, voire triple quelque fois. La Lune a quitté sa place pour heurter vne autre Lune, & les Estoiles ont semblé s'arracher du Firmament pour tomber icy bas. Les Elements aussi bien que les cieux ont obey à la violence de ce desordre: L'air a faict voir des Iris ensanglantées, & faict

pleuvoir des pierres & du sang. Les mers se sont entr'ouuertes, le feu a perdu sa chaleur, & la terre sa fermeté. Bref, il n'y a pas vne cause du monde, laquelle, ou d'elle mesme se contrariant à soy-mesme, ou forcee d'une puissance superieure, n'ait souffert quelque diuertissement en ses actions ordinaires. La nature des creatures vivantes non plus que le reste, ne se voit pas exempte de ces desreglements. Car bien que Dieu ait mis aux sentimens de tous les animaux, & versé dans l'interieur de leur estre, des propensions certaines & arrestees de se joindre chacun à son semblable, afin de perpetuer son espece, & la rendre tousiours esgalle à elle mesme. Toutefois on voit assez souuent deux animaux de diuerse espece, sortant des termes qui leur sont prescrits, donner naissance à des bestes qui tenant de l'un & de l'autre, ne ressemblent ny à l'un ny à l'autre, & demeurent inhabiles à tou-

te generation : & cela s'appelle monstres. Moyse ce grand Prophete & Legiflateur, auquel Dieu descouvrit les plus secretes Iustices de ses volontez, par Loy expresse deffendit aux Iuifs de se rendre ministres de tels messâges irreguliers : comme estant chose contraire à tout deuoir raisonnable, de faire fouruoyer la nature des voyes que Dieu mesme luy a tracé^{es} & commandé de suiure.

Ana fut celuy qui trouua le premier l'inuention d'auoir des mulets : ou la traduction commune porte, *Les eaux chaudes*, l'Hebraïque met, *Les mulets*, & la paraphrase, *Les forts*, à cause de la force des mulets. Action certes digne d'Ana seul & de son origine : Car estât né de l'incestueux embrassement de Sebeon & de sa mere, il eust raison de rechercher les moyens de rendre toute la nature incestueuse, pour couvrir l'opprobre de sa naissance. Encor sembleroit-il que ces actions desreiglees se-

roient peu condamnables, voire nullement considerables dans les bestes brutes, dont la vie & les œuures sont indifferents au vice & à la vertu. Mais en l'homme, qui par la raison vsurpe l'empire du monde, & s'esgalle à Dieu, y voir vn si detestable esgarement de nature & d'esprit, cela semble non seulement hors de vray-semblance, mais vn sacrilege à l'imaginer. Il est neantmoins aussi certain qu'incroyable qu'il s'en est trouué, dont les desirs ont esté si desordonnez, l'humanité si brutale, & la raison si desraisonnee, que de rechercher l'assouissement de leurs appetits enragez hors les inclinations naturelles de leur espee: & qui ont donné par ce moyen la naissance à des creatures abominables, l'horreur du Ciel, l'effroy de la terre, & qui portant en leur corps la figure humaine meslee avec la brutalle, decelent par vn iuste iugement de Dieu la honte & l'infamie de leurs parens. C'est ce

qu'ont voulu signifier les ingenieux inuenteurs de Fables, qui disent qu'en la guerre des Geans contre les Dieux, pendant que la Lune fut desuoyee de son mouuement ordinaire, & qu'elle se leua d'autre costé que dont elle auoit accoustumé, nasquirent des monstres, & force animaux d'estrange figure, icy bas. Ayant voulu sous ce desuoyement de la Lune, comprendre les desirs forcenez & les fureurs d'amour contraires au cours ordinaire de la nature: car la Lune n'est autre que la Deesse Venus. Aussi les *Ægyptiens* l'inuoquoient en leurs amourettes, & *Isis*, qui est la mesme Lune, preside, comme disoit *Eudoxus*, & gouuerne les amours.

Qui ne sçait l'origine de ce Minotaure, plus honteux aux *Cretois*, que dommageable aux *Atheniens*? Et que ne presumera-t'on point des prodigieux accouchements d'*Alcippe* & *Glaucippe*? Ce monstre demy-hom-

me & demy-chien, ne donna pas moins d'effroy à toute l'Italie, sous Pie V. que ce chien adultere d'estonnement aux Iuges Romains, & cet Hyppocentaure nouveau-né, d'admiration aux Philosophes de Grece chez Periander. De cette sorte de monstres sont les Satyres, que nous comprenons sous la deuxiesme espee, dont les membres diuersifiez de deux natures, sont indices trop certains de leur origine. Le Cheurier Crathin, de qui la mort ne fut pas seulement l'effect d'une nouvelle ialousie, ains le tesmoignage d'un celeste courroux, fut pere d'un Satyre monstre, demy-homme & demy-chevre, que les habitans du pays mirent au nombre des Dieux, & adorerent sous le nom de Syluain, ou Napæe. Tel sans doute fut ce Dieu Pan dont Penelope accoucha, mettant son honneur à l'ombre du desguisement en bouc d'un Mercure suppose: à l'exemple de Philire, qui cacha l'infame nais-

fance de Chyron, fous la figure che-
ualine de Saturne, & encore d'Ixion,
qui fit croire que les Centaures furent
engendrez dans les nuës, & non pas
dans les haras de Magnesie. Et s'il est
permis de philosopher sur l'histoire, il
faut dire que Valerie qui se precipita
pour l'horreur de son crime, ayma
mieux confesser vn inceste avec son
pere, que d'auoüer vne impieté moins
humaine & naturelle, qui la fit accou-
cher d'un enfant, que les Latins nom-
merent Syluain, (du mesme nom que
le fils de ce Cheurier Crathin) & les
Grecs Ægypan : Car de ces nopces
ainsi prodigieuses & desnaturees, dit
Plutarque, sont procedez les Ægy-
pans. La prodigieuse salacité des boucs
de Mendes, rapportee par Pindare &
Herodote, qui les a faict prendre à
quelques vns pour incubes, & la vie
solitaire de la plus part des habitans de
ce pays, qui sont presque tous Che-
vriers, ont peu vray-semblablement
mettre

mettre au iour plusieurs de ces Satyres monstrueux: Et Virgile semble auoir voulu toucher en passant la generation de ces monstres demy-hommes & demy-chevres, quand il chante des forests où Euander auoit basti sa ville,

*Les Satyres iadis habitoient ces deserts,
Naturels citoyens de ce pays sauvage,
Parmy des hommes nez des chesnes en-
trouuerts,*

*Qui de l'honnesteté ne sçauoient point
l'vsage.*

Comme s'il vouloit dire, que la raison grossiere & brutale des Pastres qui frequentoient ces lieux deserts, ne pouuant resister à la fureur desordonnee qui les agitoit, les rendoit peres de ces Satyres, dont on en voyoit quelques vns seulement viure parmy eux. Je dis quelques vns seulement, car de penser qu'il y puisse auoir des peuples entiers & grand nombre de ces Satyres monstrueux, il seroit ridicule; parce qu'e-

stant Hybrides, c'est à dire, nez d'animaux de deux especes differentes, ils sont du tout incapables d'engendrer, & estouffent leur race en eux mesme, sans pouuoir renouueller aucun estre ressemblant tant soit peu à ceux dont ils ont pris naissance. Alexádre Aphrodisee demandant pourquoy les mules n'engendrent point, tranche tout court, que c'est à cause qu'elles sont nees d'animaux de diuerses especes. La raison est, que par la confusion de ces deux natures qui sont diuerses d'habitudes & de qualitez, il se faict vn troisieme estre, lequel n'estant ny l'un, ny l'autre, destruiet en sa generation toutes les facultez productiues de l'un & de l'autre: comme nous voyons au melleage du blanc & du noir; naistre par la totale corruption de ces deux principes, vne couleur brune, laquelle ne scauroit plus estre ny l'une ny l'autre. L'on dira, peut-estre, de ces Satyres demy-hommes & demy-che-

ures, & de ces autres monstres ou l'hu-
 manité n'est point confuse, ains ioin-
 cte seulement à la brutalité, que les
 deux especes ne s'estant point mēlan-
 gées comme aux mulets, aux Leoparts,
 & autres tels animaux Hybrides, les
 dispositions naturelles nécessaires à
 l'entretien des especes, se feroient con-
 seruees entieres aux vnes & aux autres
 parties de ces corps monstrueux : Mais
 pourtant il ne s'ensuiuroit pas que ces
 Satyres fussent capables d'engendrer.
 Car la matiere dont se faiēt l'animal
 decoulant des parties superieures qui
 sont humaines, apporteroit avec elle
 des habitudes & qualitez propres à la
 generation de l'homme : & venant à
 tomber pour se cuire dans les inferieu-
 res, qui sont de bouc, & disposees à au-
 tre effect, elle perdrait telles qualitez
 humaines en cette preparation, & se-
 roit renduë incapable de toute action.
 Et d'ailleurs les habitudes de ces par-
 ties inferieures enclines à la produ-

ction d'un bouc , trauaillant sur vne matiere ingrate & repugnante à leurs operations, se destruiroient elles mesmes sans rien effectuer. Ainsi, bien que les habilitéz productiues , qui sont dans les deux diuerses natures de ces Satyres, ne fussent point corrópuës en la matiere dont ils sont engédrez, elles s'ancantiroient tousiours en celle qui leur feroit necessaire pour engendrer.

Les Iuifs poussez d'une iuste, & sainte apprehension de veoir naistre de ces monstres , decernerent peine de mort contre l'un & l'autre de leurs parents , ce qui s'observe encore aujourd'huy. Et les Payens émeus d'un pieux estonnement quand ils naissoient , apres certains sacrifices de propitiation les enterroient vifs , ou les precipitoient dans les ondes expiatoires de la mer. Mais s'estant la Religion Chrestienne accreuë, & telles ceremonies peu à peu intermises, & en fin abolies , les Historiens , comme

escriit Ammian, ont negligé depuis de faire mention des monstres qu'ils ont veu naistre.

Or ces Satyres bien qu'abominables en leur origine, & si estranges en la conformation de leur nature, nous obligent pourtant à disputer leur humanité: non pas sçauoir s'ils font vne espece d'homme differente des Adamicques: Car nous auons suffisamment discouru qu'il n'y en peut auoir: mais simplement s'ils sont hommes (bien qu'ils soient nez en partie de la semence d'Adam) c'est à dire, si tels monstres demy-bouquins peuuent auoir vne ame spirituelle & immortelle pareille à celle des vrayes hommes entiers & parfaicts. Question peut-estre qui semblera grande à quelques vns, mais à mon aduis tres-facile à resoudre. Il est bien vray que d'abord les trois parties principales de leur vie qui n'ont rien que d'humain, semblent tesmoigner l'immortalité de la forme

qui les anime ; Et cela seroit bien considerable si l'ame immortelle, à l'exemple des autres formes naturelles se tiroit de la puissance de la matiere, quand les dispositions y sont introduites. Mais venant d'ailleurs, & tombant des mains de Dieu dans vn corps propre à la receuoir, cette preuue tiree des principes materiels d'une vie simplement naturelle, est trop foible en cette occasion : veu mesmement les puissantes raisons qu'il est facile d'opposer à l'encontre. Pour faciliter donc la certitude de cette verité, nous en establirons le discours sur cette diuision, que le subiect semble requerir de luy-mesme : ou l'ame immortelle du Satyre monstre se conioignant à son tout, informeroit les parties de son corps qui sont mesme engendrees de la beste brute, ou seulement celles qui procedent de l'homme : Et ayant montré clairement que l'un & l'autre est impossible, & non moins repugnant à la

Religion, que contraire à la nature, il sera necessaire de conclurre que ces monstres n'ayant rien plus que la vie & les sentimens, sont totalement subjects à la mort.

Quant au premier membre de nostre diuision, ce n'est pas seulement vne maxime de Philosophie, que les formes naturelles ne peuuent donner l'estre à autres matieres qu'à celles qui leur sont iustement proportionnees & qu'une mutuelle conuenance rend propres à cette information: ains vne reigle certaine & constante dont la nature ne se desuoye iamais. Or dans ces Satyres, les parties de leur corps engendrées de la chevre ne peuuent auoir aucune proportion à l'ame spirituelle, & quelques dispositions qui s'y puissent introduire, elles ne peuuent estre viuifiées que d'une ame brutale & mortelle; D'autant qu'il ne se peut faire qu'une matiere recoiue l'estre d'une forme differente d'espece de celle à la-

quelle elle est conuenable. Aux bestes brutes dès lors que la matiere est preparee à la vie, il en sort naturellement vne ame qui l'informe aussi tost, & à laquelle seulement elle est proportionnee. Mais en l'homme le corps estant formé de toutes ses parties, attend quelque chose de plus grand qu'un principe de sensibilité, & reçoit un esprit, à l'information duquel il a seul vne legitime conuenance. Aussi Dieu crea le corps & l'ame des bestes brutes en un mesme instant, pour nous monstrier que par tout où est leur corps, là est leur ame sensitiue. Mais pour creer l'homme, il en prepara la matiere & en ordonna les membres, puis y versa le souffle de vie, cet esprit qui nous faict mouuoir; afin que nous peussions cognoistre que cette parcelle de la Diuinité, l'ame immortelle, n'a rié de commun avec le corps des bestes, & qu'elle fera seulement infuse dans ceux, lesquels estâs nez de la mesme terre, dont

il fit le premier homme, seront informez dessus le mesme modelle. Il me souuient icy de Xenophon quand il dit que le bon mesnager a chez soy vn lieu propre pour les vtenfiles destineez à l'usage des sacrifices, & vn autre pour la vaisselle de table: qu'ailleurs sont les instruments de la guerre, & ailleurs les outils du labourage, sans qu'il les confonde iamais, & en transporte aucun hors du lieu qui luy est ordonné. La nature guidée de la main de Dieu en faict presque de mesme, elle a diuerses matieres, qui sont cōme les lieux propres à diuerses formes; en celle-cy elle a de coustume d'y en mettre aucunes, & en celles-là d'autres, sans que iamais elle en trouble l'ordre, & transfere vne forme dans vne matiere qui n'est pas destinee pour la receuoir. Il est impossible que dans vne fleur née de semence de rose & preparee à cette forme, celle d'un œillet soit transmise. L'on ne voit point qu'un animal produict

d'une matiere de Lyon, & disposé à cette forme, reçoive jamais celle d'un cheual. De mesme ne se peut-il faire dans ces Satyres, que les parties conceuës d'une matiere brutale, engendree d'une beste, & preparee à l'ame qu'leur est naturelle, soient capables d'estre viuifiées de la forme de l'homme, & vnies à un estre spirituel, avec lequel elles n'ont aucune conformité. A ceux-là qui pourroient croire telle conionctiō de deux choses si cōtraires, feroit facile de persuader que l'ame de Pelops informoit son espaule d'yuoire, & celle de Pytagore sa cuisse d'or: Car les parties brutales d'un Satyre monstre sont aussi peu proportionnées à l'ame spirituelle, que l'yuoire & l'or. Mais à propos de Pytagore, ce Philosophe qui enseigna la transmigration des ames humaines dans de nouveaux corps apres la mort, n'a pourtant jamais pensé que l'ame spirituelle de l'homme entrast dans le corps d'une

beste brute pour luy donner la vie. Car comme toute sa doctrine estoit cachee au populaire sous des intelligences ænigmatiques, aussi entendoit-il par cette metempsychose, au rapport des bons Autheurs, que les vices impriment des taches & qualitez terrestres dans les ames, lesquelles leur demeurant mesme apres la mort, sont comme vn corps qui les suit par tout, & qui sert d'vn vestement grossier à leur spiritualité contaminee. Mais si nous confessiõs quel'ame immortelle donast vie aux parties brutales de ces Satyres, il n'y auroit point d'explication secrette à chercher; & aueuglez en la sainte lumiere qui nous esclaire, il nous faudroit auoüer que reellement & de fait; l'ame humaine seroit & animeroit le corps d'vne beste, encor que ce Payen ne l'ait enseigné que par ænigme.

Que si quelqu'vn d'auenture s'adui-
soit de dire à cela, que l'ame immortel-

le informeroit seulement les parties brutales de ces Satyres, comme sensitive, & que s'arrestant au degré de la sensibilité, elle leur communiqueroit vne vie telle que leur nature la peut esperer: il seroit facile de respoñdre en vn mot, que cela ne leue pas ce que nous disons de la disproportion des parties brutales à la forme humaine. Car l'amen n'est point de ces causes qui agissent par le contact de vertu, c'est à dire, où elles ne sont point, & par des qualitez emanees de leur puissance, ains seulement où elle est, & sur les subiects qu'elle touche. En quelque façon quelle informeroit les parties brutales, elle y seroit en presence & substantiellement; & en quelque lieu qu'elle soit, elle n'y peut estre à demy & iusques à certain degré d'information, mais selon la totalité de sa nature. Cette forme spirituelle a cela de particulier & de diuin par dessus les autres, qu'elle n'est pas seulement diffuse dans

la masse du corps, & toute dans le tout: mais encore toute entiere en chacune partie, avec telle egalité, qu'elle n'est point plus grande dans les grandes, ny moindre dans les moindres. Car quant à la diuersité de ses actions, dont les vnes sont plus releuees, & les autres plus basses, elle prouient de la disposition des organes, desquels elle est contrainte de se seruir pour operer en cette vie, & non pas d'aucune inegalité qui soit en son information. Elle sent en son tout, dict saint Augustin, vne picqueure d'espingle faite dans la chair viue en vn point imperceptible, encore que la douleur ne courre pas les sens corporels, ains demeure au lieu où se faict le sentiment. Si bien qu'estant vnie à ces membres boucquins pour les animer, elle y seroit selon la totalité de son estre, l'entiere spiritualité de sa substance, & toutes les autres facultez qui la decorent: & sans aucune difference informeroit cette matie-

re, quoy que brutale & incapable de cette forme, avec les mesmes puissances que les plus nobles parties du corps humain : ce que nous disions estre contraire à toute apparence de raison, & au cours réglé de la nature.

Cette raison sera suiuite par des inconueniës d'une si puissante cōsideration, qu'ils doiuent estre receus pour argumens legitimes en cette matiere. Le peché originel dont tous les hommes ont herité de leur premier pere, & pour la purgation duquel les eaux Baptismales sont ordonnees de Dieu, a long temps retenu quelques Docteurs de l'Eglise en doute, sans oser determiner assurement si les ames estoient traduiçtes & descéduës d'Adá iusqu'à nous, se communiquant l'une à l'autre cette tache originelle, ou creées de Dieu à la generation de chaque homme. Car d'un costé il estoit difficile à comprendre comment ces substances spirituelles se pouuoient ainsi reproduire : & d'aut-

leurs il leur sembloit comme iniuste
 quel'ame d'un enfant mourant auant
 que d'auoir receu le Baptisme, fut
 eternellement punie pour cette faute à
 laquelle elle n'auoit point participé.
 Mais en fin ces Docteurs illuminez du
 sainct Esprit, ont condamné l'erreur
 des Pelagiains, & Luciferiains, qui fai-
 soient descendre toutes les ames de
 celle d'Adam, & aduoüé que l'ame re-
 çoit la tache du peché originel par l'in-
 fusion à la conionction du corps qui
 luy communique cette macule, pour
 estre né d'un pere desobeissant: & com-
 me dit sainct Cyprian, par la conta-
 gion de cette ancienne mort, parce
 qu'il prouient de la chair d'Adam. Ain-
 si le decide sainct Thomas en ses que-
 stions Theologiques, nommant la
 chair la cause instrumentelle de ce pe-
 ché: Et sainct Augustin determinant
 en fin son incertitude, escrit que la con-
 cupiscence attachée aux membres du
 corps, naissant avec les petits enfans,

les rend coupables du peché de leur premier pere, & que nous sommes corrompus les vns dans les autres, comme dans vn vase infect & moisy. Cela donc posé pour veritable, il s'ensuiuroit que l'ame immortelle de ces Satyres venant à estre infuse & à s'v-nir aux parties engendrees de la matiere brutale, seroit exempte de cette macule originelle & naturelle à l'homme. Car cette matiere brutale n'estant point venue d'Adam, ne la pourroit contaminer d'un peché qu'elle n'auroit point contracté. Et neantmoins cette mesme ame ne laisseroit pas d'estre entachée de ce mesme peché, par la conionction des autres parties qui viendroient de l'homme : & estant toute entiere en chaque partie du corps, il s'ensuiuroit qu'une mesme chose seroit toute pure & toute souillée, selon les diuerses parties qu'elle informeroit.

Cette faute originelle me faict sou-
venir

uenir du Baptisme, & le Baptisme
des autres Sacremens.

Il n'y a personne si peu Religieux
qui voulust dire que les Sacremens
adorables de l'Eglise, instituez par
le Verbe Eternel au salut de l'hom-
me seulement, pour le nettoiyement
de ses vices, & la viuification de
son ame, doiuent estre profanez
iusqu'à cette irreuerence, que d'estre
communiquez aux bestes brutes. Et
pourtant si l'ame de ces Satyres estoit
immortelle, vn corps de beste rece-
uroit la sanctification du sacré Baptes-
me, & la consecration des sainctes
Huiles. Et bien d'auantage ce Pain cé-
leste & viuant, préparé seulement pour
les Anges, & pour les hommes, qui ne
sont gueres moins qu'eux, seroit re-
ceu (chose indigne à penser) dans vn
corps de beste, & contre ce que nous
chantons tout haut, donné véritable-
ment aux chiens. Les Romains esti-
moient toute l'enceinte de leurs mu-

raillies sacrées excepte les portes, pour ce qu'estant destinées au passage de beaucoup de choses profanes qui entroient dans la ville, ils ne croyoient pas qu'elles peussent estre sanctifiées: Et par raison contraire on peut dire que le corps estant comme la porte & le passage par où les Sacrements sont transmis en l'ame, doit auoir de soy-mesme quelque sainteté, & non pas estre rauallé iusques à la brutalité. Car bien que dans l'ame soit transfusé la grace & l'effect des Sacremens, le corps pourtant est celuy qui les reçoit, & en partage avec elle les merites efficaces de la beatitude. La chair, dit Tertulian, est le fondement du salut, & celle qui fait enrouler l'ame sous les enseignes de Dieu. La chair est lauee, afin que l'ame soit nettoyée. La chair est ointe, afin que l'ame soit sacrée. La chair est signee, afin que l'ame soit fortifiée. La chair est ombragée de la main, afin que l'ame soit illuminée du

sainct Esprit. La chair est repeuë du
 corps & du sang de Iesus-Christ, afin
 que l'ame soit remplie de Dieu. C'est
 pourquoy, se trouuant conioincts au
 trauail, ils ne peuuent estre separez en
 la recompense. Loing donc de l'ap-
 plication & de l'effect de ces Sacre-
 mens mysterieux, vn corps brutal con-
 ceu & engendré d'une beste.

Ces dernieres parolles de ce Do-
 cteur me donnent l'ouuerture à vne
 raison dont elles feront le fondement;
 Car puis que la mesme chair qui a du-
 rant la vie receu les Sacrements & assi-
 sté l'ame en ses œuures, la doit suiure
 en sa resurrection, & l'accompagner
 en la gloire : Ainsi mesme que Iob le
 tesmoigne, disant :

*Je sçay bien que moy-mesme, & sans estre
 changé,*

*Il faut qu'au dernier iour de la tombe ie
 sorte,*

*Et vestant sur ma chair la mesme peau que
 i'ay,*

*Je verray mon Sauueur des deux yeux que
ie porte.*

Il s'ensuiuroit en ces Satyres vne chose prodigieuse & pleine d'impieté. Car leurs ames se venant reioindre en la resurrection à leurs mesme corps, & les entraînant avec soy dans le Ciel, ne seroit-ce pas vn corps de beste glorifié, & iouissant de la possession de Dieu? Il est bien vray, & saint Augustin mesme nous l'apprend, qu'en la resurrection generale, tous les corps seront reduits à vne iuste proportion, les superfluitez retranchees, les deffauts restablis, & toutes les defformitez remises à la naturelle conformation de l'homme. Mais cela ne se peut veritablement alleguer touchant ces monstres Satyres: car toutes les defformitez des corps humains ne sont que vices en la figure simplement, & non pas en la matiere, laquelle est de soy naturellement humaine, & disposée, voire mesme desirouse de cette par-

faicte reformation. Mais la monstrosité de ces Satyres n'est pas seulement vn deffaut en l'apparence exterieure, ains dans l'interieur de la matiere dont telles parties difformes sont proceées: & quelque changement qui puisse miraculeusement y arriuer, elles seront tousiours brutales. De sorte qu'il faudroit, pour rendre les corps de ces Satyres capables de la resurrection, que telles parties fussent entierement destruictes: & ainsi la moitié de leur corps, bien qu'il eust receu les Sacrements, & participé au trauail de l'autre moitié, ne l'accompagneroit pas en la recompense.

Le second membre de nostre diuision n'a pas moins de repugnance à la raison, pour les absurditez estranges qui s'en ensuiuroient. Car si l'ame raisonnable qui seroit en ces Satyres viuiroit seulement les parties humaines, & la sensitiue les brutales: vne mesme creature seroit composee de differen-

tes matieres, & animees de diuerſes formes : vn meſme tout auroit deux eſtres, & vn meſme viuant deux ames. Les *Egyptiens* ont bien eu cette opinion qu'il y auoit trois ames dans vn meſme homme, encore ſubordonnees à la puiffance l'vne de l'autre : mais la nature nous monſtre tous les iours qu'vn même ſubiect ne peut receuoir qu'vne ſeule forme, & la verité nous commande de croire qu'il ne peut y auoir qu'vne ſeule ame dans chaque animal. Ou bien diſons au contraire, que ce ne ſeroit pas vn meſme corps, ny vn meſme viuant : mais comme il eſt tres-vray, les parties ſuperieures eſtant humaines & informees de l'ame humaine, ce ſeroit vn demy-homme parfait, ioinct à vne demy-beſte parfaite. Mais quel agent pourroit eſtre aſſez fort en la nature pour conioindre deux choſes ſi differentes qu'vn corps d'homme & de beſte, & faire en ſorte que deux eſtres ſi diſſemblables

en leur matiere , si inegaux en leur
vie , & si contraires en leurs ames, se
peussent vnir & s'attacher ensemble si
estroittement , & se mouuoir si con-
iointement sans aucun contredict de
part ny d'autre? Et quels inconueniens
ridicules ne s'ensuiuroient point de
cette conionction ? Celuy qui feroit
mourir vn tel monstre en le poignar-
dant aux parties superieures de son
corps, feroit homicide & coupable de
mort : & aux inferieures, il tueroit vne
chevre , & en seroit quicte pour vne
amende Aquilienne. Et tout ainsi que
la vie de Meleagre dependoit de cet-
son fatal (ou empoisonné comme di-
sent quelques vns) au bruslement du-
quel elle auoit esté mesurée: De mesme
la vie de l'homme qui seroit dans ces
parties superieures, dependroit de cel-
le de la chevre qui seroit dans les infe-
rieures ; & la vie de cette demy-chevre,
de celle de ce demy-homme. Et lors
que cette ame raisonnable viendrait à

se separer de ce corps humain, il faudroit qu'une ame sensitive à laquelle on ne feroit aucune violence, cessa de faire vivre un corps brutal : & de mesme au rebours. Les moindres actions contre la justice raisonnable, que ce Satyre feroit par les parties humaines, le rendroient coupable : & les plus grands crimes par les brutales, ne pourroient pas seulement faire dire qu'il seroit vicieux. Et mille autres telles impertinentes absurditez qu'il seroit aisé d'arguer, si l'ame immortelle dans le Satyre monstre animoit seulement les membres qu'il tiendrait de l'homme. Puis donc que les parties nées d'une matiere brutale, ont tant de repugnance & se trouvent naturellement inhabiles à l'information de l'ame spirituelle, & que les humaines au contraire dans l'estat de l'animalité n'ont aucune repugnance, & sont naturellement disposées à la sensitive : Nous concluons que ces Satyres & tous les autres

monstres de pareille estoſſe, ſont pri-
uez de cet eſprit de vie, immortal, rai-
ſonnable, creé & ſoufflé de Dieu dans
les membres de l'homme à ſa genera-
tion, & que ces corps monſtrueux ſont
informez & viuifiez ſeulement par
vne ame corporelle, mortelle, & ex-
traicte de la puissance de ces deux ma-
tieres, auſquelles elle eſt eſgale-
ment propre & conuenable. Et que Dieu
permet la naiſſance de ces prodiges &
deſreglemens de nature icy bas, non
pas ſeulement pour accuſer & prouuer
enſemble à la Juſtice vniuerſelle du
monde, l'opprobre & l'impieté de
leurs parents: Mais encore pour d'au-
tres raiſons particulieres à ſa ſupreme
cognoiſſance.



Liure IIII.

Des Satyres Demons.



Ordre premier estably de Dieu dans cet Vniuers, restant apres tant de siecles tousiours égal à soy-mesme, & le trauail eternel & infatigable de la Nature, n'ont que trop manifestement tesmoigné à tous les peuples de la terre, qu'une Diuinité, Esprit saint & tout-Puissant, infus par les membres de ce grand corps, habite en tous ses estres, & en conserue les actions au mesme estat qu'ils estoient au point de leur creation. Les Hebreux appelloient Dieu Machom ou Hammachom, c'est à dire, Lieu, come toute chose estant en luy, & luy en toute chose. Et pour la mesme raison les

Stoïques le faisoient de figure ronde, à l'exemple de celle de l'Vniuers. Car Dieu certes est ce cercle Platonique, dont le centre est vniuersel & la circonference sans borne, qui remplit toutes choses, dit Symmache, & qui se trouue present, dit le Psalmiste, mesme dans les enfers. Les Payens instruits de la simple humanité, ont bien eu cette croyance qu'il n'y auoit partie, ny lieu dans ce grand tout, qui ne fut assisté de la presence de la Diuinité. Mais leur Religion ayant tousiours franchy les termes de la verité, dont ils ont suivy l'image & l'ombre seulement, comme si vn Dieu seul ne pouuoit estre, & agir par tout de luy mesme, ils en admettoient plusieurs, auxquels ils attribuoient diuerses puissances, limitees dans les diuerses parties du monde, dont chacun d'eux auoit la charge, & au regime desquelles ils estoient separément ordonnez.

La Poësie fut le flambeau Nauplien,

dont la malencôtreuse lumiere les faisant égarer du iuste cours de la raison, les precipita dans cet erreur où ils ont fait naufrage: Car les doctes du premier aage, ainsi qu'escriit Maxime Tyrien, voyant que le nom de Philosophe estoit odieux au vulgaire, & que les merueilles qu'ils enseignoient de Dieu sembloient impossibles à l'ignorance des grossiers, furent contraincts de se faire Poëtes, & chanter sous paraboles & cõceptions ænigmatiques les effects de la Divinité. Ce qui fut cause que les peuples s'arrestant à leurs vers & non pas à leur intelligence mystique, receurent ce nombre infiny de Dieux qu'ils honorèrent si religieusement. Herodote nous a bien voulu persuader qu'auparavant Hesiode & Homere, l'on n'auoit point ouy parler de la race & genealogie de tant de Dieux: Mais Orphee pourtant (si les hymnes que nous auons sont de ce vieil Chantre Thracien,

long temps auant l'aage de ces deux premiers) auoit desia celebré par ses vers, la pluralité des Dieux qui dès-lors estoient reueréz. De ces mysterieuses Poësies donc, sortirent les trois freres pour partager entr'eux l'Empire vniuersel de cette superbe machine, tout ainsi qu'une succession, dont les lots furent diuisez & mesurez par vne enclume de fer, roullant durant trois iours entiers du sommet de l'Olympe aux abysses de la terre. Des erreurs de cette mesme doctrine, sont venuës toutes ces autres diuinitez qu'ils nommoient petits Dieux, dont ils estimoient la puissance estre subordonnee à ces trois souuerains, qui les auoient distribuez çà & là par le monde au gouuernement de quelque partie. Ansiles Naiades eurent vn soing particulier des eaux, Pomone des fruiçts, & Flore des beautez des prairies: Les montagnes furent donnees aux Orcades, les Dryades fomentee-

rent la generation des arbres, & mille autres telles refueries les emporterent dans la fausse croyance de la multiplicité des Dieux.

Du nombre de ces petites diuinitez estoient ces Dieux champêtres, qui furent iadis adorez sous les noms de Pans, Ægyrans, Faunes, Syluains, Satyres, & Tytires, dont les Idoles furent pourtraictes d'une figure monstrueuse demy-homme & demy-chevre, auxquels ils disoient la garde des forests & des deserts auoir esté commise, & qu'ils honoroient de Prestes, Temples & Sacrifices, à l'exemple de ceux qu'ils estimoient leurs plus grands Dieux: comme l'on peut voir amplement dans les Autheurs qui ont traicté des Dieux des Gentils, de leurs Images, Festes & Sacrifices. Et bien que les Fables confuses avec quelques rencontres de l'histoire, semblent auoir rendu ces Dieux differents les vns des autres, distingué

ces noms, & diuersifie leurs Festes de
 quelques legeres ceremonies, il est
 pourtant certain que tous les Satyres
 ont esté reputez mesmes puissances,
 que tous ces noms leur sont com-
 muns, & que quelques doctes Inter-
 pretes se sont efforcez de rapporter
 tout ce que nous en lisons à vne mes-
 me Diuinité. Nous apprenons que
 l'Empereur Seuere, apres auoir passé
 par toutes fortes de dignitez, & sauou-
 ré toutes les delices qui peuuent allu-
 mer les cupiditez de l'homme, auoit
 de coustume de dire, l'ay esté tout ce
 qu'un homme peut estre, l'ay esprou-
 ué toute chose, & si ie ne suis pas enco-
 re content. De mesme est-il arriué de
 la religion des Payens: ils ont adoré
 tous les Dieux qu'ils se sont imaginez,
 receu tous ceux des pays estranges, &
 dressé mesme des Autels à ceux qu'ils
 ne cognoissoient point, & dont ils
 ignoroient le nom: toutefois ils n'ont
 peu iamais estre satisfaiets, & leur
 ignorance semble auoir tousiours at-

tendu la cognoissance d'une Deité plus sainte & plus puissante que toutes celles qu'ils honoroient. Le Diable par ses maudits artifices estoit celuy, qui les tenoit aveuglez en la lumiere de leur propre Philosophie, par laquelle ils apprenoient d'eux mesme l'unité d'un vray Dieu, les charmoit & arrestoit en la reuerence impie de tant de Deitez, afin qu'adorant plus d'un Dieu, ils n'en adorassent point du tout. Car cet esprit d'orgueil & d'enueie, forcenant d'une rage effrenée à la perte des hommes de ces premiers siècles qu'il a tyrannisez avec tant de violence & d'astuce, & tirant ses aduantages de leur aveuglement: si tost que par les Sacrifices dont ils honoroient la memoire de quelque Prince sage & vertueux, ou que par une action extraordinaire en la nature, & miraculeuse à leur stupidité, il les voyoit disposer à la veneration de quelque nouvelle Deité: il s'y iettoit à la trauersé, & prenoit

prenoît possession des lieux propres à la demeure de ces Dieux imaginaires, Et par des oracles douteux & des effets d'une puissance surnaturelle, leur versoit en l'ame la mesconnoissance de ce qu'il estoit : rendât par ce moyen notoire cette verité prophetique, dont nous apprenons , que tous les Dieux des Payens estoient des Demons malicieux; qui sous l'ombre des tenebres de leur ignorance, ont vsurpé le nom, les honneurs, & l'autorité simulee de Dieux.

Que n'a point faict ce Prince de mensonge dans le cult des Faunes & Satyres ? & qu'elle puissance ne s'est-il point arrogée à l'ombre de cette croyance religieuse ? On dit que les Archers de Saül allant de sa part pour surprendre David en sa maison, ne trouverent qu'une vaine statuë coiffée d'une peau de chevre, que Michol son espouse avoit dextrement supposee dedans son liect. Ainsi les Payens, au lieu des

Dieux qu'ils pensoient auoir trouuez dans les Forests & Deserts n'y adorerent en effect que des fantosmes demy-boucs, & mauuais Demons, qui suiuant leur dessein ambitieux de s'esgaler au Tres-Haut, se firent adorer pour Dieux.

Qui ne sçait les oracles que le Dieu Pan a rendu iadis en l'Arcadie, dans ce Temple dont la Magicienne Erato, qu'ils nommoient Nymphé, estoit la Prestresse? Et qui n'a ouy parler des oracles de Faune en Italie, dont les responcez annoncerent au Roy Latin, dormant sur les peaux des chevres sacrifiees, que les destins reseruoient sa fille pour vn Prince estranger? Qui n'a leu que Pan fut celuy, qui apprit autrefois à l'Apollon de Delphe, la science de deuiner? Et qui peut ignorer que le nom de Faune est tiré selon Seruius, du Grec *phoni*, qui signifie la voix, ou plustost du Latin, *fari*, c'est à dire, parler dont mesme il fut appellé *Fatuns*,

& sa femme *Fatua*: Parce que ces Demons boucquins rendoient iadis aux Deserts leurs oracles de viue voix, en vers, qui furent nommez Saturniens? Mais qui ne dira que ces Propheties quelquefois inexplicables & tousiours tromperesses, estoient les effects des ruses malicieuses de Sathan *Isidoro*

Les terreurs soudaines, que l'on nommoit Paniques, parce que le Dieu Pan en estoit reputé l'autheur, souuent excitées par des Demons visibles en l'apparence de Satyres, estoit ce pas vn autre inuention de Sathan, pour vaincre les peuples par la crainte, & les ietter dans vn timide respect de la puissance qu'il vsurpoit? Quelquefois ces mesmes Demons excitoient ces vaines frayeurs, par des bruiets semblables aux sons enrouëz d'vn cornet d'airain, que ces pauvres Idolatres pour ce subiect mirent en la main de Faune dans ses Images: & souuent par vne voix horrible que mille trôpettes

ne peuvent esgaler, & dont la terreur, dit Valere, surpasse de beaucoup l'armet esbranlé du Dieu Mars, les cheveux serpentins des Eumenides, & la gueule beante de la fiere Gorgone, Quelquesfois ils se contentoient de frayer les troupeaux, & leurs ouurât les estables les faire muffer dans les recoins des Forests: & souuent espouuntoiét les villes, les armées & les prouinces entieres. Les fables disent que les Geants furét plus vaincus par ces vaines craintes que par les armes des Dieux: & que les Pans & Satyres qui habitoient vers la ville de Chemmis, annonçant aux peuples la mort d'Osiris, leur ietterent dans le cœur avec cette nouuelle vn tel effroy, que depuis toutes les soudaines frayeurs furent nommées Paniques du nom des Pans, qui les esmouuoient. L'histoire nous apprend que les anciens Gaulois furent iadis repoussez de Delphes par ces Demoniques estonnemens, que la ville de

Carthage en fut mise en trouble, l'armée d'Antoine en confusion, & la flotte de Philippe en fuite, bien que telles frayeurs soient rares sur mer. Les Romains se trouuants en grande détresse pour ne sçauoir qui auoit eu du bon ou du pire en la bataille qu'ils auoient donnée contre les Toscans, vne voix fut ouye la nuit, qui leur annonça, qu'il en estoit mort vn d'auantage du costé des Toscans, dont aussi tost la ioye s'espandit sur le camp des Romains, & vne terreur secrette sur celuy des ennemys qui acheua de les perdre. D'où prouenoit cette voix que d'un Demon? & qui auroit peu si promptement & si iustement conter vingt-trois mille corps, qui estoient morts de part & d'autre en cette rencontre, sinon l'un de ces esprits qui voyent & conçoient les choses en vn instant? Pour action de grace les Romains dresserent vn Autel au Dieu qui

les auoit ainsi fauorisez, dont l'inscrip-
tion estoit en leur langue, *A Iupiter*
Faune, & selon la Grecque, *A Iupiter*
l'Espouuanteur: Car tous les Faunes &
Satyres n'estoient pas seulement repu-
tez mesme demy-Dieux, c'est à dire,
mesme Demons, mais aussi Iuppiter
& Pan n'estoient en rien differents:
Ce que l'on recognoist par l'inscriptio
de cet Autel sacré au Dieu auteur
des terreurs Paniques, & par les vers
d'Orphee, qui nomme Pan, Iupiter
cornu, & auteur des soudaines
frayeurs, qu'il enuoye iusqu'aux der-
niers bouts de l'Vniuers.

Dois-je oublier en cet endroit ce
que Theocrite faict dire à son Che-
vrier de l'aspre cholere & cruauté du
Dieu Pan au milieu du iour.

*Non Berger, il ne faut nos chansons re-
eiter*

*A l'heure de midy, Pan est à redouter,
Qu'ilors va deschargeant d'une rage ma-
ligne*

La cholere qui pend tousiours à sa narine.

Ce que l'on peut avec raison rapporter à ce que nous lisons dās le Psalmiste du Demon de midy, & dire que le Pan des Payens, estoit le *Kereb* des Hebreux, dont la rencōtre estoit estimée dangereuse au milieu du iour, contre l'ordinaire des Demons, lesquels estant enfoüis dans des tenebres eternelles, executent leur malice dans l'obscurité de la nuit. Les doctes interpretent diuersemēt en ce passage, ce mot de *Midy* : Les vns disent que ces termes *Desert & midy*, sont quelquefois vsurpez l'un pour l'autre dans les sainctes Escritures, & que par le Demon de midy il faut entendre le Demon du desert. Et les autres qui ne veulent pas expliquer ce temps de midy pour la plus haute heure du iour, le prennent pour vne rage audacieuse du Demon, qui ose mal-faire en plein iour, & forcener visiblement : Ainsi mesme que quelques vns ont interpre-

réce texte de Sophonie, *Ils les chasseront à midy*, comme s'il disoit, ils les vaincront à guerre ouuerte, & non point à la desröbee. Or l'une & l'autre de ces explications ne sont pas seulement conformes à nostre opinion, mais aussi la confirment entierement. Car Pan & toute la troupe des Syluains, estoient les Demons du desert, comme nous monstrerons cy-apres. Et ce Dieu Satyre auoit de coustume d'exercer ses cruautez & turpitudes demoniaques, en plein iour, & tourmenter les hommes & les femmes à la veüe de tout le monde, dont la mort de ces neuf personnes qu'il fit mourir en la Carie, pour les auoir seulement rencontrez en son chemin, seruira de preuue suffisante. Porphyre escrit que Faune estoit nommé Dieu cruel & pestilent; ce que les diuerses traductions de ce passage du Psalmiste, semblent auoir voulu remarquer. Car l'Hebraïque porte, *L'exterminateur de midy*,

& la nouuelle, *La peste de midy* : & le mot Hebrieu *Meririm*, selon quelques sçauants , signifie Demons de midy, ou bien air pestilent : Aussi les Payens honoroient le Dieu Faune, comme les Eumenides, la fièvre & Pluton, seulement pour addoucir sa fierté, & de crainte qu'il ~~ne~~ affligeat les peuples de quelque funeste mal'heur.

Or c'estoit vne vieille coustume des Romains, qu'ayant esté quelque personnage par les communs suffrages du peuple, esleué à la dignité Royale, il montoit au Temple de Iupiter Capitolin, où apres les offrandes faictes aux Dieux, il se reuestoit de la robe Royale, & prenoit les superbes enseignes de la souueraineté qui luy estoit concedee : puis en cet equipage magnifique, venoit sur la place se faire voir au peuple qui le receuoit avec grandes acclamatiós : ainsi lisons nous qu'il fut pratiqué en la personne du Religieux & pacifique Numa, & de-

puis en l'election des Capitaines & Magistrats de Rome. Il semble que l'on pourroit dire avec raison que le mesme est arriué de tous les Demons qui ont esté par les anciens reuezez avec tant de sainctes ceremonies. Car si tost que la superstition, par vne tacite approbation des peuples abusez de quelques Religieuses nouveautez, en auoit faict des Dieux, ils se retiroient dans les Temples, & les autres lieux consacrez à leur honneur : puis s'affublant à l'exterieur de la forme sous laquelle ils estoient adorez, & des ornemens conuenables à la puissance qui leur estoit attribuee, se presentoient en ceste sorte en tous endroits, & en toutes occasions à ces pauvres auuglez, lesquels surpris par cet artifice se confirmoient en la croyance qu'ils auoient de ces fausses Diuinitez. Ainsi fut la fausse Diuinité de Castor & Pollux, establie à Rome, s'estant monstrez vers la ville deux spectres sous l'habit de

deux ieunes Cheualiers couuerts de sang & de poudre, le mesme iour que Perle fut vaincu par Paul Æmil en Macedoine : & ce Demon serpentin qui se fist transporter de la Grece en Italie, obligea les Romains à l'adoration d'un faux Dieu de la Medecine.

Par ces mesmes ruses & appasts, les esprits malins courant à toute rencôtre leur inuisibilité de ceste figure meslee de l'homme & du bouc, & sous telle apparence faisant plusieurs choses miraculeuses au dessus de la puissance & de l'intelligence humaine, conformes à ce que les fables contoient des Faunes & Satyres, affermirent les fondemens, esbranlables à Dieu seul, des honneurs diuins que les Payens rendoient avec tant de deuotion à ces faux demy-Dieux, habitans les deserts, & gardiens de leurs troupeaux. Et ces Demons ainsi reuestus de ceste forme difforme, & de ceste monstruosité effroyable, constituent la derniere espee

de Satyres, dont nous auôs à discourir.

Mais affin de ne nous pas arrester à vn recit aussi long comme il seroit ennuyeux, de tout ce que les Autheurs ont escrit de l'apparition des Demons, sous la forme des Satyres, & des exemples sans nombre, dont les Histoires font mention, nous nous cõtenterons pour autorité, de ce que nostre Ronfard, ce genie de la Poësie Françoise, en l'ame duquel est ressuscitée la sacree science des vieux Poëtes, en a escrit en l'Hymne qu'il a faict des Demons, selon la doctrine d'Orphee, & de toute l'antiquité.

*Les vns aucunes fois se transforment en Fees,
En Dryades des bois, en Nymphes, &
Napees,*

*En Faunes & Syluains, en Satyres & Pâs,
Qui ont le corps pelu, marqueté comme Fans,
Ils ont l'orteil de bouc, & d'un Cheureil l'o-
reille,*

*La corne d'un chamois, & la face vermeille
Comme vn rouge croissant, & dansent toute
te nuit,*

Dedans vn carrefour, ou près d'une eau qui bruit.

Et pour exemple il nous suffira d'en rapporter deux seulement, dont le premier sera tiré des Histoires anciennes. Ce bon coureur Philippides, estant enuoyé par les Atheniens en Lacedemone, peu auant la iournee de Marathon, s'apparut soudainement à luy vn spectre, qui se dit estre le Dieu Pan, & luy commanda d'aduertir les Atheniens, de le reuerer d'oresenauant plus qu'ils n'auoient fait par le passé, luy promettant d'assister de sa faueur leurs armes contre la puissance espouuentable des Perses. Aussi les Atheniens apres l'heureux succez de ceste guerre, dresserent vn Temple en l'honneur de Pan, auquel entre autres ceremonies, ils consacrerent vne lampe tousiours ardente.

L'autre exemple est de ce Satyre qui s'apparut du téps de l'Empereur Charles le Quint, à ce fameux Magicien d'Allemagne, qui se faisoit nommer *Magister videns*, vsurpant peut estre ce

tiltre ambitieux, à cause que les anciens Hebrieux appelloient vn Prophete du nom de *Videns*, comme voyant le futur long temps auparauant qu'il deust arriuer. Ce Magicien doncques ayant promis de faire recouurer tous les thresors qui s'estoient perdus le long des costes de Holande & Irlande, & dans le traiect qui separe la France de l'Angleterre, & pour y paruenir faict plusieurs coniuurations & sortiliges avec trois autres de mesme mestier qui s'estoient associez avec luy, vn Demon auquel la garde de ces richesses auoit esté commise, les vint aborder sous la forme d'un Satyre, & leur presentant vn baril plein d'or, les pria de s'en contenter: mais les Sorciers s'opiniastrans pour auoir le tout, le Demon s'esuanoüit incontinent, & excita dans la serenité du plus beau iour, vne tempeste si estrange dans l'air & sur la mer, que les habitans d'alentour soupçonnans ce qui estoit, & les Magiciens s'en estant apperceus, s'escarterent cha-

cun de leur costé, dont l'un s'estant venu rendre Religieux en la ville de Paris, conta depuis à plusieurs tout ce qui leur estoit arriué en ceste recherche.

Laisant donc à part tout ce que l'on pourroit alleguer touchant l'apparition des Satyres que certainement l'on sçait auoir esté Demons, nous viendrons à quelques Satyres dont il semble qu'aucuns ayent douté s'ils estoient Demons. Et de ceux-là, auons nous estimé qu'il estoit à propos pour leuer tout scrupule, & donner à cognoistre ce qu'ils estoient, d'en traicter plus amplement.

Ce que l'on en trouue de plus prodigieux, est de ces Satyres qui se mesloient iadis à l'impourueu parmy les hommes & les femmes, lors que l'on celebroit la feste de Bacchus sur le mont de Parnasse: car ils paroissoient en trouppes, aucuns d'eux portant des cymbales, & d'autres des tambours, leur voix estoit humaine & distincte.

ment articulee, & ne ſçauoit-on de quel endroit de la montagne ils pouuoient venir : car iamais on ne recogneust qu'il y euſt de tels habitans ſur cette montagne. Mais qu'eſtoit-ce autre choſe que des Demons qui venoient aſſiſter aux ceremonies & hommages qui leur eſtoient rendus par les Magiciens ſous ombre de Religion, prenans cette forme de Satyres, comme l'on dit qu'ils font encor au iourd'huy aux aſſemblees nocturnes des Sorciers, que l'on nomme Sabatz, ſe rendant complaiſants à leurs danſes & à leurs turpitudes. Car il eſt certain que ces Trieteriques, & ces grands myſteres de Bacchus, ces Orgyes inefables, comme les appelle Orphce, dont les prophanes eſtoient chaeſez & les initiez ſeulement introduits, eſtoient meſme choſe que ces conuenticules de nuit, ou ſeulement peuuent eſtre admis ceux qui ont faiet paction avec le Diable, & qui tiennent la bouche
cloſe

close à leurs secrettes impietez au milieu des plus aspres tortures. La conference que l'on peut faire en peu de mots de l'une & l'autre de ces assemblees misterieuses, le fera cognoistre aysement. Qui ne sçait que les Sabatz ne sont rien qu'un amas de meurtriers, empoisonneurs & gens eshontez, qui s'abandonnent aux abominations des succubes & incubes? Et qui n'a leu dans Tite Liue, que la confrairie de Bacchus estoit l'officine de toute coruptele, & la boutique d'où sortoient les meurtres, les empoisonnements, les faulsetez, & violemens desnaturez de tout sexe & de tout aage. C'est pourquoy la Sorciere Canidia reprochoit à Horace qu'il auoit osé diuulguer les secrets du licentieux amour qui se pratiquoit à l'ombre des tenebres en la feste de Corytto, que Suidas appelle la Deité des Cinædes & femmes desbauchees, & que l'on sçait auoir esté reuerencé de mesmes solénitez

que Bacchus. Mais n'est-ce pas vn témoignage plus que suffisant de l'abomination des Bacchanales, de ce que Hyfpale, qui s'en estoit retirée avec horreur, oyant dire à son amy Ebuce qu'il se vouloit mettre de cette confrairie, luy respondit, ja à Dieu ne plaise, & puissions nous mourir plustost l'un & l'autre, que ie vous voye abandonné à ces detestations: & de ce que les Romains vsèrent d'une si estroicte severité enuers ceux qu'ils trouuerent auoir trempé en cette forfaiture, afin de renvoyer à la Grece les impietez. Car ce fut Orphee, dont les chansons, c'est à dire, les vers magiques, peurent faire retourner l'ombre d'Euridice des Enfers, mouuoir les arbres, amolir les rochers, & appriuoiser toutes sortes d'animaux sauvages, hormis les femmes, qui institua le premier telles assemblees, ou seulement les renouuella, selon quelques vns, dans la Thrace, dont elles furent nommees

Orphea, & les Prestres Orpheotelestes: d'où l'on doit apprendre quels deuoient estre les confreres de cette ceremonie, de laquelle vn si grand & fameux Magicien auoit esté l'auteur. La profession que les initiez deuoient tous les mois renouueller avec serment entre les mains des Orpheotelestes, & les cinq iours ordonnez en chasque mois par Proculle Minie à la celebration de ces mysteres, n'est ce pas l'hommage & l'assistance que tous les mois les Sorciers doiuent rendre à Satan? Le Dieu qu'ils inuoquoient en cette solemnité estoit le bouc des Sorciers, & de cela en auôs nous vn tesmoignage irrefragable dans le nom Attes qu'ils alloient criant & reiterant à haute voix: Car les Phrygiens que l'on estime auoir esté les auteurs de ceste feste; nomment les boucs Attes, le deriuant peut-estre de l'Hebrieu *Hathais*, qui signifie bouc. *Supposition*

De toutes les apparences dont les

Demons se font reueſtus, celle du bouc, animal infect & puant, & hieroglyphique de toutes ſaletez, leur a toujours eſté la plus agreable: D'un phantoſme, ſous cette forme, la belle Sinonis de Iamblic, ſe viſt ſollicitee d'amour dans les deſerts: Ce bouc tout noir qui parut au Comte de Cornoube, portant ſur ſon dos l'ame de Guillaume Roux Roy d'Angleterre, qu'il confeſſa mener au iugement du grand Dieu, eſtoit-ce autre choſe qu'un Diable? Et qui ne ſçait que les Sorciers dans leurs Sabatz ne l'adorent point ſoubs vne autre figure? Zoroaſtre même qui les a cogneus mieux que nul autre, ne les nomme point autrement, comme il eſt aiſé de comprendre par les parolles de Iean Pic, qui dit, que celui qui aura leu dans le liure intitulé Baïr, l'affinité qu'il y a entre les chevres & les Demons, pourra bien ſçauoir ce que Zoroaſtre veut entendre par les chevres: & quel eſtoit cet Aza-

zel ou bouc emissaire du Leuitique, ~~que~~ le grand Prestre enuoyoit dans le desert ~~vn autre bouc~~, avec tous les pechez du peuple, sinon le Prince des Demons Satan? Ce fut pourquoy les Demons se plaisoient à paroistre en Satyres, dont la forme auoit tant de rapport à celle du bouc, & que le Dieu Pan fut nommé par les Ægyptiens, *Mendes*, & les Faunes par les Eoliens, *Tityres*, comme qui diroit en l'vne & l'autre langue cheure.

L'autre nom, *Euie*, *Euan* ou *Euoe*, que les Bacchantes auoient tousiours en la bouche, tesmoigne encor assez fortement que c'estoit le Diable qu'ils inuquoient & adoroient. Car ce mot est tiré de *Heuia*, qui veut dire, parmy les Hebrieux vn serpent. Or le serpent estoit le symbole que les initiez aux Orgyes portoient en la main, & qui leur estoit ietté dans le sein en faisant leur profession, & retiré, comme dit Arnobe, par en bas: & le serpent n'est

autre chose que le Diable. Soubz cette forme il seduisit le premier homme, & le Prince de ces Demons, que l'hercides disoit auoir esté precipitez du Ciel par Iupiter, s'appelloit Ophionee, c'est à dire, serpentin. Quels estoient dans l'Escripture les Pythonifses, & ces deuins qui portoient des Pythons dedans le ventre, sinon des Sorciers possedez & remplis du serpent Python, c'est à dire, de Satan?

Dauantage cette chandelle ardente que les Sorciers tiennent en la main, l'ayant allumee à celle que le bouc leur maistre porte entre les cornes, à laquelle il met le feu le tirant de deffous sa queue, comme l'on a sceu par la confession de cette Sorciere qui fut executee par Arrest du Parlement de Bordeaux, en l'an 1594, Et cette lustration par le feu dont ils se purifient dès leur enfance, sont-ce pas ceremonies que les Demons ont transportees des Bacchanales aux Sabats? Orphee ap-

pelle Bacchus, semant le feu, & ce nom Hyes, dont les Bacchantes appelloient à hauts crys la puissance diabolique qu'ils honoroient, n'est pas desfriué, selon l'interpretation de quelques Modernes, du mot Grec *Hydor* comme a voulu Plutarque, mais de l'Hebrieu *Haes*, qui veut dire le feu. De faict Zoroastre comãde à ceux qui voyent vne soudaine eruption de feu sans figure bondissant en l'air, de l'adorer & en ouir la voix, parce, dit-il, que c'est vn Demon. Ce fut pourquoy les Bacchantes auoient de coustume de porter en la main vne torche ardente: Thetis qui par vne science furnaturelle prenoit telle apparence que bon luy sembloit, voulut purifier le petit Achille estant encor au berceau, en le passant toutes les nuits par le milieu des flammes, afin de le rendre égal aux Dieux disent les Fables, mais en effect pour le consacrer au Demon qu'elle seruoit: Et Isis, qui ne fut pas

moins ſçauante en l'art Magique, qui faiſoit mourir de ſon regard, comme les Telchines, les Tybiens, & ces faſcinateurs d'Illyrie, & qui changeoit de forme quand il luy plaiſoit, s'eſſorça de nettoyer ainſi par le feu tout ce qui eſtoit de mortel au petit fils de la Royne Athenaide, l'ayant nourry par vn long temps en luy faiſant ſeulement teter le bout de ſon doigt.

Reſte ce cry myſterieux des Orgyes *Saboe, Saboe*, Et le ſurnom de Sabazien donné par les Phrygiens au Dieu que l'on y reueroit, ou Sabadien par les Thraces, dont les ſuppoſts de Bacchus furent nommez *Sabees*, & les lieux ſecrets choiſis pour la celebration de ces myſteres *Sabos*. Tous ces mots ſont deriuez du Grec *Sabazein*, qui ſignifie danſer, à cauſe des danſes, furieules & forcénées que demenoient ceux de cette confrairie agitez du malin eſprit. Et qui n'a point ouy dire que les Sorciers vont touſiours criant l'vn

à l'autre dans leurs Trieteriques modernes, Sabat, Sabat, nom Demoniacque, & dont l'etymologie ne differe point de ces autres pratiquez parmy les Payens? Car de le tirer de l'Hebreu *Sabaoth*, qui veut dire repos, ce seroit vne antiphrase trop grossiere & pleine d'impieté, veu mesme que par les Sabats l'on entend specialement les dances maudites & à contredos des Demons & Sorciers meslez ensemble, que les peuples de Dannemarc appellent dances des Hellues, du nom Danois *Helfuede*, qui signifie l'enfer. Ce n'estoit donc pas sans raison, que les Demons sous cette figure de Satyres ou demy-boucs, qui leur fut tant agreable, venoient manifestement assister à la celebration de ces anciens Sabats, & se communiquoient à ces vieux Sorciers qui les honoroient si religieusement.

Entre tous les Satyres dont l'Histoire estonne la posterité, il n'y en a point,

qui violente avec tant d'effort, la croyance de ceux, dont la raison sainte & veritable ne peut admettre vne espee d'homme Satyre, comme celuy que saint Hierosme escrit s'estre fait voir à saint Anthoine, dans les deserts de la Thebaïde. Car il discourt si raisonnablement, parla si saintement, & ioüa si bien le personnage de l'homme, que le Comte de la Mirande, Vadian, l'Auteur de la genealogie des Dieux, & les autres qui recoiuent ceste opinion, ne se fondent point sur autre raison que sur cet exemple. Il me souuient que Halcyone dans Ouide, se pourmenant sur le bord de la mer, toute soucieuse pour l'absence de son mary Ceyx, aperceut de loing flotter ie ne sçay quoy sur les eaux, quelle auisa tost apres estre vn corps d'homme sans discerner toutesfois qui estoit ce pauvre naufrage, & ne peut recognoistre que c'estoit le corps de son mary, iusques à ce que la mer l'eust ietté près d'elle contre le ri-

uage. Ainſi ceux qui n'ont regardé ce Satyre que de loing, n'ont peu deſcou-
rir ce qu'il eſtoit, & tous ces Autheurs
s'arreſtant au ſimple texte de ceſte Hi-
ſtoire, & ne l'ayant pas conſideré de
prés, ſe ſont meſpris en la cognoiſſance
de ce Satyre: Mais comme ce Synge,
qui ſe couurit la teſte & les eſpaules
ſeulement, d'une riche piece d'eſcarlate,
 faiſoit cognoiſtre ayſement ce qu'il
eſtoit, ayāt le derriere tout deſcouuert,
& que ceſte action n'eſtoit qu'une gen-
tilleſſe de Synge. De meſme ce Satyre,
bien qu'il eut pris la figure, la voix,
& le diſcours de l'homme, nous fe-
ra voir ayſement, ſi nous le tournons
par derriere, que c'eſtoit vn tour de Sa-
tan, Synge malicieux du tres-Hault, &
que ceſte apparence exterieure cou-
uroit vn Demon, dont la cautelle s'eſ-
forçoit de ſurprendre la croyance, &
eſtonner la ſaincteté de ce bon hermi-
te. Mais affin de traicter ceſte matiere
avec vne plus claire & facile intelligen-

ce, nous en deduirons l'Histoire entiere par le texte de sainct Hierosme, sans en rien obmettre, n'y rien obscurcir pour la briefueté: affin de faire toucher au doigt & à l'œil, les preuues manifestes & indissolubles que nous tirerons, tant des paroles del'autheur, que du discours de la raison.

Sainct Anthoine ayant eu de nuiet reuelatiō, qu'il y auoit dans les deserts vn Hermite (qui estoit sainct Paul) que la sainte vie rendoit agreable à Dieu par dessus tous les hommes du monde, touché d'un desir extreme de le veoir, fort dès le matin de sa cellule, se met à trauers les halliers, les buissons, & les precipices, & errant çà & là, prend à l'aduanture le chemin sans chemin de l'Hermitage qu'il ne cōnoissoit point. La premiere rencontre qu'il fit en ce voyage, fut d'un Hyppocéraure, monstre demy-homme & demy-cheual, auquel il ne tint pas long propos, parce qu'il ne iettoit que ie ne sçay quels ac-

tens barbares & inarticulez, & que
 d'une legere course il disparut soudain
 à ses yeux. Cet Hermite s'estonnant &
 pensant à ce qu'il venoit de veoir, ap-
 perceut soudain deuant luy vn petit
 Hommonceau, ayant le nez pointu, le
 front armé de deux cornes, & dont les
 parties inferieures estoient semblables
 à celles d'une cheure. Alors, sans trem-
 bler à ce nouveau spectacle, il se reuestit
 comme vn vaillant champion de la
 cuirace d'esperance, & du bouclier de
 la foy, & cet animal monstrueux luy
 offrit des dattes, comme pour ostage
 de la paix, dont saint Anthoine s'es-
 tant apperceu, il s'auança, & luy ayant
 demandé qui il estoit, il en receut ceste
 responce. *Je suis vn mortel du nombre de
 ces habitans du desert que les Gentils abu-
 sez en leurs superstitions, ont deuotement
 adoré sous le nom de Faunes, Incubes, &
 Syluains. Je suis deputé vers toy de la part
 de toute ma troupe, comme Ambassadeur.
 Nous te prions de prier pour nous le Dieu*

commun que nous cognoissons estre venu pour le salut du monde, & sa voix acouru par toute la terre. De ces paroles, le bon vieillard prit subiet de detester l'Idolatrie des Alexandriens, qui adoroient pour Dieux toutes sortes de monstres prodigieux & estranges, & soudain ceste beste hydeuse, d'une viftesse aislee, se desroba de deuant ses yeux. Voila succinctement quel estoit ce Satyre, & de quels propos il entretint ce saint homme.

Or iacoit que tant de sçauans personages ayent estimé qu'il estoit homme, & que saint Hierosme mesme sur Isaye, semble auoir tenu que les Faunes & Syluains estoient des hommes forestiers, ainsi qu'il les nomme, si est-ce pourtant que ie ne puis en ceste occasion adiouter mon calcul & ma febue à leurs suffrages, & soubcrire à leur opinion: Et bien qu'il peut suffire pour prouuer manifestement que ce Satyre ne pouuoit estre vn homme, de dire

qu'il n'y a point d'autre espece d'hommes que les Adamicques, comme nous auons discoursu, encore est-il facile d'en tirer de l'interieur de ceste Histoire, des tesmoignages infaillibles, & qui me font estonner comment tant de doctes & Religieux personnages ont passé par dessus, sans les remarquer, leur estant certes arriué comme à cet Epizelus Athenien, lequel à la iournee de Marathon vit vn spectre deuant luy, qui s'approchant & trauersant sa personne luy osta la veüe: Car ce fantosme Satyrique, semble les auoir auenglez, & passant en leur cognoissance, leur auoir osté la cognoissance de ce qu'il estoit.

S'il estoit vray que ce Satyre fut homme, comment se pourroit-il faire qu'il eust esté enuoyé de sa troupe vers S. Anthoine en Ambassade? Ambassade, certes, d'un appareil extraordinaire, & d'une nouvelle suite. D'où ces hommes pouuoient-ils sçauoir qu'il deuoit

venir en ces quartiers, pour le trouuer si à propos? Quels Prophetes leur auoient predict? Quels Anges leur auoient annoncé? Et quels Demons les en auoient aduertis? Car ce bon Hermite auoit resolu son voyage sur vne reuelation qu'il auoit eue la nuict precedente, & n'auoit communiqué son dessein à personne, car il ne conuersoit avec personne. L'aduis & la cognoissance d'une si secrette resolution & si promptement executée, montre qu'il y auoit en ce Satyre quelque chose plus qu'humain, & qu'il estoit de ces esprits dont la science parfaite descouure nos pensees par nos Idees intentionelles, & qu'il fut député véritablement de sa troupe pour seduire cet Hermite, & empescher ou retarder son deuotieux pelerinage.

Comment aussi cet homme Satyre, auroit-il peu si facilement entendre le langage de saint Anthoine, & luy respondre en mesme langage? Les langues

gues ne s'apprennent que par vn long temps, & par vne grande frequentation. Themistocle tenu pour vn des meilleurs, & des plus forts esprits de la Grece, est admiré pour auoir appris en vn an, au milieu des Perles, à parler Perlien. Et depuis quel temps, & avec quels Egyptiens auoit fréquenté cet homme Satyre?

Mais encore qui auroit appris à ces hommes, la mort du Verbe eternal humanisé, & enseigné à ce Satyre les Pseaumes de David, pour les citer cy à propos, comme il fit, ayant conclu son discours par le quatriesme verset du Psaume 18? On sçait bien quels Apostres, quels Disciples, & quels Religieux, ont presché la doctrine Evangelique, dans les pays plus reculez. Si l'on entendoit discourir vn Chinois de quelques mysteres du Christianisme, il ne s'en faudroit point esmerveiller, leurs ceremonies & leurs Idoles ressentant quelque chose de nostre

Religion, monstre assez clairement qu'ils en ont ouy parler. On ne doute point que saint Thomas & saint Barthelemy n'ayent couru & semé l'Evangile par tout l'Orient, & dit-on que le corps de saint Thomas se void encore à present en la Prouince de Maabar, que les miracles frequents & les pelerinages des Chrestiens rendent celebre par toute la contree. Mais que l'on ait iamais presché des Satyres, que iamais des peuples demy-boucs ayent receu d'aucuns Chrestiens les instructions Euangeliques, cela ne se void point, car cela n'a iamais esté.

Auantage, ceux qui reputent ce Satyre auoir esté homme, se fondent sur ce qu'il l'a dit, & moy tout au contraire, parce qu'il l'a dit, j'espere monstrier à veüe d'œil, qu'il n'estoit point homme, mais vn imposteur & vn Demon. Car comment pouuoit-il estre vn homme, & estre du nombre des Faunes & Siluains, que les Gentils

adoroient, veu que iamais les Gentils
 n'ont adoré de tels hommes. Il n'y a
 personne si peu versé dans la cognois-
 sance de l'Antiquité, qui ne sçache que
 les Pans, Faunes, & Satyres des Payens,
 n'estoient point hommes, ains des
 puissances surnaturelles & certains de-
 my-Dieux, qu'ils disoient n'estre point
 visibles à l'homme si bon ne leur sem-
 bloit, & qui se rendoient visibles sous
 cette figure de demy-homme & demy-
 bouc, qui leur estoit specialement a-
 greable, comme à ces autres imaginai-
 res puissances de la mer, les Nereides,
 celle de demy-homme & demy pois-
 son. De faict les Egyptiens, au rap-
 port d'Herodote, estimoient que le
 Dieu Pan, l'un des huit premiers
 Dieux dont l'origine s'estoit perdue
 dans l'esloignement des aages, estoit
 de mesme nature que les autres Dieux,
 & non pas tel en soy, qu'ils le depei-
 gnoient en ses Idoles. Tellement que
 si ce Satyre estoit vn des Faunes & de-

my Dieux chevre-pieds, adorez par les Gentils, ainsi qu'il disoit, il est nécessaire de conclure avec le Prophete David qu'il estoit vn mauvais Demo. Car les Dieux des Gentils, sont tous esprits malins.

Quelqu'un, peut estre pour sauuer ou donner couleur à l'opinion de ces graues Autheurs, qui ont estimé ce Satyre auoir esté homme, pourroit dire qu'il estoit vn de ces monstres que nous auons mis en la seconde espeece des Satyres. Mais la seule consideration de la naissance de tels Satyres Hybrides & incapables d'engendrer, fera foy du contraire, & qu'il est impossible qu'il y ait iamais eu sur terre vn peuple entier de ces monstres, pour deputer celuy cy. Qui plus est, outre quelques raisons, par lesquelles nous auons prouué que ce Satyre n'estoit point homme, fort conuenables & naturelles en cet endroit, comme la cognoissance du voyage de saint An-

roine, & l'intelligence de son langage par ces monstres incognus à tout le reste du monde, il est indubitable, s'il y eust eu vne nation de tels Satyres, qu'ils eussent esté plus frequents. Et commét se pouuoit-il faire que saint Paul, saint Antoine, saint Hilarion, & tous les autres Hermites, qui ont vieilly, & basty tant de Monasteres dans les deserts de la Thebaïde, & couru les endroits plus reculez de cette solitude, n'eussent point descouuert aucun autre de ces Satyres, & recogneu leur demeure s'ils eussent esté en si grosse troupe? On dit, que saint Anthoine cheminât par ces lieux separez, où il estoit tousiours aguetté des embusches du Diable, apperceut deuant ses yeux vne grande plaque d'argent, dont l'esclat pouuoit semôdre & chatouïller les yeux & l'esprit d'vne deuotion moins parfaicte, & que soudain se remettant en luy mesme, il se prit à dire, d'où vient cette richesse dans ce

desert, c'est icy le chemin des oyseaux
seulement, l'on n'y void aucun vestige
d'homme, il ne paroist point que per-
sonne y ait iamais passé, Ha ! esprit de
tentation, c'est vne ruse de ta malice
pour me deceuoir ! Il me semble que
l'on en pourroit dire presque autant
de ce monstre Satyre: car d'où seroit-
il venu dans ce desert, c'est l'habitation
des bestes farouches seulement, l'on
n'y a iamais veu aucuns gardes de trou-
peaux, iamais homme n'y a mis le pied
que des Religieux & des Saints, est-il
pas ayse à iuger que c'estoit vn artifi-
ce par lequel Satan s'efforçoit de sur-
prendre ce bon Hermite.

Le Cardinal Baronius, person-
nage d'une tres-singuliere doctri-
ne, dont les escrits doiuent viure
plus de siecles, qu'ils ne contien-
nent d'annees, cognoissant toutes
ces absurditez, s'est ietté dans vne
autre opinion, autant diuerse de ces
deux premieres, qu'esloignée de la ve-
ritable. Car il dit que ce Satyre estoit

vn animal irraisonnable, c'est à dire, vn de ces Synges dont nous auons parlé, & que la voix de l'homme & le discours de raison dont il vfa, luy fut donné par miracle, comme il est arriué souuent par la permission de Dieu, que les animaux ont faict toutes sortes d'actions humaines & raisonnables, pour secourir en leurs neccessitez les premiers Anachorettes & Saints personnages dans les lieux escartez de toute frequentation. Mais bien que cette opinion semble admissible, & plus religieuse que les deux premieres, ce personnage me permettra pourtant (sans offenser sa gloire) de quitter son party pour suiure la verité, que chacun doit comme sa meilleure amie preferer aux noms mesme d'Aristote & de Platon. Ciceron n'eust point de meilleure raison pour monstrier que Cecilius n'estoit pas capable d'accuser Verres, sinon d'alleguer qu'il auoit à plaider contre Hortensius. Je sçay bien

que l'on me pourra dire de mesme, que ie deurois quitter cette dispute à quelque plume qui peut suiure de plus près le vol de Baronius. Mais quiconque voudra peser en mesme balance, l'opinion de cet auteur & ce que ie soustiens, comme le Iupiter d'Homere faict les destins de l'Europe & de l'Asie pour donner la victoire au plus pesant, ie ne doute point qu'il n'aduoüe librement, que la verité plus forte donne le traict à la balance de mon costé, & qu'il ne se faut point esmerveiller si dans vn long & penible chemin l'on fait quelque faux pas, & si le bon Homere faict vn petit somme dans vn grand ouurage.

La premiere raison & qui seule peut conuaincre en cette matiere, est que si ce Satyre eust esté vne beste brute enuoyee de Dieu vers saint Anthoine, il n'eust pas dit qu'il estoit député de sa trouppes pour le venir trouuer. On dit que Traian ceignant vn de ses Capi-

raines de son espee, luy dit, En chose
 iuste employe là pour mon seruice, &
 aux iniustes, ie te permets de t'en ser-
 uir contre moy-mesme. Et quelle ap-
 arence que Dieu, la suprême Verité,
 eust donné la parole humaine à la bru-
 talité de ce Satyre, pour parler contre
 la verité, & qu'en chose si miraculeuse
 & diuine, ce Satyre eust employé ce
 don de la parole contre sa propre cau-
 se, contre sa veritable mission, & con-
 tre Dieu mesme? Qu'il eust desnié
 auoir esté enuoyé de Dieu, & supposé
 vn menfonge de soy ridicule & imper-
 tinent? Le m'estonne comment il est
 possible que le Cardinal Baronius ait
 peu s'imaginer cette Ambassade ex-
 traordinaire des animaux irraisonna-
 bles. Qu'elle affaire pouuoient ils auoir
 avec saint Anthoine? En quel temps,
 En quel lieu, ce conseil auoit-il esté
 pris? Quel Herault? quel Sergent? quel
 Trompette les auoient assemblez en
 ces nouueaux confices? Qui le pre-

mier d'entre eux, eust parlé pour proposer la matiere dont ils deuoient deliberer, & qui d'entre eux pouuoit parler pour la resoudre, puis que tous sont priuez de la parole? Il ne faudroit plus douter de ce que nous lisons d'Apollonius Thyaneen, de Melampe, & de tant d'autres qui se disoient entendre le jargon des bestes & des oyseaux, & que leurs cris, heurlements, & ramages, estoient autant de langages intelligibles entre elles, & aux doctes augures. Ne pourroit-on pas receuoir les fables d'Esopé pour autant d'histoires? Ne pourroit-on pas croire que les grenouilles s'assemblerét iadis pour auoir vn Roy? que les oyseaux font venus redemander leurs plumes à la corneille? & que les chiens enuoyèrent iadis des Ambassadeurs à Iupiter, pour les deliurer de la seruitude des hommes? Mais qui a iamais pensé que les bestes peussent auoir soing de leur salut eternal, & prier les saints personnages

d'inuoquer pour eux les graces, & implorer l'assistance de Iesus-Christ? Et neantmoins si ce Saryre estoit animal irraisonnable, comme l'estime Baroni-
 nus, on ne le pourroit nier absolu-
 ment: car il ne dit point qu'il fut en-
 uoyé vers saint Anthoine pour autre
 subiect. Il ne faudroit plus estre en
 peine d'expliquer metaphoriquemēt,
 comme la raison & la pieté le desirent,
 le passage de Dauid qui porte, que
 Dieu sauuera les hommes & les bestes:
 Et quand le Verbe eternal a dit par la
 bouche du Psalmiste, qu'il ressembloit
 à vne beste ou cheual de somme, il
 semble que l'on pourroit dire, & en-
 courir le blaspheme, qu'il s'estoit fai-
 ct semblable aux bestes aussi bien qu'aux
 hommes, voulant rendre les vns & les
 autres capables de sa gloire.

Et ce qui tesmoigne encor euide-
 ment de combien s'est mespris Baro-
 ninus en cette opinion pour ne l'auoir
 pas meurement digérée, c'est que ce

Satyre ne pouuoit pas estre animal irraisonnable, puis qu'il estoit du nombre des Faunes & Syluains que les Gentils reueroient. Car il n'y a personne, ny Baronius luy-mesme, qui voulust dire que les Pans & Satyres des Payens estoient des bestes brutes: cela est contraire à l'autorité de tous les sçauants, à la doctrine de la superstitieuse Antiquité, & à ce que les Arcades estimoient de Pan, le reuerant comme vne puissance diuine, qui auoit en sa disposition la recompense des vertueux, & la punition des méchants. Il est bien vray que Dieu dont la iuste bonté assiste tousiours dans les plus extremes abandonnemens ceux qui mettent en luy leur confiance, & qui de sa toute-puissance font vn bouclier de deffence, vne tour d'esperoir, & vn rocher d'assurance, a souuent donné des sentimens miraculeux aux choses inanimées, & des mouuements d'humanité aux bestes plus feroces,

pour secourir les Saints personnages
& leur ministrer dans leurs plus estroi-
ctes necessitez. Les rochers ont vomy
des fontaines, la rosee s'est changee
en manne, & la pluye en viande de-
licate: Vn corbeau ne manqua iamais
de porter à saint Paul sa pitance iour-
naliere, & luy presenter double quand
quelqu'un le visitoit en son hermita-
ge: & les Lions ont faict la charge de
fossoyeurs lors qu'il fut question
d'enterrer son corps. Mais quel se-
cours miraculeux receut ce bon Her-
mite de la visite de ce Satyre, sinon la
terreur & l'effroy contre lesquels il
fut contrainct de se vestir des armes
du maistre qu'il seruoit? & de quels
discours en fut-il entretenu, sinon de
mensonges & de blasphemies qui
pouuoient reduire vn esprit moins fort
en des doutes fort dangereux? Il est
hors de toute vray-semblance & con-
traire à la pieté, de penser que parmi-
racle, Dieu voulust donner à des be-

stes brutes, la voix humaine & le discours de raison, pour dire qu'elles ont soin de leur saluation, & qu'elles ont tenu conseil pour prier les Saincts de les fauoriser de leurs deuotions.

Reste donc à conclure que ce Satyre estoit vn Demon, & d'en tirer les preuues du particulier de cette apparition.

C'est vn artifice ordinaire de Satan, de n'attaquer iamais vn esprit solide & resolu, tandis qu'il est assis constamment sur son cube, ains comme vn bucheron a de coustume, de couper vn arbre à demy par le pied auant que de le pousser du costé où il le veut faire tomber, cet esprit malin preuient la constance de l'homme, & l'affoiblit par l'estonnement, puis faisant iouer les grands ressorts de ses malices pernicieuses, le fait trebucher où il luy plaist: scachant bien que l'esprit flottant dans l'incertitude, il est aisé de le faire pancher de costé ou d'autre & luy persua-

der cecy ou cela. De cette sorte voyons nous qu'il se gouuerna en l'apparition de ce fantosme: car ayant resolu de souffler quelque scrupule en l'ame deuote de saint Anthoine, pour en refroidir les charitez, & le diuertir de sa vie parfaicte, il enuoya l'un de ses satellites sous la figure d'un Hyppocentaure, afin que la Scene estant preparee par l'effroy de ce premier Spectre, il peust iouïr son personnage plus dextrement: Car il est indubitable que cet Hyppocétaure n'estoit autre chose qu'un Demon. Aussi nous voyons par le texte de saint Hierosime que dans le milieu de sa course, il s'esuanoïit tout soudain: & pouuons apprendre de Zoroastre, par vne connoissance particuliere qu'il auoit de ceste matiere, que les Demons paroissent d'ordinaire en monstres demy-hommes, & demy cheuaux. On dit que les perroquets de l'Inde, la premiere fois qu'ils virent les hommes, en

furent tellement estonnez, que s'amusant à regarder & considerer attentiuement ce qu'ils voyoient, ils se laissoient prendre à la main: Le Diable esperoit qu'il en arriueroit de mesme de ce saint personnage, & que tandis que preuenu d'estonnement & d'admiration il penseroit profondement en luy mesme ce que pourroit estre ce mōstre, il tomberoit en ses rets par cette nouuelle surcharge, & se laisseroit surprendre aux scrupules, aux menfonges & aux impietez qui suiuent necessairement la doctrine qu'il luy vouloit persuader de cette espee supposee d'hommes Satyres. Mais saint Anthoine aguerry à telles rencōtres, deslors qu'il sentit l'estonnement glisser en son ame à l'abord de ce second fantosme, soupçonnant quelques embusches de son ennemy, eust recours à l'esperance & à la foy, armes de bonne trempe, & à l'espreuue des coups de Satan.

Or comme le temps que ce Satyre choisit en cette apparition est vn tesmoignage de ce qu'il estoit, le personnage auquel il parut en est encor vne autre non moins considerable: car si tost que saint Anthoine embrassa la vie contemplatiue il eust cet aduersaire commun du genre humain sur les bras, qu'il luy falut combattre avec non moins de patience que de courage. Satan y employa tous les tourments que l'homme peut endurer, & tous les espouuentements que la rage peut excogiter, il prit la forme des choses inanimees, il prit l'apparence d'homme & de femme, de nain & de Geant, il se transforma en toutes sortes de bestes feroces, ores il estoit seul, & ores en trouppes prodigieuse & effroyable, puis en fin se couurant de la figure humaine & brutale ensemble, il l'attaqua sous la forme d'Onocentaure ou Onoscelide demy-homme & demy-asne comme escrit

sainct Athanase, d'Hyppocentaure, demy-homme & demy-Cheual, & de Satyre, demy-homme & demy-chevre.

Qui plus est, si l'on iuge de l'humeur des hommes & de la capacité de leur nature, par les lieux de leur naissance & de leur demeure, les deserts inhabitez ou ce Satyre parut, nous font cognoistre euidentement qu'il estoit vn Demon. Sainct Athanase escrit que la venuë du Messie a faict retirer le Diable & tous ses satellites dans les abysses, aux deserts, & lieux inaccessibles. Ce qui estoit peut estre signifié par le Demon meurtrier des sept marys de Sara, que l'Ange Raphael attacha dans les deserts de la Thebaïde ou parut ce Satyre; car ce lieu semble auoir esté choisi sur tous autres par les Demons. Mais à quoy bon d'en chercher autre preuue, puis que Dieu par la bouche du Prophete Ezechiel, nous en a asseurez, lors qu'il dit, parlant des siens, estant

d'accord avec eux, ie feray cesser les bestes de la terre, & sans en auoir peur ils habiteront dans les deserts & demeureront aux forests: car les bestes de la terre, comme nous apprend Zo-roastre en ses oracles, & saint Gregoire sur le cinquiesme de Iob, sont les Demons: & où le Psalmiste escrit que les bestes de la forest marcheront de nuict, le mesme saint Gregoire, & le venerable Beda interpretent les Demons. Les liures des sages sont plains d'autorités qui nous le confirment, & les histoires d'exemples: Ce que l'on voit specialement dans ceux qui nous ont rapporté des nouuelles du nouveau monde, ou Satan a tenu ses grands iours & regné depuis tant de siecles. Car tous les lieux deserts, les precipices inaccessibles, & les forests reculees, sont habitez par les Demons qui les occupét comme des iustes possessions. Ores l'on y entend des voix, des crys, & des heurlemets plus qu'hu-

maines , ores le concert harmonieux d'une agreable musique : en quelques endroits ils font naistre la nuit dans le milieu du plus beau iour, & en d'autres lieux ils portent les passants dedas des larges balances esleuees au dessus des precipices , les contraignant en cette sorte de confesser à haute voix leurs pechez, & s'ils en retiennent quelque'un sur leur conscience, ils les font culbuter à trauers les pointes des rochers.

Mais ce qui est encore d'un plus iuste poix & plus energique consideration en la circonstance du lieu où ce fantosme prit l'apparence d'un Satyre, est que les deserts & lieux inhabitez, ont tousiours esté specialement frequentez par ces Demons qui sous la forme de Pans, Syluains, ou Satyres, prenoient un singulier plaisir d'estonner l'ignorance des Payens , seduire leur credulité, & les diuertir de l'adoration du Createur commun de tout

le monde. Ces feux que les *Ægyptans* tenoient allumez toute la nuit sur la montaigne d'*Atlas*, selon *Pline*, & celle d'*Æthiopie* surnommee selon *Mela*, *le Chariot des Dieux*, les cymbales, les fleutes, les cornets d'airain, & les voix plus qu'humaines, meslees de hurlemens effroyables, dont elles ressonnoient, estoient artifices des Demons qui frequentoient ces lieux reculez, pour authoriser l'opinion que les peuples auoient de leur Diuinité: car bien loin dans les champs d'alentour, disent ces *Historiés*, rien de cultiue, nulles traces d'hommes ny de bestes, nuls lieux capables d'estre habitez, & seulement vne vaste solitude pleine d'un obscur estonnement, d'un coy silence, & d'une secrete Religion.

Les *Satyres* sont nommez en Grec *Napees*, & en Latin *Syluains*, comme qui diroit en l'une & en l'autre langue *Forestiers*, & les *Gaulois* mesme les appelloient *Drusiens*, c'est à dire *habitas*

parmy les chesnes: car il faut lire ainsi dans saint Augustin, & non pas Dusiens: & de cela peut seruir de preuue, que Pan selon quelques-vns, estoit fils de Dryope, dont le nom est tiré du mot Drys qui signifie chesne. Nous lisons dans Homere que ce Dieu eust en partage les forests avec les montagnes & les vallees desertes: C'est pourquoy les fables ont dit, que ce fut luy qui trouua Ceres en ces lieux escartez, où elle s'estoit cachee pour pleurer la perte de sa fille, comme en ayant seul la parfaicte cognoissance. Et quelle intelligence pourroit-on chercher sous le voile des amours fabuleuses de ce Dieu, qui a si ardemment chery la caioleuse Echo Deesse des rochers, & la Nymphé Pythys, que la ialousie de Boree fit transmuier en Pin hoste plus ordinaire des montagnes, sinon combien ce Dieu se plaît aux lieux solitaires? Et pour quelle autre raison le Poëte Horace auroit-il nommé Faune pro-

recteur des hommes Mercuriaux, c'est à dire nez sous l'Astre de Mercure, qui rend selon Ptolémee les hommes sçauans, sinon pource qu'ils aiment la solitude? Les Payens qui cognoissoient le contentement singulier que ce Dieu prenoit d'habiter dás les deserts, y celebrerent la pluspart de ses sacrifices: Cet oracle de Faune si celebre dans l'Italie, & le Lupercal Temple si fameux du Dieu Pan, furent iadis bastis dans les lieux reculez de toute frequentation.

Mais quittons en fin les Deserts pour considerer les dattes que ce Satyre offrit à sainct Antoine: car d'où procedoit ceste charité, en cet ennemy de toute charité?

Les Grecs & leurs presens doiuent estre suspects.

C'est la coustume de Satan de battre les hommes par le costé plus foible, & les prendre à leurs deffauts. Si bien que sçachant la grande austerité de S. Antoine, qui s'abstenoit quelquesfois de

toute nourriture trois iours entiers, il luy presétoit ce fruit exquis & delicat, pour le tenter & violer s'il eust peu ses longues abstinences: comme il auoit autresfois essayé de faire, quand sous l'apparence de l'un de ces moines il luy apportadu pain, luy remonstrant, qu'il deuoit par la nourriture reparer ses forces à vn nouveau traual, affin d'estre plus robuste au seruice de Dieu. Et ne fut-ce pas la methode qu'il obserua pour tenter nostre Seigneur au desert, luy presentant des pierres avec ces paroles. Si tu es le fils de Dieu, change ces cailloux en pain, plustost que de te laisser affoiblir d'une faim si longue & si ennuyeuse.

Socrate auoit iuste raison ce me semble, de dire à ce ieune homme qui luy fut amené, parle affin que ie te voye: car par le discours on cognoist non seulement la capacité, mais l'humour de celuy qui parle. Cognoissons donc par la harangue de ce Satyre, cet

Ambassadeur si mal equipé, qu'il estoit vn des satellites de l'eternel aduersaire de l'homme. C'est vne ruse des bons Orateurs, dit Quintilian, d'accorder avec grace ce qu'ils ne peuuent nier, affin de persuader avec subtilité ce qui de soy pourroit estre suspect de mensonge. Les Demons ont de coutume d'en faire de mesme, ils meslangent tousiours le faux avec le vray, ils confessent les veritez publiques, affin d'autoriser & de persuader leurs mensonges secrets : parce que s'ils n'auoient rien que des impostures en leurs discours, ils se feroient de prime abord reconnoistre pour seducteurs. La courtisane Raab de la ville de Hierico aduoüa que les espions des Iuifs estoient venus en sa maison, pour faire croire qu'ils en estoient partis comme elle disoit. Telle fut la harangue de ce Satyre, contenant quelque chose de vray & quelque chose de faux, mais toute pleine de cautelleuses deceptions. Car

de dire que les Gentils abusez auoient adoré les Faunes & Syluains, & que Dieu auoit souffert la mort pour le salut du monde, c'estoient des veritez qui se persuadoient d'elles mesmes: mais qu'il fut homme, & député par vn peuple de mesme forme & de mesme nature qu'il paroissoit, c'estoient des impostures ridicules & impies qu'il desiroit faire croire à ce personnage: affin qu'ayant preoccupé son esprit de l'opinion qu'il y auoit vne espece d'hommes Satyres, il le peut abandonner aux doutes & aux consequences pernicieuses qui suivent cette maxime contraire à la raison naturelle & à la sainteté de la Religion. Combien d'autres fois le Diable auoit il attaqué cet Hermite par le mélange artificieux des veritez & des impostures? Par quelle raison esperoit-il vne fois, sous la forme d'un Geant, luy persuader qu'il estoit la prouidence de Dieu, sinon par ce que peu auparauant il luy auoit dit la veri-

ré, ayant recogneu soubs l'apparence d'un petit enfant noir, qu'il estoit l'esprit de fornication? Et pourquoy lors qu'il luy parut touchant de la teste contre le Ciel, luy confessa t'il qu'il estoit Satan, sinon pour luy faire croire que les moines deuoient quitter les deserts qui auoient esté seuls laissez pour retraicte aux Demons, estant Iesus-Christ honoré, disoit il, par toute la terre habitable?

Ce passage du Psalme 18. de Dauid, par lequel ce Satyre finit son discours captieux, est vn tesmoignage apparent de la cautelle de Satan, & me ramene en memoire ce que nous lisons dans Athenee de ceux qui vendoient la chair de chevre, lesquels auoient de coustume pour adoucir & corriger la mauuaise & desagreable odeur de cet animal infect, de porter en la bouche quelque petite branche de myrthe. Car cet ennemy capital de l'homme, lors qu'il veut donner ses impostures

pour veritez, par vn artifice à peu pres semblable à ces vendeurs de chevre, met souuent son entretien malicieux qu'il sçait bien estre tousiours suspect de mensonge, a couuert sous quelque sacré texte de l'Escripture, & tempere ses fraudes de mauuaise odeur par le baulme agreable de cette saincte doctrine. Il en faiet des pieges artificieux pour surprédre l'esprit de l'homme qui ne la reçoit pas seulement comme veritable, mais l'adore comme diuine: faisant en cela comme le Roy Cambyfes, lequel assiegeant la ville de Pelusie en Egypte, s'aduifa de ietter au deuant de ses gens, les animaux adorez pour Dieux par les Egyptiens, dont aduint que ces superstitieux n'osant se deffendre contre leurs Dèitez qu'ils voyoient deuant leurs yeux, laisserent prendre la ville sans aucune resistance. Ne fut ce pas par les Propheties du Psalmiste que le Diable voulut persua-

der à nostre Seigneur de se ietter du haut du pinacle du temple? luy disant qu'il estoit escrit:

Les Anges du tres-Haut ont eu ce mandement

*De preserver ton corps de tout euene-
ment,*

*Leur main te doit porter haut esleué sur
terre*

*De crainte que tes pieds ne heurtent
quelque pierre.*

Et ce mesme saint Anthoine ne fut il pas plusieurs autresfois entretenu par Satan des passages de la Bible? Combien de fois, ainsi qu'il disoit à ses Moynes, a t'il fermé les oreilles oyant à l'entour de luy les Demons discourir des Escritures, craignant non sans raison de se perdre dans les doctes, mais dangereuses interpretatiós qu'ils y peuuent apporter?

*Car Dieu dit au pecheur, pourquoy ta
bouche infame*

Ose t'elle apres moy redire ainsi ma voix,

*Et comment oses-tu chanter mes iustes
Loix*

*Puis que leur sainteté ne touche point
ton ame?*

Il semblera, peut estre, à ceux qui prennent tout au pied de la lettre, qui reçoivent la superficie pour le solide, & qui n'ouurent pas l'escorce pour sçauoir quel bois elle renferme, que d'auoir supplié saint Antoine de presenter en faueur de sa troupe ses deuotes prieres à Dieu, ressent trop son esprit penitent pour estre procedé de Satan, dont le desespoir en bonne Theologie n'est point capable de contrition, dont le cœur, dit Iob, s'endurcira de iour en iour comme vne pierre, & qui ne s'amolira iamais, dit saint Gregoire, par l'eau de la penitence. Et d'auantage que cette recognoissance de la venuë du Verbe eternal en la bouche de ce Satyre, est trop Chrestienne & deuotieuse pour auoir esté proferee par cet ennemy iuré de la

gloire de Dieu , cet enuieux impuissant de sa puissance, & cet aduersaire malin de toutes bonnes œuures. Mais comme la courtisane Nannium sembloit vne des plus belles femmes d'Athenes estant couuerte de ses habits, mais despouillée de ses accoustremets & de ses fards, estoit difforme, laide, & mal agreable aux plus faciles amants. Ainsi pouuons nous recognoître aysement, que la saincteté de ces parolles n'est qu'en l'apparence exterieure, & que le sens ne cache que des surprises, des embusches, & des malicieuses tromperies de Satan.

Car premierement la priere de ce Satyre n'est point adressée directement à Dieu, & prier vn autre de prier, ce n'est pas prier, si de foy-mesme l'on n'est capable de faire telles oraisons, comme on dit que les prieres des personnages deuots sur la terre & des Saincts dans le Ciel, ne sont qu'un supplement de force qui se joint aux

nostres, en augmente la charité, & les rend efficaces enuers celuy auquel nous les adressons. Et ceste voye indirecte & tortueuse dans le discours de ce Satyre, est non seulement suspecte de mensonge, ains estoit seule vn iuste subiet d'apprehender que dans ce Dedale il n'y eust quelque monstre dont la gueule beante & affamee cherchast qui deuorer. Que si toutes les belles paroles de Satan, indices apparens de pieté, deuoient estre receuës en bonne part, que ne pourroit-on s'imaginer de ce Demon qui dans l'Euangile dit à nostre Seigneur, *Je t'adiure par le grand Dieu de me laisser en paix!* Les Demons peuuent reciter l'Ecriture sainte, l'enseigner & l'expliquer doctement, mais ce sont des scorpions qui portent le venin à la queuë, & qui mettent leurs simulations & meschancetez à couuert sous tels voiles. Il n'appartient qu'aux Mahumetans de croire qu'une troupe de Demons, ayant ouy l'Alcoran
de la

de la bouche de leur grand Prophete,
se conuertirent & se firent Sarrazins.

Quant à ceste recognoissance de la
mort du Verbe Eternel, combien de
fois les Demons ont ils esté contraints
en leurs oracles de haut louer son hu-
manité, & d'aduouer, dit S. Augustin,
qu'il estoit le vray Dieu? Cet oracle que
le Demon qui presidoit à Delphe sous
le nom d'Apollon rendit à Auguste
peu apres la Natiuité de IESVS-CHRIST
si celebre parmy tous les Auteurs, en
faict assez de foy, lors qu'estant forcé
par les violentes coniurations magic-
ques de ces Prestres & Pythies par la
bouche desquels il parloit, Il respon-
dit.

*Vn ieune enfant Hebrieu, souuerain des
hauts Dieux,*

*Me contraint, plus puissant, d'abandonner
ces lieux,*

Et de me tenir coy dans l'inferral repaire :

*Quitte donc mes Autels, & apprens à te
taire.*

Encore telle recognoissance de ce Satyre n'est point si simple & deuotieuse, que dans les paroles dont il vfa, l'on n'y voye apparemment les fourbes & æquiuoques de l'esprit de menlonge: car il ne dit pas, *Prie pour nous celuy que nous professons estre mort pour nostre salut*, c'estoit pourtant ainsi qu'il falloit parler s'il eust esté homme; mais il dit, *Prie le Dieu commun que nous cognoissons estre mort pour le salut du monde*. Or ce mot, *Nous cognoissons*, est ordinaire en la bouche impie des Demons, & tesmoigne seulement leur grande science, science sans charité toutefois disent les Docteurs, & non pas leur deuotion: Ainsi voyés nous que cet esprit malin, que les fils de Scæua vouloient coniurer au nom du Iesus de saint Paul, luy respondit. *Je cognois Iesus, & sçay qui est Paul*.

Et par vn sens æquiuoque de ces termes *Dieu commun*, ce Satyre suppose s'efforçoit de persuader à saint An-

thoine, comme il est aisé de veoir, que la mort du Verbe diuin estoit commune & esgalement efficace, pour celuy qui parloit & celuy auquel il parloit, & qu'il y auoit des hommes de mesme nature que ce Satyre, au salut desquels elle se deuoit appliquer aussi bien qu'à celuy des enfans d'Adam. Mais en bonne Grammaire l'intelligence de ce mot *commun*, ne doit point s'estendre plus loing que le mot de *Dieu*, auquel il se rapporte. Et en bonne Theologie, on doit receuoir les paroles de ce Satyre comme vne recognoissance que les Demons sont violentez de faire malgré eux, que Dieu est leur Createur commun, de la main duquel ils ont receu l'estre aussi bien que toutes les choses du monde. En effect à les bien prendre, il n'y a point d'animaux ny de creature inanimée sur la terre, qui ne les doiuent prononcer aussi bien que ce mauuais Demon, & confesser le *Dieu commun qui est mort pour le sa-*

lut du monde. Voire mesme n'apprenons nous pas des sacrez liures, que les Cieux, les Elemens, & tout ce qui est icy bas, de leur nature & dans leurs propres mouuemens, chantent la gloire de Dieu & benissent son nom? Il est vray qu'il y a ceste difference, ainsi que le remarque saint Hierosme, que toutes les creatures dans les sentimens interieurs de ce qu'elles font, loüent la bienveillance & l'immenfité de celuy qui leur donne l'estre en le confessant: Mais les Demons bien qu'ils soient contraincts d'aduouer Dieu pour leur Autheur, ne peuuent toutefois d'eux-mesmes franchement & sans mauuais dessein en loüer la Majesté: & plus la cognoissance qu'ils ont de sa grandeur, est parfaicte, plus l'enuie qu'ils portent à sa puissance, est excessiue. En vn mot, pour finir tout ce que nous auons à traicter de ce Satyre avec l'explication des paroles qu'il profera, si saintes en apparence, nous en dirons ce que le

mesme sainct Hierosme escrit de ces Demons qui recogneurent I E S V S - C H R I S T pour le fils du Tres-haut, que ce n'est pas vne confession volontaire & meritoire enuers Dieu; mais vne extorsion d'une malice affectee, ou d'une violence necessitee, comme d'un pauvre serf fuitif, lequel apres vn long temps venant à reuoir son maistre, est contraint d'aduouer qu'il est son esclaue, & n'apprehende rien tant que sa iuste feuerité. Or ces Demons ainsi disguisez, ont faict naistre les difficultez & les tenebres qui ont enueloppé ceste matiere, ils ont esté les Sophistes dont les subtilitez tromperesses ont rendu les Satyres mesconnoissables: Mais comme les deux Seruiliens pour leur estroite ressemblance estoient pris souuent l'un pour l'autre par ceux qui ne les voyoient qu'en public, & facilement discernez par leurs domestiques: Les Satyres de mesme, sont tellement semblables en la description de leur figure,

que ceux qui ne les verront que par rencontre en passant sur les liures, se trouuerront à tout propos surpris : mais ceux qui en considereront de plus près les actions, y apperceuront des differences si signalees qu'il leur sera facile de recognoistre quels doiuent estre estimez, Synges, Monstres, ou Demons.

Ie craindrois certes que la verité ne me peut iustement accuser de preuariation, & d'auoir peché contre mon propre dessein, si par le silence ie laissois dans l'incertitude, ce que l'on doit croire de ces deux Satyres Faune & Pic, par la faueur desquels Numa cogneust les sacrifices conuenables pour appaiser les fulgurations : & ce que Philostrate au sixiesme liure de la vie d'Apollonius Thyaneen rapporte de deux autres, l'un desquels, par vne concupiscence effrenee violentoit les femmes Æthyopiénes, iusqu'à les faire mourir, & l'autre, se couurat les espau-

les d'une peau de cerf, avoit accoustumé d'aller voir une femme de Lemnos.

Strabon en plusieurs endroits de sa Geographie nous apprend, qu'il y eust jadis certains Prestres de Bacchus nommez Satyres & Silenes, en memoire peut estre des Synges Satyres inseparables cōpagnons de ce Dieu. Ils estoient ses grands Ministres, les Maistres des dances que l'on celebroit en son honneur, & reputez semblables aux Corybantes. Mais qu'est-ce dire autre chose sinon qu'ils estoient ses Orpheotolistes, les cōducteurs du bal en ces vieux Sabats les Trieteriques, & aussi grands Magiciens que les Corybantes ! Or du nombre de ces Satyres Prestres & Sorciers, estoient ces deux genies du pays Latin Faune & Pic, hommes parfaicts & non point demy-boucs, tels que sont les vrayes Satyres. Aussi voyons-nous qu'ils se rendoient souvent invisibles, & quelquefois se reuestoient de diverses apparences : & que suivant l'e-

xemple des Sorcieres de Theſſalie qui par magie tiroient la Lune du Ciel, ils contraignirent vn Iupiter falſifié de ſortir du haut de l'Olympe, c'eſt à dire vn vray Demon du creux de l'enfer, lequel à ſa venuë fit crouler d'horreur les fondemens de l'Auentin, & glacer de crainte les moëſſes de Numa, ne parlant qu'en termes interrompus & douteux. Ce qu'ils firent, non point avec ceſte herbe Oſirite qui par ſa vertu naturelle, ſelon Pline, rappelle ſur terre les ombres des morts : mais par des moyens ineffables, & des coniurations qu'Ouide ne dit point pour ne les ſçauoir pas. A quoy Plutarque ne donne pas vne legere authorité quand il eſcrit, que Faune & Pic alloient par toute l'Italie faiſant les meſmes miracles par drogues, charmes, & arts magiques, que les Idæes Daſtyles qui ſont les Corybantes.

Mais que dirons nous des Satyres de Philoſtrate ? Quelqu'un peut eſtre par

ce forcenement d'amour de l'un & de l'autre, conforme à ce que l'on conte des Satyres Incubes comme il sera veu cy-apres, & par les actions & menaces secretes dont Apollonius se seruit contre celuy d'Ethiopia, se pourroit imaginer qu'ils estoient demons. Mais il est certain que tout le discours de la vie de ce Magicien n'est qu'une imposture, & que le vi. liure specialement, n'est remply que de faulsetez, ainsi mesme que nous l'enseigne Eusebe contre ce sacrilege calumniateur de Dieu, Hierocles: ce qu'il prouue par les Pygmees, les Anthropophages, & ce Satyre mesme dont Philostratus faict mention. Aussi le mensonge qui ne se peut iamais rendre vniforme, se decouure de luy mesme en cet endroit, l'on peut cognoistre ce que l'on doit croire de tout le reste de cette Histoire, par ce que cet Authheur a inuenté contre la verité, & mesme contre les Fables, qu'Apollonius ayant versé du

vin dans vne fosse ou fouloit boire le bestail, & par la force de sa science contrainct ce Satyre d'y venir boire, il perdit la fierté maligne de sa nature, & l'ardeur de sa concupiscence dans ce breuuage, sans plus malfaire ny poursuivre les femmes de ce pays. Car iamais personne n'a dit que les Satyres esteignent leur malice & leur lasciueté par le vin, & les Fables les representent, tousiours yures & tousiours furieux d'amour: d'où vient que ceux-là qui veulent expliquer mystiquement cette compagnie bouffonne du bon Pere Bacchus, disent, qu'elle nous monstre que Priape est fils de Bacchus, & que le vin est le veritable feu d'amour. Ce conte faict à plaisir de ces Satyres qui ne furent iamais, pourroit estre augmenté de plusieurs que les Poëtes ont forgé avec ce qu'ils en ont discouru: tel que fut ce Marsyas qui perdit sa peau pour auoir impudemment preferé son haut-bois à la harpe

d'Apollon : tel que ce Satyre fabuleux dont la Nymphé Amimone fut pour-
suiuie d'amour l'ayant refucillé par
mesgarde, du jauelot qu'elle pensoit
ieter contre vn Cerf: tel que celuy qui
rauy de la beauté du feu la premiere
fois qu'il le vit, se fut precipité dedans
pour l'embrasser si Promethee ne l'en
eut empesché, & tant d'autres qu'il est
facile, voireaux plus simples, de dis-
cerner dans les Fables, d'auec les trois
especes de vrayz Satyres dont nous
auons parlé.



Liure V.

De l'erreur qui fit croire qu'il y auoit des faux demy-Dieux Satyres, & en adorer les idoles : & des explications de la figure de Pan.



ENCORE que dans le liure precedent nous ayons parlé de la faulſe diuinité des Satyres & Syluains, & pour le particulier de leur adoration renuoyé les eſprits curieux à ceux qui en ont expreſſement eſcrit : nous auons pourtant eſtimé qu'il ne ſera point hors de propos de traicter en cet endroiect ſeparement deux choſes concernant la figure monſtrueuſe de ces demy-Dieux boucquins : La premiere, d'où s'eſt gliffée dans les ames du vulgaire,

la croyâce erronee qu'il y auoit de tels genies celestes de ceste forme grotesque & chimerique: & l'autre, par quelles sçauâtes mythologies les Philosophes plus clair-voyants en la nature de Dieu, ont discouru de l'Idole de ces Pans. Dont celle-là, qui ne se trouuera point ailleurs, me faict imaginer que la nouveauté luy donnera quelque grace: & celle-cy ou nous auons assemblé ce que les auteurs en ont escrit en diuers lieux, & enrichy leurs inuentions de cequ'ils auoient obmis, ne sera peut-estre point defagreable.

Il semble bien que les Grecs, surpris de l'erreur populaire des premiers siècles, tous les Dieux desquels estoient nez d'incestes & d'adultères, & monstrueux en leur figure, ayēt fait ces demy Dieux boucquins, sur l'image de ces môstres d'horreur engédrez malgré la nature. Ce que l'on pourroit autho-
riser par la naissance de Pan, qu'ils disoient fils de Penelope & de Mercure

changé en bouc, ou de Iupiter & de Hybris, c'est à dire, de la honte. Mais outre, qu'il est hors d'apparence de croire qu'ils ayent admis quelque Diuinité en ces monstres abominables, & que l'adoration des Satyres est beaucoup plus ancienne que ces Fables, Il est certain que l'Egypte, matrice infortunée de l'Idolatrie, les ayant reçus la première dans son giron, en a formé les Idoles sur la figure des Syn-ges Satyres, & que les Grecs leur ayant fait passer la mer en ont accru la faul-se Diuinité par des mysteres qu'eux mesme ne cognoissoient pas.

Les Egyptiens, plus estranges en leurs superstitions qu'enigmatiques en leur Doctrine, estoient si peu curieux de la verité, que de toutes leurs ordonnances ciuiles, ils en faisoient des ceremonies de Religion: & se laissant emporter aux inuentions des Poëtes qui ont tousiours esté bien reçus parmy eux, ils mettoient en oubly la rai-

son premiere de telles institutions, & s'abandonnoient à certaines vénéra-
tions mystérieuses, dont il estoit déf-
fendu de chercher la cognoissance.
L'hommage qu'ils rendoient aux ani-
maux avec tant de reuerence, proceda
de cette mauuaise coustume. Car les
chefs de guerre pour empescher les de-
fordres de leurs armées, qui leur rauis-
soient à toute occasion la victoire
d'entre les mains, inuenterent les en-
seignes appellees Saurites, qui estoient
halebardes au haut desquelles certains
animaux estoient attachez, & selon leur
diuersité distinguerēt les combattans.
Et cet ordre leur ayant en plusieurs
rencontres reussi heureusement, le peu-
ple porta du commencement quelque
honneur aux animaux dont ces ensei-
gnes estoient composees: & depuis les
Fables leur ayant persuadé que les
Dieux chassez du Ciel par le Geant
Typhon, ou par les meschants qui
estoient en bien plus grand nombre

qu'eux s'estoiét venus cacher en Egypte ~~par~~ sous la peau de diuerfes bestes; ils esleuerent des autels à ces bestes, & les adorèrent en fin pour les Dieux mesmes. Ce qui faict dire à Iuuenal.

Tous adorent le chien & personne Diane.

25 Ainsi donc apres la mort d'Osiris, ou Bacchus, ayant institué quelques Festes & Sacrifices à l'eternité de sa gloire, ils n'oublierent pas entre les ceremonies qui y estoient ordonnees, les danfes & plaisanteries de ces Synges Satyres que ce Prince faisoit tousiours mener à sa suite: & à l'entour des statuës qu'ils luy dresserent en les Temples, y representèrent les images de ces animaux. Si bien que par succession de temps ces Festes s'estant esloignees de leur institution, il en arriua ce que S. Cyprian escrit de toutes les ceremonies religieuses des Payens, lesquelles à leur naissance n'ayant esté qu'une consolation des peuples en la perte de leur Prince, furent receus par les suiuaunts pour veritables

tables factifices & hōneurs diuins. Ofi-
ris, en memoire duquel ces solemni-
tez estoient celebrees fut estimé Dieu,
& les Satyres qui en accompagnoient
la pompe participerent à la diuinité.
Et comme les courtisans d'Æthiopie
auoient de coustume de se rendre en
toutes leurs parolles & leurs actions
semblables à leur Roy, dont ils estoient
les vrays Synges, paroissant borgnes,
s'il n'auoit qu'un œil, & begayant s'il
n'auoit pas la langue libre: De mesme
ces Synges Satyres, dōt la Cour de Bac-
chus estoit remplie, ce sont rendus dans
l'esloignement des aages, tellement
semblables à leur Prince, que le vulgai-
re en fin preoccupé de mille fausses
opinions, adorāt son idole cōme d'un
puissant Dieu, s'est facilement persua-
dé que ceux qu'il voyoit representez à
l'entour de luy, estoient des genies ce-
lestes & de grands Demons, lesquels
sous cette figure estrange, à l'exemple
del'Adonis de Venus, & de l'Arys de

Cibele, affistoient tousiours de leur
presence la feinte diuinité. Cette croy-
ance leur fut confirmée par l'autorité
des Poëtes, lesquels n'osants contre-
uenir aux reigles de leur art qui leur
deffend de parler selon la nuë verité,
ont escrit de Bacchus, comme de quel-
que Dieu, de ces Synges comme de
demy-Dieux, & de tout ce qui estoit
de memorable en ses hauts faits com-
me de choses miraculeuses, & diuines.
Et à ces fictions dōnerent vne grande
ouuerture & autorité, les longues do-
leances de ces peuples qui auoient de
coustume de faire prononcer par qua-
tre vingts iours entiers, apres la mort
de leur Roy, vn poëme funebre deux
fois en chasque iour pour en celebrer
la memoire, & rappeler l'ame des en-
fers. Et qui ne iugera que les Idoles de
ces Synges representez à l'entour de
Bacchus, ont fait croire aux Egyptiens
qu'il fut assisté de tels demy-Dieux &
Genies celestes, puis que le chien qui le

fuiuoit par tout comme vn garde fidele de sa personne, fit monter leur superstition aueuglee iusqu'à ce point, que de se feindre & adorer vn Dieu demy-chien? Mais que ces Synges n'ayēt fuiuy Bacchus dans les resueries de son Apoteose; comme ils auoient faict en sa vie, l'on en peut dōner deux raisons. La premiere est, qu'en tous ses Temples, en toutes ses ceremonies, & en tout ce que les Poëtes en escriuent, ils ne s'est iamais veu sans vne bonne troupe de Satyres. En sa grande feste de Grece, quand il trouua le miel dans la Thrace, & prenant Ariadne pour femme, Ouide ne luy dōne pour compagnie que ces faux demy-Dieux rail-lards & plaisants. Estoit ce pas aussi la coustume de leur donner le faye de foldat, & le Thyrsse en la main (qui estoit vne picque entouree de fueilles de vigne ou de lierre) en memoire de ce qu'ils auoient accompagné Bacchus en les expeditions militaires? Et Pau-

ſanias remarque pour choſe bien extraordinaire, qu'au païs d'Elide le vieillard Silene auoit vn Temple, non point comme par tout ailleurs, commun avec le Dieu Bacchus, mais particulier & conſacré à ſa Dèité ſeulement: ce qu'ils firent peut-eſtre en re-
cognoiſſance de ſon eſgarement en la Phrygie.

L'autre raiſon eſt tirée de la iuſte reſſemblance qu'il y auoit entre ces faux Dieux & les Synges Satyres. Car tout ce que nous auons eſcrit de leur figure & de leur nature, eſtoit donné aux idoles de ces Pans: & les Demons ſçauoient bien n'en rien obmettre quand ils ont voulu apparoir ſous cette forme. De leur figure perſonne n'en peut douter. Car premierement eſtoient ils paſſez avec les parties inferieures d'un bouc, qui les ont fait nommer par Horace Chevre-pieds, & par Ouide demy-Boucs: & avec deux cornes ſur le front, qui donnerent ſubiect à

Deriades en les voyant de loing, de dire qu'ils auoient vne teste de taureau? Car de penser que Nonnus les ait faict semblables aux taureaux, ce seroit contre l'autorité de tous ceux qui en ont escrit.

Que si les Synges Satyres sont couuerts d'un long poil, qui leur faict porter le nom de Velus, comme nous auons monstre: ne sçait-on pas bien qu'il estoit ordinaire, ainsi que dit mesme Philostrate, de peindre les Fau-nes velus? dont Apulee nomme Mar-fyas un Ours à deux pieds. Les Anciens representoient les Satyres sur le theatre avec des tuniques couuertes d'un long poil des deux costez, & les Silenes couuerts de mouffe & d'estouppe. Et dans l'Ecriture sainte ils n'ont point d'autre nom que les Velus. Esaye pre-disant la desolation de Hierusalem, escrit que les bestes sauuages & les fantosmes en habiteront les ruines, &

que les Velus y danferont & s'escrieront avec des hurlements effroyables l'un à l'autre: ce que la plus part des doctes, dit Eucherius, interpretent des Faunes & Syluains. Et dans le Leuitique où Dieu deffend aux Israëlites d'immoler leurs enfans aux Demons, le texte Hebraïque porte *Seirim*, c'est à dire, Demons velus, que les Grecs appellent, *Trichiones*: (car *Sear* signifie le poil, dont le bouc est nommé *Seir* à cause du long poil qui le couvre.) Par où nous sont naïfvement exprimez ces Pans & Satyres de l'Antiquité. Ce qui nous est rendu notoire par la traduction des Septante, qui ont appelé ces Demons *Mateons*, c'est à dire, *Faunos*, qui est le nom propre des Faunes, comme nous auons dit ailleurs: & par cette deffence que Dieu faiet aux Israëlites de leurs immoler des enfans. Parce que tout ainsi que les Payés auoient de coustume d'honorer de victimes humaines, le Saturne des Carthagi-

nois, le Iupiter des Latins, le Mars des Thulites, le Theutates des Druides, le Viracocha des Mexiquains, & mille autres tels Demons aides du sang & de la perte eternelle des hommes: aussi reueroient-ils les Faunes comme Dieux Alastores & Palamæes, c'est à dire, malfaisants & homicides, & leur immoloient des hommes viuants, ainsi que les Arcades à Pan leur grand Dieu, dans ce Temple où l'on disoit que les corps ne faisoient point d'ombre: en memoire peut-estre de ce Faune qui sacrifioit ses hostes à son pere Mercure. Aussi dès lors que les femmes estoient accouchees, ils inuoquoient *Intercidone Pilumne & Denerre*, & avec certaines ceremonies faisoient priere à Syluain de se tenir dans les forests & auoir soing de l'agriculture, dont ils l'estimoient vn des plus puissants Dieux, & luy immoloient à ce subiect, le pourceau inuenteur du labourage. Ce que l'on ne

prattiquoit pas, comme quelques vns ont pensé, pour l'opinion qu'ils auoient que Syluain estoit ce fantosme nocturne, ou plustost cette maladie que l'on appelle le Pefard: mais de crainte que ce Demon malicieux ne fit quelque tort aux enfans nouveau nez. Car chez les Rabins, les Demons appelez *Lilithim*, c'est à dire, Faunes & Syluains, dont la naissance trop honteuse selon leurs contes me ferme la bouche, s'efforçoient par tous moyens de mal-faire aux petits enfans quand ils venoient de naistre. Ce que l'on peut apprendre encor du Poete Lyrique en ses Odes, où il dit:

*Toy qui vais poursuivant d'une amour
eternelle*

*Les Nymphes, que souuent tu ne pûs
arrester:*

*Passé à trauers mes champs, Faune, sans
rien gaster,*

*Ny mal-faire aux enfans qui sont à la
mamelle.*

Cette rougeur esclattante dont la face des Synges Satyres est enluminee, ne fut pas oubliée aux Idoles de ces Demons. Aussi Nonnus escrit que les Satyres se peignoient de vermillon auant que de combattre: & dans Virgile on void la Nymphé *Æglé*, qui barboüille de jus de meures les temples & le front de *Sylène* endormy: car les meures ou les grains d'hieble estoient reputés par les Poëtes, estre la peinture ordinaire des Faunes. Ce qui donna subiect aux peuples qui croyoient que *Pan* & *Iupiter* n'estoient qu'une mesme diuinité, de peindre aussi de mesme couleur la face de *Iupiter*. D'où vient que les triomphants à Rome, qui se reuestoient de la robbe, du sceptre & des autres enseignes de *Iupiter Capitolin*, se rougissoient aussi le visage, pour faire paroistre que leur puissance estoit une vraye image de celle de Dieu: ce qui fut prattiqué premierement en la personne de *Camille*.

Depuis à l'exemple de leur souverain, tous les autres Dieux en *Æthiopie* portoient cette couleur : le iour des Festes à Rome on en coloroit toutes les Images, & les Censeurs à l'aduenement de leur charge, faisoient repeindre tous les Dieux du Capitole. En fin la vanité portant l'homme à tout ce qui est grand & diuin, les Roys d'*Assyrie* & de *Mede*, & les Princes d'*Æthiopie*, se colorerent la face de cinnabre.

Mais pour retourner au rapport de la figure de ces Synges aux Satyres Demons : *Philostate* escrit que l'on a de coustume de pourtraire les Satyres avec le derriere de cheval, c'est à dire, avec de longues queuës, car ils en portent tous, dit *Lucian* : & *Pan*, chez le mesme, venant saluer *Mercur*e pour son pere, comment serois-tu mon fils, luy respond *Mercur*e, avec cette longue queuë que tu portes ? C'est pourquoy les Fables ont dit, que *Silene* fut

jadis vn Roy de Nyse, dont l'origine estoit incognüe, lequel ayant eu naturellement vne longue queue, transmit cette marque à tous les Silenes que l'on disoit estre de sa race, & que Catulle appelle natifs de Nyse.

Et pour preuue manifeste que les Idoles des Satyres n'estoiët autre chose que le pourtraict de ces Synges representez debout sur les deux pieds de derriere, c'est que tous les Faunes & Silenes, comme escrit Lucian, estoient de petite stature, & le Simulachre de Pan fort petit, comme on void dans Pausanias. Au pays d'Attique l'on monstroït vne certaine pierre, dit le mesme Pausanias, assez basse, pour seruir de siege à vn petit homme, sur laquelle on contoït que Silene se reposa lors qu'il vint en ce pays avec Bacchus: & le peintre Thimante pour représenter la grandeur d'vn Cyclope par comparaison aux petits hommes, auoit peint des Satyres, mesurant la

grandeur de son poulce avec le Thyrs-
le: mesme que les Demons qui pre-
noient l'apparence de Satyres paroif-
soient tousiours, comme on les peut
nommer apres sainct Hierosme, en
petits hommonceaux.

Quant à la nature des Synges Saty-
res, nous auons remarqué trois quali-
tez qui leur sont propres & particulie-
res, l'habitation aux forests & deserts,
la souplesse des membres aux dances
bouffonesques, & vne excessiue rage
d'amour: lesquelles toutes sont com-
munes dans les liures des Anciens aux
Satyres Demons. De leur habitation
dans les lieux escartez nous en auons
suffisamment discouru ailleurs: de sor-
te qu'il nous reste seulement leurs dan-
ces grotesques, & leurs feintes impudi-
citez, qui ont abusé la simplesse de tant
de pauvres ignorans.

Nous voyons dans Homere les Fées
demener leurs carolles au son de la flu-
ste de Pan, & en maints endroits chez

les autres Poëtes, luy meſme ſe met le premier à la dance avec toute ſa troupe. Les Nymphes pourtant chez Philoſtrate ſe faſchent de le voir dancier de mauuaife grace, & ſe mocquent de ce qu'il ne faiët que trepigner hors de cadence. Et peut-eſtre que ceſte eſpece de dance Satyrique nommee Sicinnis, dont les Satyres ſont dits Sicinniſtes, eſtoit vne image de ce menu trepignement du Dieu Pan, conforme aux demarches des Synges quand ils vont ſur les deux pieds de derriere. Les Poëtes meſmes, auxquels les Dieux ne ſe ſont iamais cachez, ſ'eſcarrant par les deſerts auoient de couſtume d'eſtre de la partie, ainſi qu'Horace le ſçait bien dire de luy-meſme.

Les Faunes cheure-pieds à la plante legere,

Carollant à l'ombrage frais

Avec les Nymphes des foreſts

Me retiennent ſouuent eſloigné du vulgaire.

Ce que l'on peut rapporter ſi ces aſſemblees eſtoient veritables aux dan-

ces des Sorciers avec les Demons, les iours de leurs ceremonies qu'ils appellent Sabbats: Car les Anciens & plus fameux Poëtes estoient tous Magiciens, & ces Satyres Demons.

Mais s'il est vray que les dances au son des cymbales, comme dit vn Poëte, soient les armes & les allumettes de Venus: comment pouuoient les Satyres dancer à tout propos au son de leurs cymbales avec ces belles Nymphes sans les prier d'amour? & quelle merueille si tant de fois ils ont couru ces fuyardes à trauers les champs? Les Satyres sont tousiours representez dans les Fables avec vne lasciueté si prodigieuse, qu'Ouide reproche à Silene comme vn crime, qu'il n'est pas encor vieil à son aage. Mesme que ce mot Satyrique est æquiuoque chez Theocrite & Plutarque, pour signifier lascif. Et ceste herbe que Theophraste estime d'une efficace merueilleuse pour exciter vn appetit, ou plustost vne rage d'amour

au delà des forces humaines, & de laquelle on dit qu'Hercule auoit vſé lors qu'il engroſſa en vne meſme nuit les cinquante filles de Theſpie, n'a point eu de nom plus conuenable que celui de Satyrion. Que ne peut-on iuger du Dieu Pan, lequel interrogé par ſon Pere Mercure ſ'il eſtoit marié, reſpondit qu'il ne le ſeroit iamais, pource qu'il ne pouuoit eſtre content d'une ſeule femme? Eſt-il pas vray que ſes deſirs ne furent iamais arreſtez, & qu'il ſ'eſt toujours eſſorcé de ſurprendre quelque Nymphé à la deſrobée? Mais ſ'il ſe vante d'auoir deceu la Lune ſous la toiſon blanche dont il couurit ſes defformitez, la fleute qu'il porte en la main le fera ſouuenir qu'il fut deceu luy - meſme par des Dieux plus puiffants, qui luy firent embraffer des roſeaux au lieu de la belle Syringue: & la nudité des ieunes gens qui celebrent les Lupercales, eſtoit vne marque, non ſeulement des feux dont il bruſla pour

Iole, mais encor du mauuais traitement qu'il receut d'Hercule, qu'il auoit pris sous les habits d'Iole pour Iole mesme. Mais à quoy bon tant de Fables ? Les Demons sous la forme de Satyres ont faict paroistre vne lasciueté si furieuse, qu'ils en ont porté le nom d'Incubes : dont mesme en Grec Pan fut appellé, *Ephialte*, en Latin, *Inus*, & en Aramean, *Ennius*.

Or de discourir icy de ces Incubes, si priuez des organes du sentiment, ils peuuent sentir les chatouillemens d'une action hors les termes de leur nature, & s'ils peuuent donner d'eux mesmes la naissance à quelques hommes : outre que ce feroit nous esloigner de nostre subiect, l'honnesteté semble nous le deffendre : Et pour en toucher seulement quelque chose à l'ombre des Fables, nous nous contenterons de dire qu'il estoit ordinaire parmy ces Anciens, de croire que les Dieux venoient du Ciel en terre chercher

chercher leurs contentemens entre
 les bras des femmes mortelles, & les
 Deesses foubsmettre leur diuinité aux
 homines qu'elles aymoient: & que de
 ces adulteres diuins naissoient les He-
 ros, mettoyens entre les Dieux & les
 hommes. Mesme qu'à Babylone, à
 Thebes, & à Patare, ils enfermoient
 à certaines festes vne femme dans le
 Temple de Iupiter, se persuadant que
 ce Dieu venoit passer la nuit avec elle.
 Mais ces Dieux supposez estoient ou
 bien Demons, qui pour autoriser le
 vice, entretenoient le peuple en ces
 deshonnestes ceremonies: ou bien des
 hommes qui cherchoient l'effect de
 leurs cupiditez sous le manteau de la
 Religion. Que s'ils estoient hommes
 ils ont peu donner l'estre à d'autres
 hommes, que l'erreur faisoit croire fils
 de ces Dieux supposez: ainsi Olympia-
 de se laissa persuader qu'Alexandre
 estoit fils de Iupiter Ammon, & non
 pas de Naectenabor Egyptien, qui la

trompa deffous les habits de ce Dieu: & Syluie, que Mars l'auoit engrossée du fondateur de Rome & de son frere, & non pas son oncle Amúlius qui la venoit voir armé de toutes pieces. Que s'ils estoient Demons, il est certain, selon les doctes Payens, qu'ils ne pouuoient auoir lignée: de faict les Egyptiens ne pouuoient admettre, dit Herodote, ce que l'historien Hæcatæe, contoit de luy mesme, qu'un Dieu peut engendrer vn homme: & Plutarque tient cette doctrine, qu'une essence diuine ne scauroit prendre plaisir à la beauté d'une femme, & faire germer en son corps quelque commencement de geniture. Mais pour finir ce premier point, tout ce que la Religion des Payens nous apprend de ces Dieux demy-bouquins, a tant de rapport à ce que l'histoire Naturelle escrit des Synges Satyres, qu'un œuf ne ressemble pas mieux, dit le prouerbe, à un autre œuf. On lit dans Plin que Marc An-

toine autrefois acheta pour freres in-
meaux, deux ieunes enfans de diffe-
rente nation, tant ils estoient sembla-
bles, mais qu'il s'apperceut bien qu'il
auoit esté deceu, lors qu'il les ouyt par-
ler de diuerse langue: Les Payens de
mesme se sont bien laissez tromper par
cette vaine ressemblance des Démonz
auecces animaux: mais plus stupides,
ils n'ont iamais peu se desabuser & les
reconnoistre à leur parole. Car bien
qu'ils ayent veu les impostures mani-
festes, les prodiges, & les detestations
de ces faulses & mensongeres diuini-
tez, ils se sont pourceant abandonnez à
leur folle croyance, & malencontreu-
sement opiniastréz en leur aueugle-
ment & ignorantes superstitions.

Le Poëte Lucilius auoit de coustu-
me de dire des Satyres de Perse, que les
ignorans n'y pouuoient rien com-
prendre, & que les Doctes y trouue-
roient des intelligences curieuses que
l'auteur mesme n'auroit iamais

pensé de scire. L'on en peut dire autant de toutes les Fables de l'Antiquité. Car les esprits abaissez, dont l'ignorance borne la sapience dans l'escorce des termes, ont receu les fictions Poëtiques toutes simples, & comme si le manteau des obscuritez qui les enueloient, n'eust esté suffisant pour leur en ôter la vraye cognoissance, ils y ont adiousté celuy de la Religion, afin qu'il ne leur fut pas permis de la rechercher. Mais ceux qu'une meilleure nature a guidez à une plus haute speculation, non contents de descouvrir le sens raisonnable que l'on y auoit caché, y ont recherché des secrets que les inuenteurs mesme ne s'estoient pas imaginez: & de là sont procedées toutes ces mythologies & doctes esclairecissements des Fables que les sages ont transmis à la posterité, & qui par le grand nombre se sont rendus moins intelligibles que les Fables mesmes. Ce que nous auons escrit

de la figure , nature & diuinité du Dieu Pan, & des Satyres, n'a point eu faute de ces doctes commentateurs. Platon le premier, a dit que Pan estoit l'image de la parolle fille de l'eloquence, comme luy fils de Mercure Dieu de l'eloquence, & que son nom signifioit, Tout, pource que la parolle contient en soy toutes choses par le discours qu'elle en peut faire, voire qu'elle est elle mesme toutes choses: comme s'il eut cogneu par les efforts naturels de son entendement, ce que personne ne luy auoit appris, que la parolle a tiré du neant tous les estres du monde: *Il n'a faict que dire*, escrit Dauid, *& aussi tost ils ont esté faicts*: & qu'au commencement cette parole qui estoit en Dieu, & qui estoit Dieu mesme, a créé dans les choses tant de subiects de hautes admirations. Et dans les diuerfes natures de l'Idole de Pan, ce Philosophe disoit que l'on pouuoit cognoistre facilement qu'il y

à deux sortes de parolle, dont la première, representee par le visage de l'homme esleué tousiours vers les Cieux, reside dans le Ciel entre les Dieux, de qui les parolles sont autant d'arrests irreuocables qui ne sont jamais vains, & des serments eternels dont ils ne peuuent se repentir. Et l'autre que les parties inferieures & cheminantes sur la terre nous mettent deuant les yeux, est celle, qui couuerte de mensonges impossibles à descouurir, amuse les hommes par ses faulses apparences, comme on faiët l'enfant avec des osselets.

Quelques autres ont recherché dans l'image de Pan le pourtraict de l'homme, nous faisant croire que de ses deux parties, la plus noble c'est à dire l'ame, qui n'a point d'autre obiect que Dieu, au sein duquel elle s'efforce de retourner comme elle en est descenduë, soit peinte dans les parties superieures de ce Pan: & dans les inferieures, brutales

& attachees à la terre, le corps animal & corruptible dont la pesanteur importune, agraue incessamment la subtilité de l'ame vers la terre. Mesme que le nom de ce Dieu qui signifie Tout, enseigne que l'homme est vn mode racourcy & vn autre Tout, dans la petitesse duquel toutes les merueilles de ce grand Vniuers sont par merueilles renfermees. Il semble que S. Gregoire n'ait pas voulu seulement apporter de l'esclaircissement à ceste explication, mais luy donner de l'autorité: Car sur le passage de l'Escripture où nostre Seigneur commande à ses Apostres de prescher l'Euangile à *toute creature*, il escrit que cela ne se doit rapporter qu'à l'homme, parce qu'il est seul toute creature, pour lequel Dieu a formé le monde, & qui contient en soy toutes choses, non seulement les natures elementaires, mais aussi les essences surnaturelles, ayant l'estre des pierres, la vie des arbres, le sentiment des animaux, & l'in-

telligence des Anges.

Mais l'opinion plus commune est de ceux lesquels sçachans que leurs de-uanciers pour se rendre complaisants au vulgaire, comme nous disions, auoient escrit les effects incompre-hensibles de Dieu, en lettres sacrees & hieroglifiques mysterieux, se sont efforcez de chercher dans toutes les Fables (vrais Silenes d'Alcibiade) quelque image de la supreme diuinité. Et bien que l'adoration des Faunes & Satyres ne soit pas vne inuention mystique des sçauants, ains vne erreur du peuple qui a receu les Statuës des Syn-ges Satyres pour des Images de demy-Dieux, ils n'ont pas laissé de philoso-pher sur l'Idole du Dieu Pan, & par la force d'un beau discours monstre qu'il pouuoit estre le pourtraict du princi-pe vniuersel de toutes generations, & de cette vertu efficace qui produict entretient & foment toutes les choses du monde. Et de faict Orphee

nomme Pan *Engendrant tout, & auteur des choses*, & Suidas *Biarée* comme donnant la vie: aussi voyons nous dans le Comicque Latin, que Silene se nomme luy-mesme Dieu de la Nature: & que Virgile luy faict chanter la premiere naissance de l'Vniuers, ne pouuant introduire personne qui en eust vne plus parfaicte cognoissance que celuy qui l'a faict. Le docte Grammairien Seruius escrit que les Latins se sont trompez d'auoir donné à ce Dieu le nom de Syluain, & que cet abus est procedé de la double signification du mot Grec: Car les Grecs l'appellent Dieu de Hylé, & Hyle ne signifie pas seulement vne forest, mais plustost la lie & la matiere putrescie des Elemens seule propre à la generation. Les Arcades encor mieux, entendoient par ce mot de Hyle toute matiere generalement quelconque, soit celeste, ou terrestre, laquelle est subiecte à la puissance & au gouuerne-

ment de Pan. Et pour cette raison
me Machobe le faict mesme Dieu que le
Soleil: ce que Ciceron semble donner
à entendre, disant que Pan estoit fils
du Ciel, car Helios estoit fils d'Oura-
nos. C'est pourquoy les Grecs dans
tous ces temples, auoient de coustume
d'entretenir vn feu perpetuel & vne
lampe tousiours ardente: Car le feu est
le principe & le commencement de
toutes choses, attendu que c'est la sub-
stance la plus mouuante qui soit en
toute la nature, & que la generation ne
se faict point sans mouuement: &
void-on que toute autre matiere, quād
la chaleur luy defaut, demeure oisive
& immobile, appetant & recherchant
la vigueur du feu comme son ame.
Aussi les Pythagoriciens vouloient que
le milieu du monde fut le siege & le se-
jour propre du feu, lequel ils appellent
Vesta, & disent estre l'vnité, estimant
que la terre demeure suspenduë à l'en-
tour du feu comme du centre du

monde. Parquoy Numa, homme de grand sçauoir, le consacra, & voulust que les Vestales le cōseruassent sans le laisser esteindre, ne plus ne moins qu'vne viue image de la puissance eternelle qui regit & gouuerne tout: ce que les Grecs & ce grand personnage Romain auoient appris des Ægyptiens, lesquels reuestoiēt les Idoles d'Osiris, adoré pour le même principe & germe generatif des choses, d'habillemens reluisants comme feu. Le feu d'amour dont cette Deïté brusloit incessamment, ouurit le chemin à cette croyance plus Philosophique que Religieuse: Car ils estimoient qu'il falloit comprendre en cette lasciueté, les generations perpetuelles de la Nature, qui ne cesse iamais de faire germer en vn mesme instant dans toutes les parties du monde, vne infinité de nouueaux estres: Ce que Plutarque semble donner à entendre, quand par le principe de Nature, que Hesiode nomme

Amour, il veut que Osiris soit signifié. Et les Egyptiens, comme enseigne Diodore, ne discouroient point de l'amour de Pan d'une autre sorte: d'où vient qu'ils l'adoroient à Mendes sous la figure d'un bouc, & que les Idoles qu'ils en auoient esleues, & de tous les autres Satyres, portoient la partie seruant à la generation, grande & redressée, pour figurer leur vertu d'engendrer perpetuelle & sans repos. Ainsi estoit peint Osiris parmy eux, & Priape chez les Grecs, dont les mesmes diuinitez reçoient mesmes intelligences: & les signes Satyriques dont Plin^e faict des amulettes souverains, estoient ces Phalles & Priapes pendus au col des ieunes enfans, pour les preseruer contre les fascinations des yeux malins & des langues charmeresses.

Cette explication de l'amour de Pan, se réd d'autant plus vray-semblable & naturelle, que son ardeur passionnée luy faisoit chercher d'une affectio par-

ticuliere les doux embrassements des Nymphes, c'est à dire, des eaux. Car sous le voile de cette inuention l'on vouloit entédre que ce principe chaud & actif, appete par l'inclination de sa nature vne matiere humide, dont l'estroite vnion donne l'estre à toutes les choses: car la chaleur & l'humidité sont les deux principes, masse & femelle, de tout ce qui subsiste en l'Vniuers. Ce qui a fait croire aux Stoïciens que les Astres, qu'ils estimoient de nature de feu, estoient entretenus & nourris des vapeurs humides de la terre, & qu'en fin cette nourriture venant à leur defaillir, la machine du monde periroit & feroit conformee par le feu. Suiuant laquelle Philosophiel'on doit entendre ces vers d'Ouide parlant de Iupiter,

*Mais lors il luy souuint, qu'un iour le feu
doit prendre.*

(Côme veut le destin qui fera tout mourir)

A la terre & aux Cieux pour les reduire en cendre,

Et que cette machine aura fort à souffrir.

C'est pourquoy les Egyptiens solemnisoient aux Calendes du mois Phamenoth, la Feste qu'ils nommoient l'entree d'Osiris en la Lune Roynedes humiditez, disant qu'elle couche avec luy, dont ils l'appellent la mere du monde, & veulent qu'elle soit de nature double, femelle en ce qu'elle est engrossie du Soleil, & male en ce que de rechef elle respand parmy l'air les semences & principes de generation. Ce qu'ils ont encore voulu signifier nommant Isis (qui est la mesme que Thetis, cette humide nourriciere du monde) aucunefois *Mouth*, & quelquefois *Athiri*, dont le premier signifie mere, & le second, le lieu de generation & receuant. Et pourquoy feignoient-ils que le Soleil & la Lune ne font point voiturez dans des chariots, ains dans des batteaux; esquels ils na-

uigent tout à l'entour du monde, si-
 non pour môstrer que la chaleur pro-
 ductiue des Astres & des Cieux, se
 nourrit d'humidité, cause materielle
 de generation? Et ce Bacchus ou Ofi-
 ris qu'ils appelloient Hyes, comme
 qui diroit, maistre & Seigneur de la
 nature humide, qu'estoit-ce autre cho-
 se que le Dieu Pan qui brusle d'un
 amour violent apres les belles Nym-
 phes? Les hommes mesme estoient
 reputez par quelques Grecs auoir pris
 leur naissance de substance humide: &
 pour cette raison les Hellenites sacri-
 fioient à Neptune Progeniteur, & les
 Syriens adoroient le poisson comme
 estant de mesme generation & nour-
 riture qu'eux. C'est pourquoy les Fa-
 bles nous enseignent que Thyphon
 estoit ennemy capital d'Osiris, d'Isis
 & d'Orus leur enfant, ayant cherché
 tous les moyens de leur faire perdre
 l'empire & la vie. Nous donnant par
 là couuertement à entendre que toute

vertu dessiccative, toute chaleur de feu violent, & toute seche intemperature signifiee par Thyphon, est contraire à l'vnion du chaud & de l'humide, & ennemy de toute generation & de la gloire d'Orus, c'est à dire, de la beauté du monde. Et ce que l'on adioust que Thyphon ietta le Phalle d'Osiris en la riuere, tend à nous enseigner que la vertu genitale & productiue de Dieu, escrit Plutarque, eust l'humidité pour sa premiere matiere, par le moyen de laquelle il se mesla parmy les choses qui estoient propres à participer de la generation: ou ce Payen semble auoir expliqué ce que nous lisons dans Moyse, qu'au point de la creation du monde l'esprit de Dieu estoit porté sur les eaux.

Encore s'en est-il trouué d'autres parmy les sçauants, dont la doctrine plus sensible, mais non moins vraysemblable, cherchant la cognoissance du Dieu Pan dans la consideration de son

son image, a faict croire qu'il representoit ce grand Vniuers. Et que tout ainsi que la subtile main d'Archimede auoit iceu pourtraire artistemét & renclorre l'immenfité des Cieux & des Astres avec leurs mouuements, dans le petit espace d'une piece de verre: l'on auoit de mesme esleué l'Idole de ce Dieu comme vn pourtraict racourcy de toutes les parties de ce monde incomprehensible: Soit qu'il portast cette image de toutes choses, pour témoigner qu'il en estoit l'autheur & conseruateur, ou qu'en effect ils adorassent sous cette pourtraicture, l'Vniuers dans sa simple & exterieure apparence. Car plusieurs, voire mesme des Philosophes, comme on void plus au long dans Ciceron, ont estimé & adoré le monde ainsi qu'un Dieu eternal, sensible, & tournoyant, sans en considerer la cause premiere. La diuinité neantmoins de ce grand corps n'est pas seulement reprobuee, mais aussi mocquee

par Velleius, pour autant que la felicité d'un Dieu ne doit point estre occupée apres des mouuements eternels, comme sceut bien respondre un Roy de ces nouueaux pays barbares à ceux qui luy vouloient persuader que le Soleil estoit Dieu. Or le nom de ce Dieu Satyre semble de prime abord confirmer l'explication de ceux qui l'interpretent pour l'Vniuers, non seulement à cause que ce mot de Pan signifie Tout: mais aussi parce qu'il est deriué, selon Plutarque, de Penté, qui signifie cinq. Car au Triangle Egyptien, hieroglyphique du monde & de ses principes, la ligne qui faict cinq represente le monde, & les deux autres, qui sont trois & quatre, les deux principes vniuersels male & femelle: Parce que tout ainsi que le cinq est semblable de nature & de puissance à ces deux autres nombres, estant composé du trois & du deux, lequel doublé faict quatre: de mesme le monde participe

de la nature des deux principes qui le composent. Ceste opinion n'est point si nouuelle qu'elle ne soit authorisee d'Orphee le plus ancien de tous les Poëtes qui ont suruescu la voracité du temps, quand il chante en ses hymnes, que le Ciel, la terre, la mer, & le feu, sont les membres de Pan. Ce qui se rend encore plus manifestement intelligible par le rapport que l'on peut faire de son image à tout l'Vniuers.

Car premierement, comme les Philosophes n'ont point douté de mettre la Priuation de l'estre, entre les principes des choses qui sont. De mesme ne ferons nous point de difficulté de conter, cet espace imaginaire & vuide surceleste, qui n'est rien qu'une simple lumiere, entre les parties du monde; & pouuons nous dire qu'il estoit representé par la caluitie de Pan, dont le dessus du chef n'estoit rien qu'un vague & une simple blancheur lumineuse.

se. Car ce Dieu & tous ses suiuaunts ont tousiours esté peints chauues & tenant la main esleuee dessus leur front, de crainte que la trop grande ardeur du Soleil ne fit bouïllir leurs cerueaux : ce qui a faict corriger au Docte Scaliger dans les Priapees le vers qui nommoit les Faunes cheuelus.

Le nombre & l'harmonie des Cieux estoient remarquez par la fleure à sept tuyaux qu'il portoit en la main, car les sept tons diuers de cet instrument tesmoignent que les Anciens estimoient qu'il n'y auoit que huiet Cieux : parce que les deux qui s'entretouchent ne faisant qu'une seule resonnance, les huiet ne pouuoient par leurs mouuements & frottements l'un contre l'autre, rendre que sept tons, dont l'harmonieuse consonnance procedoit de l'esloignement & disproportion de ces grands corps. D'où vient que les premiers Musiciens imitant ces celestes accords, ne donnerent à leurs instru-

ments que sept cordes, & à toute la Musique, cōme encore à present sept tons.

Ceste houlette & baton pastoral recourbé par le haut en plusieurs cercles renfermez l'un dans l'autre, seroit-ce point le temps fils aîné du Ciel, lequel comme vn serpent replié de plusieurs tournoyements sur luy mesme, ne finit iamais que pour recommencer? Ou plustost l'annee, iene dis pas la Solaire, mais cette reuolution totale des Cieux à l'origine de leur mouuement : lesquels apres plusieurs tours & retours, plus vistes ou plus lents selon leur inegalité, parferont en vn mesme instant de repos, cette grande annee composee de plusieurs millions d'annees, & dans l'accomplissement de leurs actions borneront peutestre le cours du monde & la vie de la nature? Et qu'auroit on voulu signifier par les cornes de Pan sinon la lumiere? Iupiter Ammon, qui n'est autre que le Soleil appellé par les Hebreux, *Hamma*, auoit deux cornes de Belier sur la

teste, & Isis & Diane celles d'un Tau-
reau: Et en la langue Hebraïque le mot
de lumiere & de corne est æquiuoque:
Aussi lisons nous dans l'Exode, selon la
commune traduction, *Que la face de
Moyse, descendant du mont Sinay, estoit
cornüe, & selon la nouvelle, lumineu-
se*: De faict Moyse voulant parler au
peuple se couuroit le visage d'un voile,
parce que leurs yeux trop foibles n'en
pouuoient soustenir la splendeur glo-
rieuse qu'il auoit acquise par l'auoisi-
nement & participation de Dieu: &
sainct Paul, comme interpretant ces cor-
nes de Moyse, dit qu'il estoit tout cou-
uert de gloire.

Le visage de Pan portoit en sa cou-
leur vermeille, l'image du feu ou region
ætherée: & les rides qui luy rendoient la
face rechignee, & toute crasseuse, com-
me dit Homere, representoient les in-
constances iniurieuses de l'air. Le poil
long & ferré de sa barbe, dont Philo-
strate escrit qu'il faisoit vn si grand con-

te , figuroit les influences productiues, que ces deux premiers elements versent en contre-bas d'une abondance continue, afin que meflangez avec les inferieurs dans le sein de la nature, ils donnent l'estre à toutes les choses de ce monde. Ce que les Poëtes nous donnent couuertement à entendre quand ils feignent que sur la prime-verc Iupiter (qu'ils prennent pour æther) descend parmy les douces pluies dans le giron de la terre sa femme, & l'engrosse des diuerses semences de toutes choses : & que Iunon , c'est à dire l'air , est suspendue & liee par les mains d'une chaisne d'or, ayant à ses pieds deux lourdes enclumes attachees, dont la pesanteur la tire par force contre la terre.

Nullle autre partie dans la figure de ce Dieu, ne pouuoit à mon aduis représenter la mer avec plus d'energie que le ventre. Car tout ainsi que cette partie est la sentine & cloaque du corps humain, le receptacle des excrements , l'amas des

immondices & superfluitez, bref vne estable d'Augee en nostre nature: De mesme les *Ægyptiens* estimoient que la mer auoit esté produicte par le feu sortant hors la sphere de ses actiuitez, estant vne superfluité corrompuë, & maladie contre nature: & *Plutarque* la faict au monde ne plus ne moins que la vessie au corps d'un animal. Pour ceste raison les Monstres, les Androgynes, les Fulgurez, les Parricides, & semblables abominations, estoient precipitees dans la mer, comme estant seule au monde le lieu propre à receuoir telles impuretez. Et ceux-là qui s'estoient polus de quelque indigne forfaiture croyoient en s'y plongeant avec quelques ceremonies, y laisser leur crime, comme les blesez des bestes enragees y vont perdre la mortelle contagion de ce venin. Et nous lisons dans les *Histoires du nouveau monde*, quel *Ingua Roy du Peru*, auoit de coustume se baignant dans vne riuere, de confesser à

haute

haute voix tous ses pechez au Soleil, & puis commander aux eaux de les porter dans la mer, affin que iamais plus on n'en peust auoir de cognoissance. Si bien que les Pythagoriciens la nommoient bien à propos, la larme de Saturne, voulant dire sous ces paroles couuertes, qu'elle estoit toute impure & immonde.

Quant à la terre ferme & immuable sur le point indiuisible qui la supporte, & entre-coupee de montagnes, elle estoit figuree par la corne dure & entr'ouuerte des pieds de chevre du Dieu Pan. Les plantes & les arbres qui la decorent, par le grand poil & les gazons verts dont ses cuisses estoient reuestuës, & les animaux, par la brutalité de ces parties.

Peut-estre que la figure humaine dont la moitié de ce Dieu estoit honoree, pourroit représenter l'homme, le plus sainct & admirable ornement de l'Vniuers. Mais nous dirons plustost

que par là estoit figuree ceste vieille Pro-
neia des Stoïques, c'est à dire ceste sage
raison & prouidence eternelle qui gou-
uerne toute la nature. Raison que les
Platoniciens disoient estre yssüe de la
propre substance de Dieu, & partici-
pante d'entendement, d'ordre & d'har-
monie, & que diffuse en la matiere, com-
me dans vn corps qu'elle informe, non
seulement elle anime & viuifie toutes
les parties de ce grand Tout, mais aussi
les regit avec poix & mesure selon les
ordonnances eternelles de la nature.

Reste la solitude que ce Dieu cheris-
soit tant, par laquelle l'vnité du monde
estoit demonstree contre les resueries
de Democrite, d'Anaximander & de
leurs sectateurs, qui faisoient naistre vne
infinité de mondes, s'entreproduisant
les vns les autres, & dont ceux qui peris-
soient hors cestuy-cy estoient causes
souuent des pestilences & accidens ex-
traordinaires. Qui pourroit admettre
les extrauagances de cet Heraclidés qui

constituoit en chacun des astres vn monde pareil à cestuy-cy, & le triangle imaginaire de Petron composé de cent quatre-vingt trois mondes, s'entretenant comme ceux qui sont en vne dance? La raison, la doctrine publique, & l'opinion mesme du diuin Platon, nous enseigne trop certainement qu'il n'y a qu'un seul monde, créé & aymé de Dieu, composé de toute nature, ayât vn corps entier & content de soy-mesme, sans auoir besoin de rien d'ailleurs.

C'est vne parolle assez commune, & Aristote mesme nous l'enseigne en ses problèmes, que toutes les choses humaines se meuuent en figure circulaire, & qu'estât retournees au point de leur origine, elles ioignent leur fin à leur commencement. En quoy Philon rencontre fort subtilement, disant que les gens de bien, apres auoir tourné leur compas sur toutes les actions de ce monde, vont finir vn cercle admirable dans le Ciel, au mesme lieu où ils l'a-

uoient commencé. Or soit qu'en effect la nature des choses d'icy bas soit telle, ou qu'une fortuite rencontre nous ait fait tomber dans ce cercle philosophique, ce traicté s'estant insensiblement replié sur luy mesme & retourné au mesme discours de l'Vniuers dont nous auons tiré son commencement, Nous estimons que pour ne dementir ce cours general de toutes choses, il est raisonnable de finir en cet endroict, & mettre pour Autels & colonnes de ce petit voyage que nous auons entrepris sur une mer incognüe, l'esperance que la nouveauté du subiet le fera receuoir d'aussi bonne part comme les difficultez en sont grandes & espineuses.

F I N.